

**NATIONAL ASSEMBLY OF
SEYCHELLES**

Tuesday 26th January, 2021

The Assembly met at 09am

National Anthem

Moment of Reflection

Mr Deputy Speaker in the Chair

MR DEPUTY SPEAKER

Mon ava dir bonzour tou bann Manm Onorab. Bonzour tou bann dimoun ki pe swiv nou sesyon Lasanble Nasyonal pou sa Mardi bomaten.

E ozordi nou pou kontiny nou deliberasyon reaksyon bann Manm lo Diskour Leta La Nasyon prezante par Prezidan Larepiblik, Prezidan Wavel 'Wamkalawan', Vandredi pase.

E zis pou ki bann Manm i konpran e osi piblik deor, swivan lensidan yer. Sa ki mon oule dir se ki Manm Onorab in fini servi son pinisyon. Donk ozordi nou tou nou retourn dan Lasanble e nou kontiny nou deliberasyon parey ti lo program.

Aprezan nou ti annan 1 Manm ki ti dwatet koze, me ki pa ti la. Donk ozordi bomaten nou pou komans avek Onorab Audrey Vidot. Laparol i ava pou ou.

HON AUDREY VIDOT

Mersi Mr Speaker. Mr Speaker, tou Manm Onorab, zabitan Roche Caiman e tou manm piblik ki a lekout bonzour.

Mr Speaker, permet mwan avan ki mon delivre mon reaksyon lo diskour delivre isi dan nou Lasanble par Prezidan Larepiblik, pou remersye tou dimoun ki'n anvoy zot mesaz rekonfor apre ki nou'n aprann depar Onorab Jeovana Charles. Mersi Mr Speaker.

Mr Speaker, si i annan en pep ki'n toultan fyer son idantite se byen pa lot ki nou Nasyon Seselwa. Si i annan en pep ki'n toultan ganny dekrir akeyan e touzour souriyan se byen sa Nasyon Seselwa.

Nou pep in toultan annan sa sourir ki resevwar son manm fanmir, son zanmi, osi byen bann viziter ki vin vakans dan nou pti pei Sesel.

Dir bonzour, an souriyan e annan bann bon lapolites i bann valer ki nou'n toultan annan koman en pep.

Sa ki krwar ki prezan ki nou komans dir bonzour, sa ki krwar ki prezan ki nou komans annan sourir lo nou figir, la mon demann mon lekor kestyon, be dan ki pei ki ou ti pe viv? Akoz nou dan Roche

Caiman, nou'n toultan dir bonzour e nou koz ek kanmarad.

Mr Speaker, malgre nou bann difikilte lavi, malgre nou bann limitasyon nou'n en pep ki'n byen edike.

Mr Speaker, pandan sa dernyen 40an Gouvernman *SPPF*, Parti Lepep e *United Seychelles* in toultan asire ki nou pep i reste o sant nou devlopman. Kontan pa kontan laprev i la dan nou Lasanble ozordi.

Mr Speaker, apre sa ladres *SONA*, bokou zabitan Roche Caiman in pran kontak avek mwan e tre dezapwente avek lafason ki Prezidan Ramkalawan in adres nou pep.

In annan dimoun in demande, be avek ki e lekel ki Prezidan Ramkalawan ti pe lager avek? En lot zenn garson profesyonnel i dir mwan, eski koumsa ki sa nouvo Prezidan pe ankouraz dimoun pou koz avek kanmarad?

E en lot zenn fiy avek dezabilite me avek abilite pou fer bann bon analiz, i dir mwan ki li i napa 1 mo pour dekrir sa ki in trouve ler in ekout nouvo Prezidan koze aköz i senpleman santi li kanmi.

Ozordi Mr Speaker, i kler ki sa Gouvernman *LDS*, ki nef napa en plan konkret lo fason

ki nou pei pou al pli devan. Ler *LDS* ti pe lager pour ganny pouvwar, zot ti dir zot pou vin fer pli byen.

Alors, be akfer ki zot bezwen kontinyen konplent napa isi, napa laba, ladministrasyon pa'n fer sa, pa'n kit sa. Zot nepli dan Lopozisyon aret konplent e fer sa ki zot ti promet Lepep Seselwa.

Atraver ou Mr Speaker, yer mon'n tann Onorab Phillip Arissol dir met nide ansanm, be Onorab se sa ki *United Seychelles* pe fer me ler nou fer li ou Dirizan i kriy *incitement*.

Alors, kwa ki zot pe espere pou zot met zot bann bon plan anmars? Zot ti sipoze pli meyer ki ladministrasyon Mr Faure. Oli zot manifesto ki zot ti prezant avek lepep?

Pa vin dir nou zot pa kapab aköz *COVID*. Parske ler kanpanny ti komanse *COVID* ti deza la dan lemonn. *COVID* ti la depi 2019. Se pou sa rezon ti apel *COVID-19* e non pa *COVID-20* parey zot le fer Seselwa krwar.

Ler zot ti la lo sa kote latab, zot ti dir nou aret blanm *COVID*. Be ki'n arive la? La i *ok* la pou servi *COVID* pou eksplike aköz keksoz pe vin difisil.

Mr Speaker, avek sa leta ki sa Gouvernman nef i ladan,

nou bann dimoun pli aze dan Roche Caiman i pran traka toulezour.

Zot pe mazine ki pou arive avek zot bann zanfan, zot pti zanfan si zot pou annan en lanplwa, si zot pou kapab kontinyen repey zot bann det e si zot pou kapab met manze dan lasyet zot zanfan.

Bokou profesyonnel pe osi pran traka menm, zot pe viv avek lenkyetid, zot pe viv avek lafreyer e zot pe mazine si zot kontra pa ganny renouvle ki zot pou fer.

Zot pe demann zot lekor kestyon, eski mwan mon pa en zanfan Sesel mwan? Zot annan plis kestyon me zot pa'n ganny lespwar dan sa SONA ki'n ganny delivre par en Prezidan ki dekrir li koman nef.

Mr Speaker, linite. En mo ki dan nou Lim Nasyonal pou en bon rezon, nou fek sant li ankor la bomaten. Si i annan ki'n toultan koz lo linite se byen ki nou Prezidan Danny Faure.

Se nou dan Parti US ki'n toultan promot linite, lape, lanmour e bon kanmaradri. Akoz nou pa ti montre personn "Pil lo li!"

Mr Speaker, avek ladministrasyon Prezidan Faure nou ti vwar bann lobzektif ki i ti anvi akonplir malgre difikilte. Legzanp i la,

Roche Caiman le 31 Zilyet 2020 ti ganny 16 nouvo lakaz e finalman zenn Eden Village in ganny zot fasilite sport e rekreasyonnel.

Si pei ti en kales kase parey Prezidan Ramkalawan in dir, ki mannyer nou'n arive delivre? En pei kales kase? Dimoun pe demann zot lekor kestyon. Kote sa bann lakonpanyen in progrese pou ganny sa bann milyon pour al prezant ek Prezidan Ramkalawan dan *State House* dan sa kales kase?

Dan Roche Caiman plizyer nou bann zenn profesyonnel in *graduate*, zot in fer sikse dan zot landrwa travay partou, pourtan nouvo Prezidan in vin dir ki nou pei i en kales kase.

Dan Roche Caiman nou bann dimoun in al travay toulezour pour amelyor zot lavi, pou aranz zot lakour, pourtan nou dan en kales kase.

Dan Roche Caiman nou annan 4 lekol, pli gran lekol primer avek son lakres, en lekol segonder, lakres Les Mamelles lanmenm la o bor li, e en lekol pour nou bann zanfan avek en dezabilite me ki annan abilite.

Tou sa bann lekol i fonksyonnen, pourtan i ganny dir nou dan en kales kase. Dan Roche Caiman nou annan tou sort kategori artis ki swa dan

lar, santer, santez e ekriven bann zoli morso lanmizik e serten menm ganny loportinite pour ariv lo nivo rezyonal, pourtan nou'n ganny dir pei i dan en kales kase.

I kler ki malgre ozordi Prezidan Ramkalawan in vin Prezidan son labitid e son latitid pa'n sanze ni amelyore. Ler i delivre son diskour SONA, konmsi ou krwar ki i dan bann rali ki i abitye organize. Maltret tou dimoun. Sa ki sagrinan se ki bann *Leaders LDS* enkli bann dan Lasanble i aplodi son fason koze ek son fason azir.

(APPLAUSE)

HON AUDREY VIDOT

Comme dir en madanm Roche Caiman si Dirizan dan *LDS* dan Lasanble Nasyonal i aksepte mantalite sa nouvo Prezidan, nou oule krwar ki zot annan menm latitid. Zot in prouve la bomaten.

Wi madanm, menm Onorab Clive Roucou yer atraver ou Mr Speaker, in konfirm sa ki ou'n dir e pou annan ankor ki pou dir dan lazournen ozordi ki pour swiv.

Mr Speaker, ozordi nouvo Prezidan pe koz fyerman ki lemonn in aplodi lafason ki tranzisyon sanzman

Gouvernman apre 43an in deroule Sesel.

Be sa tranzisyon in pas sitan trankil, dan lape avek Prezidan Faure akoz Prezidan Faure in en zonm D'Eta, en zonm lape. Prezidan Faure i ganny dekrir pa koman en zonm ki arogan, en zonm ki respe dimoun.

Prezidan Faure in annan tou bann bon valer dan li e sa in permet li ki sa pas pouvwar i deroul dan en fason ekstraordiner. Nou dir bravo Prezidan Faure pou ou grander lespri.

Mr Speaker, serten zabitan Roche Caiman ki'n pran kontak avek mwan, in menm pe demande ki apre sa en demi erdtan ki Prezidan Ramkalawan in dispit dan Lasanble, in zanmen kapab dir nou kwa ki in arive akonplir pandan son 89 zour dan *State House* e son 100 zour pe aproses.

Zot kontinyen analize ki dan sa en demi erdtan ki Prezidan Ramkalawan in dispit dan Lasanble, i pa'n zanmen kapab anonse bann gran laliny ki li ek son Konsey Minis pou anmennen sa lannen.

Mr Speaker, nou dan *US*, nou siport tou zefor ki bann travayer Lasante pe fer pour arive fer fas avek sa sityasyon

COVID-19. Nou dir zot kouraz e mersi pou zot bann bon travay.

Nou bann travayer, nou pe demann zot pou redouble zot zefor dan landrwa kot zot pe travay pour ki ansanm nou ava travers sa moman difisil. Zabitan Roche Caiman kot i annan loportinite pour debourye, debourye.

Annou reste for e gard fikse, pa abandonn lalit pou kontinyen devlop Sesel.

Bann ki dan program URS mon ti dir zot Desanm 2020, pa fye lo sa program bouze rod en lanplwa, en louvraz anploye aköz ler ou vot pour sanzman radikal espektenenport kwa.

Mr Speaker, ler en Prezidan, i vin melanz latitid politik partizan dan travay, sa i danzere. Aköz sa kalite pratik i kapab detrir nou la demokrasi ki'n pran nou bokou lannen pour konstrir.

Pou en Prezidan vin dir avek en lot parti politik pour aret koz lo serten size ki pa fer li kontan, sa i fer lapenn dan sa moman kot nou pe viv. Ler ou dir ou pe abiz ou drwa lo en sitwayen.

Prezidan Ramkalawan pe koz lo koripsyon, selman son Gouvernman pe fer bann sanzman radikal atraver striktir ki denons bann ak koripsyon.

E Gouvernman LDS avek son bann MNA pe ankouraz piblik fer bann fo alegasyon san okenn laprev fonde e levidans konkret. Nou pep pe demann zot lekor, kote nou pe ale?

Se sa bann kalite aksyon iresponsab ki kree divizyon parmi nou pep. Mon senserman krwar ki nou'n ariv en lepok kot politisyen i merit vin ansanm olye divize. *Reach out* anver kanmarad pe enport ki nou diferans e anver tou sa bann potansyel ki nou pei i posede.

Akoz se la kot nou pou trouv solisyon nou dilenm e difikilte koman en pep ini. E se la kot nouvo nide pou monte e nouvo lenerzi pou ganny trouve.

Mr Speaker, lekspektasyon lo konteni diskour Leta Lanasyon pour 2021 avek tou respe in enn ki dezapwentan. E ler mon dir dezapwentan, se moman egzakt ki bann zabitan Roche Caiman in eksprim avek zot dezapwentman.

Pe enport pou ki nou ti vote pou eleksyon Prezidansyel, me lentansyon se pour met en Dirizan ki konpetan e kapab diriz nou pei dan nenport ki sityasyon e onor son langazman pour met pep Seselwa premye e o sant devlopman pei.

E non pa en Prezidan ki vin reponn tou largiman politik ki li i pa anvi tande. Enn ler *comme* dir en msye Roche Caiman, vre sa nouvo Prezidan ti byen plase koman en *Leader* Lopoziyon e non pa Prezidan pei aköz i ankor pe kritike menm, menm si pouvwar i dan son lanmen.

Mr Speaker, en lot fo promes pou ganny vot bann paran ki'n soufer aköz sa sityasyon drog. (Mr Speaker eski i posib pou ou dir avek Onorab Woodcock ki mwan ki annan laparol silvouple?)

MR DEPUTY SPEAKER

Onorab kontinyen ou lentervansyon.

HON AUDREY VIDOT

Mersi. Pourtan, se li menm ki Prezidan Ramkalawan ti vin dir nou ki pe negosye avek bann trafiker pou vwar ki manner zot kapab kontribye dan nou pei e i ti menm dir ki trafiker i osi bann viktim.

Be letan ou'n konmans negosyasyon akfer ou bezwen donn *warning* parti *warning*? Fer aksyon msye Prezidan. Mazinen byen ler ou ti vin dir dan 100 zour ou pou kapab elimin drog Sesel, lepep pa'n bliye.

La prezan vin koz nou pei konman kales kase. Koman en baraz pour marke zot ziz-e aköz zot pa'n kapab delivre. Zabitan Roche Caiman i anvi vwar ki dan Roche Caiman drog i aret vann dan nou kominote.

Nou pe enplor lotorite pou entansifye en bon patrol ki efikas dan distrik Roche Caiman, pou ki nou tou nou ava an sekirite.

Prezidan Ramkalawan i bezwen onor son bann langazman, ki konsern drog enkli sa bann adikt ki i ti dir i pou bezwen ganny dil avek avan, an servan metod *cold turkey* e met zot lo zil.

E i ti dir menm ki i pou ogmant sa doz *methadone*. Ki'n arive avek sa logmantasyon doz? Seselwa pa bliy tou sa, Msye Prezidan.

Mr Speaker, resaman lo medya Prezidan Ramkalawan in dir napa nesesite pour *lock down* pei aköz Seselwa pa pe groupe e lotorite ki annan kontrol lo sityasyon.

Parkont Zabitan Roche Caiman pe raporte toulezour par telefonn, kote dimoun pe groupe ki swa kot laboutik anler Eden Village, kot blok flat, kot bann lakaz prive kot lanmizik i ganny met deor pou groupe e zwe kart ek domino.

Dan tou kwen vilaz Roche Caiman drog ankor pe ganny vann parey dimoun i groupe kot bazar. E pou lenformasyon Gouvernman avek son bann lotorite, wi i ankor annan dimoun ki pe fer parti ziska 1er bomaten dan vilaz Roche Caiman.

Alors si vreman Gouvernman LDS i annan kontrol, nou Lapolis Mont Fleuri ti pou annan ase sipor pou zot kapab met plis lord dan Roche Caiman, avek sa bann adilt ki pe kontinyen marse san okenn mas dan zot figir an piblik;- sa bann paran ki les zot zanfan zwe deor 6er diswar e menm les zot marsaye dan semen pou al laboutik san okenn mas.

E lotorite i konn tre byen ki i annan dimoun dan distrik parey Roche Caiman, kot nou annan dimoun ki pe fer son karantenn kot lakour akoz i annan manm ki'n teste pozitiv avek COVID.

Me malerezman pou zot lenformasyon, pa tou ki pe respekte konsey Komisyoner Lasante Piblik pou reste kot lakaz e met zot mas, akoz i annan ki ankor pe marsaye lo semen piblik pe al laboutik e kot vwazen san okenn mas.

Mr Speaker, Zabitan Roche Caiman pe swiv tre pros

ki pe pase dan nou pti pei Sesel e zot konpran ki priyorite pei se adres son problem ekonomik.

Parkont zot osi anvi konnen ki vre leta nou Nasyon avek levidans konkret ki donn rezon pour bann mezir ki Gouvernman nef pe pran, i bann ki dan zot lentere. Bann fanmir ki pe ganny *part rental* ki nouvo Prezidan in dir koupe, sa bann fanmir pe enkyet e pe rode kote zot pou ale. Prezidan Ramkalawan in rat sa sans pour vin dir nou son plan pou pri lavi desann parey i ti pe kriye avan eleksyon.

Mr Speaker, kou lavi dan Sesel i reste o. La i vin pli o avek devalyasyon nou Roupri fas avek lezot deviz ki nou servi pour aste marsandiz.

Rediksyon pri lavi in touzour priyorite Prezidan Faure, me i pa'n fasil parey LDS ti toultan le fer nou krwar ler zot ti vin avek zot kanpanny met larzan dan pos Seselwa. La pou sap sa blanm tou pou al lo COVID.

Mr Speaker, menm si nou komans prodwi serten keksoz parey komodite agrikol dan nou prop pei, i pou reste ki nou pou touzour depan an gran parti lo enportasyon e nou osi depan bokou lo lendistri tourizm.

Malerezman dan son premye diskour lo Leta nou

Nasyon Prezidan Ramkalawan in rat sa sans pour donn nou detay plan son Gouvernman lo diversifikasyon nou lekonomi, pou ede redwir nou depans lo tourizm. Lefe i reste kantmenm ki en lepidemi parey *COVID-19* pe afekte preski tou kous nou lekonomi, e i pour kontinyen afekte plis nou lekonomi si i pa ganny fer tou posibil pou met li anba kontrol.

Mr Speaker, Seselwa i rapel byen ki lafen 2020 Prezidan Ramkalawan ti anonse ki bann lapwentman konstitisyonnèl pa pour resevwar gratwite lafen lannen e demann Lasanble kot *LDS* ti servi son mazorite pour amann Lalwa pour aret 13enm Mwan Saler.

E apre sa nou ti swiv serten lorganizasyon parastatal lager pour zot *bonous* e nou'n vwar Vis-Prezidan ek Minis Finans pe negosye pour zot.

I zis apre ki bann travay ti resevwar zot *bonous* sa bon mesaz kado Lannen, le premye, Prezidan Wavel Ramkalawan ti dir zot dan plas lager pour zot *bonous* zot ti merit lager pour asir zot saler anye.

Be Prezidan Ramkalawan ou ti merit dir avek, avan ou prezant pou donn serten *bonous* bann travayer, ou ti merit eksplik zot e dir zot, depi

premye zour, ki difikilte pei i ladan.

Tenir for, tou Seselwa ki rekonnèt ki Prezidan Ramkalawan pa kapab pran en desizyon ferm e konkret.

Bann ki'n vot pou li e ki pe konmans santi ki pa sa sanzman ki zot ti demande debout for parey sanson i di, r akoz Onorab Doyace Porice yer in dir zot ki *LDS* pou la pou plis ki 5an. Zis pa dir si mon ti konnen. Me profit byen sa 5an pou fer sa bann bon refleksyon.

Mr Speaker, nou'n tann Prezidan Ramkalawan dir ki i annan bann larzan *Board*, osi byen ki larzan *part rental* ki Lazans Proteksyon Sosyal pe asiste pour ganny koupe.

Alors Seselwa i le konnen, si Gouvernman pour osi konsider koup bann *allowance* pou lwe lakaz ki bann dimoun dan pozisyon konstitisyonnèl i benefisye? E ler zot pou koup sa bann larzan, fotespere *SBC* ti premye lo zot lalis akoz li in enn bann *Board* ki ti pli byen ganny peye, konpare avek travay ki sa bann lezot *Board* ti pe fer e i annan ki pa ti menm zanmen ganny en sou.

E Seselwa i le ki napa en pwa de mezir dan bann desizyon ki Gouvernman nef i pran pou koup son bann depans. Mr Speaker, sa ki en

Gouvernman responsab i kapab fer, se fer sir ki komodite de baz i reste abordab pou Lepep Seselwa kapab sirviv dan sa moman difisil.

Mr Speaker, Seselwa i oule konnen ki plan Gouvernman pou fer tou sa posib pou rann pri lavi pli abordab posib pou tou zanfan Sesel. Mr Speaker, mon pou konklir par tous lo sa size respe.

Prezidan Wavel Ramkalawan pe demann respe, e nou konn tre byen ki respe i komans avek nou menm bann dirizan. Prezidan nouvo i bliye ki bokou lannen in mank respe pour plizyer dimoun dan sa pei.

Kot li personnelman in kriy non serten madanm dan son bann rali e denigre sa madanm. Kot li menm li in servi bann parol vilger avek en lot madanm Onorab ki pli aze ki li.

E ozordi 89 zour apre ki i dan biro Prezidan *State House* i oule koz lo respe. Zis pa bliy sa proverb ki dir, "Ou rekolte sa ki ou senmen!"

Toultan i komans avek sa ki anler. Si Dirizan nou pei pa montre ki i annan sa abilite dan li pou pratik respe e linite pour ki nou pep a vreman kapab rekonsilye avek lepase, se la ki nou pou trouv solisyon pour lavenir.

Se pou sa rezon ki *United Seychelles* pe kontinyen lans lapel pour Lepep Seselwa koste ansanm e ankouraz linite Nasyonal.

I malere ozordi laverite e rekonsilyasyon i vin zis en retorik dan li menm, e pa ni pe servi okenn bi. Olye sa bann laenn ek vanzans dan leker, aköz zot pa reprezant sa loportinite parfe ki la ki zot dan Gouvernman pou nou pei retrouv lape avek son nanm, e retrouv nou linite.

Mr Speaker, Prezidan Ramkalawan i bliye ki avan eleksyon 2020, i ti dir dimoun fer politik dan travay. Li i ti antre dan en lorganizasyon Gouvernman dan triko politik.

Ler politik pa dan nou fantezi e ou dir kit dan lakour, si ou ti kapab depi lontan ou ti'n merit dir sa.

E ler Prezidan Ramkalawan pe dir tir politik dan travay, komans donn legzanp par son bann zofisye Gouvernman, ki ankor vin dan zot brasle *LDS* e ankor annan zot *stiker* kanpanny lo zot loto ki pe park dan bann lorganizasyon travay.

Akoz ler i ti asiz lo sa kote latab i ti toultan fer resorti sa bann komanter ki mon fer ozordi.

MR DEPUTY SPEAKER

I reste ou 2 minit Onorab.

HON AUDREY VIDOT

Mon pe senpleman, (mersi Mr Speaker), zis *remind* ou Msye Prezidan.

Alors Gouvernman merit tonm dan en plan konkret e en lanvi senser pour vreman rekonsilye nou diferans e donn sans nou nouvo zenerasyon ki pe monte, viv akote kanmarad dan vre lape e lanmour.

Akoz nou pa pou protez lavenir nou zanfan, e nou pou napa en lavenir si nou pa sezi sa moman ki nou ladan ansanm koman Seselwa.

E mon a termin mon lentervansyon avek en pwen for dan bann diskour Prezidan Faure, “Dan nou diverzans, avek tou nou diferans, apre tou Sesel i sa baz ki inifye nou tou.” Mersi Mr Speaker.

MR DEPUTY SPEAKER

Mersi Onorab. Zis pou aport latansyon bann Manm ki Speaker Mancienne i ti’n prepar en lalis koze selon ki bann *Caucus* ti’n donn li.

E yer ti’n ariv zis sa pti lenteripsyon, 1 Manm pa ti’n perdi son drwa koze, alor nou’n komans ek li bomaten. So byen koze i fer byen konpran. Mon pou zis kontiny parey Speaker

Mancienne ti’n prevwar. Alor mon pou donn laparol Onorab Rocky Uranie.

HON ROCKY URANIE

Mersi Mr Speaker. Mr Speaker, tou koleg Onorab, Seselwa ki a lekout, sirtou Digwaz, zabitan Zil Pros e osi bann etranze ki dan nou pei, mon oule dir zot en bonzour spesyal. E malgre tou sa ki nou pe pas ladan mon oule pran sa loportinite pou swet zot tou mon meyer ve pou sa lannen 2021.

Mr Speaker, mon annan bokou respe pour ou, pour Prezidan e pour bann koleg Onorab e Seselwa an zeneral. Rezon akoz mon annan respe set akoz mwan e tou Digwa nou’n byen ganny elve par nou paran pour montre e donn respe dimoun.

Mr Speaker, Prezidan in dir ki Mr Mancienne, Speaker i nef, Prezidan li menm i nef e mwan osi mon en *MNA* ki nef zis parey plizyer lezot lo lot kote latab zot osi zot nef. Ennlèr mon ti krwar pres pou sant sa sanson, ‘Tou dil i nef.’

Me parey nou konnen pa tou dil ki nef akoz preski tou keksoz Gouvernman 43an i ankor la, i ankor pe ganny servi e pe mars tre byen malgre zot oule fer nou krwar lotreman.

Mr Speaker byensir keksoz dan en pei i dinamik, i toultan annan lespas pour amelyore. Mr Speaker, letan ou nef ou bezwen byen veye ki ou dir akoz tou latansyon i lo ou.

Ler Prezidan i dekrir sistenm konman en kales kase, mon ti regard vizaz detrwa son bann prop *MNA*, zot pa ti pe krwar ditou dan sa ki i ti pe dir.

Pou mwan Prezidan ti pe esey zistifye inefikasite e mank leksperyans son nouvo Gouvernman. E alors sey anbet dimoun pour fer krwar ki sistenm i sitan pa bon.

Pourtan en sistenm ki'n tenir tou Seselwa, en sistenm ki'n kit Seselwa dan lanplwa, fer bokou zenn epanouir, en sistenm ki'n tir traka dan latet dimoun.

Mon kapab kontinyen site bokou plis ankor, lalis i long. La ozordi anba sa nouvo Gouvernman, dimoun i pli pa ganny en konpran ki pe arive ek pei e zot pa ni menm konnen ki manner pei pour bouz devan.

Sa *SONA* pa'n anmenn plan konkret pour Seselwa. I dir pa konfiz dimoun, Mr Speaker dimoun in pli konfize apre *SONA*, plis dout ek lensertitid in ganny kree dan lespri Seselwa.

Mon oule fer kler Mr Speaker sa ki labous i dir, i sorti

dan lespri, i sorti dan leker. Konman *Leaders* nou bezwen enspir Seselwa, nou bezwen enspir nou zabitan dan nou distrik, nou bezwen donn bon legzanp nou zanfana pou vin bann bon sitwayen ki annan respe pour zot lekor e pour lezot.

Konn ton e lafason koz ek dimoun i enportan pour fer mesaz kler pase, Mr Speaker. Mon'n swiv plizyer *SONA*, premye fwa mon vwar sa kalite.

Malgre zot pou sey defann sa pa en fason pour adres Lepep Seselwa. La ankor mon oule dir Mr Speaker, fodre ou montre respe pou ganny respe. Pa bliye zanfana i aprann ek nou. Mon pa pou sit sa ki ti arive lot fwa mwan en.

Fodre nou vin sa bann bon legzanp pou nou zanfana. Vin sa *role model* pou bann dirizan dan pei vwazen otour nou e menm pou lemond, vi ki bokou touris i vin Sesel, zot enterakte ek nou dimoun e zot osi koz lo politik nou pei.

Fodre nou menm konman *Leaders* nou vin sa vre *spotlight*, sa lalimyer ki pou atir dimoun ver nou. Annou pa zis sit bout dan poenn dimoun.

Sa *Leader*, fodre nou vin sa *Leader* ki donn lankourazman e lespwar Seselwa. Pandan mon karyer

konman en ansennyan mon'n fer sa tre byen e mon ti a swete serten *leaders* i fer parey Mr Speaker.

Mr Speaker Prezidan in dir ki aprezan ki dimoun i annan sourir lo zot figir. Mwan, mon'n toultan annan en sourir lo mon figir e toultan pe anmenn lazwa dan leker e sourir lo figir zabitan Digwa.

Mon'n abitye koz ek tou dimoun e tou dimoun ti koz ek mwan, me ozordi i pa vremen le ka. Kontrerman ek sa ki'n ganny dir dan SONA dimoun ozordi i pli anmer ek kanmarad e osi anmer ek Gouvernman lafason ki keksoz pe ale.

Mon parti *United Seychelles* e mwan menm konman en endividi nou'n toultan siport sa prensip linite Nasyonal, fer lape, koz lo lape e anmenn dimoun ansanm, nou pa'n pil lo personn.

Mr Speaker, lafason ki keksoz i ganny dir ek dimoun dan SONA i pa'n sorti for. I pa'n tous dimoun. I pa'n *re-activate* bann valer dan dimoun ki fer ki Seselwa i kapab vin pli pre ek kanmarad pou viv dan linite.

Sa diskour lo Leta Lanasyon pa'n enspir mwan, i pa'n enspir Digwa. Mwan e mazorite Digwa ti'n vremen fer nou konfortab pour ekout en nouvo Prezidan delivre en

diskour lo leta pei, e osi son plan Gouvernman pou retir nou dan sa sityasyon kot nou ete.

Me sa pa ti le ka. O kontrer nou santi ki nou ti pe ganny dispit avek e ganny reprimande par Prezidan.

Klerman i pa'n donn sa konfyans Seselwa ki zot an kontrol lo sityasyon pei. La demokrasi i enn bann drwa anba Konstitisyon pou tou dimoun. Seselwa i devret kapab egzers sa drwa.

Mwan, mon'n santi e Seselwa menm pe dir, ki ou a krwar dimoun nepli annan drwa koze e kritike si plan pa dan faver sa nouvo Gouvernman.

Mr Speaker, *freedom of speech* dan sa pei la mon oule dir byen for, si pa kapab antre par laport kantmenm par lafnet nou pou fer antre.

Nou lo sa kote latab, dan Lopoziyon nou pa zis opoze. Nou'n touzour pare pour travay ansanm ek sa Gouvernman, me kot i mal nou bezwen dir akoz Sesel i pli gran ki nou tou.

Alors personn pa pou anpes nou koze! Personn pa pou anpes Seselwa koze! Mr Speaker lamazorite Digwa i depan lo Lendistri Tourizm direk ouswa endirek.

I annan gran lotel ki'n fer *redundancy* e sa bann dimoun

pou bezwen sa sistenm *URS*, pou siport zot akoz gran swa travay e *job opportunities* lo La Digue i tre limite, oubyen menm napa e la sityasyon *COVID-19* in vremen agrav keksoz.

La Digue nou napa bann gran lizin parey *IOT* ki kapab akomod plizyer travayer. Kantmenm i annan ki'n eksprim sa dezir pou travay *IOT*, me lozman i reste en gro problem pou zot akoz zot bezwen deplase vin Mahe.

Personn La Digue pa anvi reste permanan lo sa sistenm *URS* e mon krwar Sesel osi napa Seselwa ki anvi reste permanan lo *URS*.

Digwa i abitye travay dir, bann zonm ke fanm ki lo *URS* i dir mersi Gouvernman sortan pour sa sistenm ki'n ed zot met manze lo lasyet zot zanfan. Me la fini!

Mr Speaker si i annan labi, retir labi me pou lemoman mon konnen ki nou bezwen sa sistenm an plas. Sa Gouvernman pa'n get Sesel in get zis Mahe e krwar se tou ki apel Sesel.

Gouvernman pa'n pran La Digue an konsiderasyon. Napa en bon analiz ki'n ganny fer lo mon zil pour vwar ki napa travay. Anba mon Gouvernman, Gouvernman *US FA4JR* ti ganny kree.

(Off-Mic)

MR DEPUTY SPEAKER

Order silvouple, mon pe sey ekoute ki i pe dir. Mersi.

HON ROCKY URANIE

En sistenm fantastik ki menm biznessmenn in dir lo *interview* lo medya, zot ti a kontan i tenir pou ankor en pe plis letan, ziska ler touris i rekonmans retourn Sesel.

FA4JR pou trouv son lafen byento ansanm ek *URS*. Me nou pou vwar konmansman bokou plis lezot keksoz ki pa dezirab pour pei. *FA4JR* ti ede siport biznes e retenir travayer dan sa moman difisil. Aret *FA4JR* san vremen annan en plan konkret lo ki mannyer, bann biznes pour fer pour repey zot *loan* e retenir travayer, pou anmenn rezilta negatif, sirtou lo La Digue ki depann bokou lo touris. Lavenir Digwa i sonm Mr Speaker.

La ki bokou plis Digwa pe perdi zot lanplwa zot annan *loan*, eski sa Gouvernman in antre an diskisyon ek bann Labank pou redwir zot peyman? E osi repeyman bann ki pe anmenn bokou mwens larzan kot lakour?

Eski nou pa pou vwar plis paran pe al rod led *Dedicated Fund* pou zot zanfan? Eski nou

pa pou vwar plis fanmir pe soufer, plis fanmir pe kase, Mr Speaker?

Prezidan pa'n tous ledikasyon ek sa sityasyon COVID. Sa sityasyon difisil pour reasir paran, ansennyan e zanfan ki zot pou ganny en sistenm vreman dinamik an plas, en sistenm ki paran, ansennyan e zanfan i kapab kont lo la pou asire ki laprantisaz i kontinyelman pe ganny arive dan lavi zot zanfan, sirtou bann ki dan lekol leta.

Internet i ankor ser pour paran *afford*. Akoz napa plis negosyasyon *student's internet package* avek bann *service providers* ki pli abordab pour paran? Ledikasyon i lakle devlopman en pei.

Mon senserman krwar ki Gouvernman i devret donn langazman e fer tou partner dan ledikasyon, santi ki senserman zot enterese ek laprantisaz nou zanfan dan lekol Leta pour benefis nou pei demen.

Bann ansennyan mon swet zot kouraz dan zot travay. Zanfan, etidyan profite pour aprann. Felisitasyon bann zanfan ki'n fer tre byen dan legzanmen *IGCSE*. Mazinen i pa fasil la zot bezwen kontinyen.

Bann zenn ki'n konplet zot letid lokal oubyen

enternasyonal, ki plan sa nouvo Gouvernman pour ankadre zot ziska ler keksoz i rebran?

Mr Speaker lot fwa mon'n ganny atake akoz mon pa'n poste mwan lo medya sosyal parey en bann, kot pe distribye *disposable mask*. Sa i senpleman akoz mon pa fer politik avek sityasyon COVID.

Mon'n asiste bann dimoun ki'n dan karantenn ek provizyon, mon pa'n fer piblisite. La prezan mon pe zis mazinen ki kapab arive avek paviyon. Paviyon i senbol enportan en pei e i merit bokou respe.

Mwan konman en Seselwa mon fyer mon paviyon Sesel. Dan sityasyon ki nou ladan dan plas rod 60mil paviyon pour met lo lakaz mon krwar Gouvernman ti kapab *brainstorm* e rod keksoz ki pli enportan, pou ed nou sityasyon lekonomi, kantmenm *sanitizers* pour distribye ek zanfan lekol, oubyen ti a kapab partaz *sanitizer* ek dimoun ki vin pran zot vaksen.

Sa ti ava fer plis sans, oubyen rod materyo ki kapab ede soulaz nou dan sa problenm COVID, me pa paviyon pou le moman. Me selman in arive, *ok?* Sa ti a vin en lot ler.

Mr Speaker *COVID-19* i anmenn mwan lo lasante pa zis dimoun ki'n ganny afekte ek sa maladi, me lasante nou bann travayer Lasante zot menm. Zot lasante fizik e zot lasante mantal.

Mon'n ganny sans koz ek plizyer e zot dir mwan ki zot vremen fatige Mr Speaker. Mon oule dir zot kouraz dan zot travay nob ki zot pe fer, e mon demann dimoun pour swiv byen bann mezir an plas pou ede redwir transmisyon. Dr Gedeon, Dr Louange e lekip antye mersi. Tou bann travayer *front liners* zot osi mersi e kouraz.

Drog Mr Speaker. Drog i en size ki Prezidan ti aborde, drog i en fleo ki pe afekte nou pei. Mon 100 pousan agree avek Prezidan pour lager kont drog ki pe afekte tou kous nou popilasyon e malerezman plis nou bann zenn ki ladan. Prezidan in donn *warning* bann *drug dealers* e finalman in donn son *final warning*.

Fotespere Mr Speaker ou pa vwar *final warning part 2*, *final warning part 3*. Prezidan in dir bann *drug dealers* gara zot. Pandan letan kanpanyi i ti fer konversasyon ek zot ki vedir i konn zot.

Ki kalite konversasyon in fer ek zot, ki mannyer i ti komanse, ki dyalog i ti fer e ki mannyer i ti konnen sa bann dimoun i *drug dealer*? Ziska la zis li menm ki konnen.

Mon ti a kontan demann li si parmi sa bann ki in zwenn, si i annan ki sorti La Digue? E ki son plan pou dil ek sityasyon drog dan pei sirtou lo en pti zil parey La Digue? La Digue i pti e mon krwar sa i landrwa ki i devret konmans dil avek *drug dealers*. Fotespere Mr Speaker kouler parti politik *drug dealer* pa ganny pran an konsiderasyon. Sa nou ava espere pour vwar.

Mr Speaker, mon vremen santi lo sa diskour se ki i ti en diskour, ki mannyer mon dekrir sa, *all over the place*, kot ti annan en kantite koze, me nanryen pa'n vremen ganny dir pour adres sityasyon pei ki pou donn konfyans sa pep.

Seselwa in plito dezapwente. Me mon oule reasir pep Seselwa ki nou dan Lopoziyon nou pou redonn zot lespwar. Nou pou fer sa Gouvernman travay, pou sa pep reganny sa sourir e lazwa de viv. Seselwa pa pou santi ki i pe travay pou viv, i pe travay pou viv, me i pa pe viv zis pou li travay.

Pou terminen Mr Speaker, mon swete ki sa lannen, nou travay byen ansanm pou anmenn dibyen pou sa pep ki pe ekout nou.

Kestyon ki mon oule kit avek pep Seselwa, eski ou santi ou'n ganny touse par sa diskour Leta la Nasyon, dan lesans ki in donn ou motivasyon e konfyans ki sa Gouvernman pou vreman delivre dan son bann promes? Mersi Mr Speaker.

(APPLAUSE)

MR DEPUTY SPEAKER

Mersi Onorab. Prosen entervenans lo lalis se Manm elekte pou distrik La Rivière Anglaise, Onorab Labonte.

HON ANDY LABONTE

Mersi Mr Speaker. Bonzour Mr Speaker, bonzour tou manm koleg Onorab, e en bonzour vreman spesyal tou zabitan La Rivière Anglaise.

Mr Speaker mon konmans pa dir mersi Bondye papa lo non son garson byenneme Zezi *Christ* pour tou son benediksyon, gidans, lagras e son proteksyon en kondisyonnel.

E mon demann li bokou lasazes pou mwan kapab desarz mon responsabilite

koman en Manm Elekte sa Setyenm Lasanble Nasyonal.

E ozordi, i vreman en gran plezir osi, pou mon vi ki mon annan laparol la bomaten, pou swet Mrs Nancy Marie anler dan leo Ma Joie, ki dan mon distrik La Rivière Anglaise en zwaye lanniverser ki i pe selebre ozordi.

112an tre *peu* dimoun ki arive.

(APPLAUSE)

HON ANDY LABONTE

E la mon anvi remersye tou son bann zanfan e pti zanfan ki pe kontinyen pran ka avek li, alor nou dir zot mersi pou sa. E taler petet mon pou zwenn li.

Bon, Mr Speaker i en keksoz ki fodre nou konpran byen dan sa Lasanble, i annan en Onorab in sey pronons non nou Prezidan, i paret mwan i pa konnen. Dan plas dir Prezidan Ramkalawan, i dir Prezidan 'Wonkalawan.'

I enportan ki Onorab Vidot atraver ou Mr Speaker, i aprann ki mannyer nou Prezidan i apele.

(APPLAUSE)

MR DEPUTY SPEAKER

Mr Speaker sa Onorab ki'n koze avan mwan, in dir poudir La Digue in ganny kit deryer.

Be lekel ki ler nou pe lager pou donn zot en Lopital ki zot Gouvernman zanmen in kapab donn zot, e zot ki zot in sey fer? Li menm li mon krwar i devan, pou sey fer en petisyon. Alor annou gete ki nou dir avan.

(APPLAUSE)

HON ANDY LABONTE

Serten zot ki'n koze avan sa osi, pe koz lo pres lape. Be dir mwan, lekel ki ti fer divizyon dan sa pei ler ti fer koudeta? So annou gete ki nou koze silvouple!

(APPLAUSE)

HON ANDY LABONTE

Mr Speaker, Sesel pour tou son zanfan, wi pour tou son zanfan, sa se moto nou Gouvernman. Le 25 Oktob 2020, 7.30 bomaten ler rezilta ti vin ofisyel, apre ki sa 1429 Zabitan La Rivière Anglaise ki'n fer mwan konfyans pour vot pour mwan e finalman met en fren avek sa lafoli grander sa lafanmir bann gro dimoun.

E sa bate bef ki Prezidan Ramkalawan ankor enn fwa, in bat zot, par 54.8poursan. Mon

ti dir en keksoz, met politik de kote ler mon pe deservi mon kominote akoz lentere pep Seselwa ki pas avan tou, pe nenport kouler politik zis parey Prezidan ti dir dan son SONA.

E mon ti mazin *Luc* sapit 9, vers 49 a 50, mon *quote*, Zan ti dir, "Met nou ti war en zonm pe servi ou non pour sas demon, nou ti anpes li, akoz i pa ti avek nou."

Me Zezi ti dir li "Pa anpes li, akoz sa enn ki pa kont ou i avek ou." *Unquote*.

Mr Speaker mon ti mazin sa vers akoz sa 980 zabitan ki ti vot pour *US*, pa neseserman zot kont *LDS* zot, me zot ti'n ganny andoktrinen par serten dirizan *US* ki'n ganny defet dan sa dernyen eleksyon ki ti dir distrik English River e Sesel pa pou kapab bouz devan anba direksyon en nouvo ladministrasyon.

Kan saler zot ti pe mazin zot byen personnel e kontinyen kit sa lanpir politik lafanmir bann gro dimoun. Malerezman in fini degrengole.

Me apre ki sa 980 zabitan in vwar ki Gouvernman dirize par Prezidan Wavel pe vin anmenn linite, zot in konpran akoz ki English River, depi byen lontan ti'n merit annan en dimoun ki vreman pare pou fer zot lavwa tande.

La mon anvi dir en gro mersi pour tou mon bann aktivis, ki'n touzour fidel e krwar dan mon filozofi, ki anfen sa lanpir in tonbe. Me en mesaz ki mon anvi pas avek sa bann dirizan *US* se mazin sa proverb ki dir," I initil poz en latrap letan zwazo pe get ou." Akoz pep Seselwa lizye i gran ouver.

Mr Speaker ki diferans ant non sa parti ki'n touy dimoun e fer disparet dimoun ler i ti fer koudeta le 5 Zen 1977? Les mwan eksplike sa.

Sa letan, tre *peu* pep Seselwa ti konpran Angle e se sa rezon dimoun ti krwar dan tou sa bann mansonz ki zot ti dir. Akoz *SPUP* ti *stand* pou *Seychelles People United Party*.

I ti fer pep Seselwa krwar ki i pe vin inifye pep Seselwa pou tir prensip gran blan, kan saler i ti anvi kas e detri lafanmir Seselwa, zis parey lafanmir Desnousse dan mon distrik i ankor tromatize avek zot atosite.

La dernyerman in vin avek menm latrap e apel zot lekor *US* ki vedir *United Seychelles*, pou fer krwar ki zot pe vin inifye Seselwa e dir koste Seselwa, san ki zot mazin ki mazorite pep Seselwa i konpran Angle konmela e pa pou tonm dan zot latrap en dezyenm fwa.

E finalman zot in tonm dan zot prop latrap e perdi tou pouvwar dan sa dernyen eleksyon.

Mr Speaker kales kase ki Prezidan pe koz lo la, zot konnen lekel sa kales kase? Me se *US* li menm kales kase. Ki mannyer ansyen Gouvernman *US* ki'n la pou plis ki 43an napa en dokimantasyon? Dan mwens ki 100 zour ler zot get lakonplisman sa nouvo Gouvernman dirize par lekip *LDS* solid, zot fristre zot araze, zot tou zot menm.

Me malgre nou dan, nou annan lespwar, akoz nou Prezidan i en Prezidan ki pa zanmen les tonbe alor in reisi, e nou, i pa'n gannyen, e in dir nou ki i pou reisi e nou pou ganny laviktwar lo *COVID!*

Mr Speaker, mazorite nou pep in perdi konfyans dan sa ansyen Gouvernman *US*, zot bann dirizan ki'n abiz e vyol konfyans pep Seselwa.

Prezidan in fran e onnet e dir nou vre leta nou Nasyon e pou la premye fwa dan Sesel en Prezidan ki'n ganny elekte par lepep, in dir son pep vre laverite e dir keksoz mannyer i ete.

Pa tou laverite ki zoli pou tande, malgre ki serten pa oule aksepte, ki se zot ki'n kontribye e ede pou abiz nou resours zis akoz zot in met politik dan tou keksoz!

Prezan zot zis parey bann bandi, bann abizer ki pe koz mansonz devan Lakour zis akoz zot napa okenn pitye, ni remors pour zot viktim, kan tou laprev i la. Pep Seselwa pe demande. Kan ki sa bann kriminel pou rann kont?

La mon zwenn ek Prezidan pou dir Komisyon Anti-Koripsyon konmans anmenn rezilta, akoz zot pe ganny R1.8 milyon ki sorti dan sa menm kof ki \$50milyon in ganny perdi anba gidans *SPPF/ Parti Lepep*, zot apel zot lekor *United Seychelles* konmela! Si sa Komisyon pa delivre wi, pa vo lapenn zot egziste!

Mr Speaker, mwan osi mon en peser, me mon leker i fermal ler en dimoun i servi linosans e linyorans en lot dimoun zis pour son prop benefis.

Permet mwan fer referans ankor dan sa Liv Lavi. Sa i mark sapit 9 vers 33 a 35. Mon *quote*, "Zot ti ariv Capernaum, kan Zezi ti dan lakaz, i ti demann zot, ki zot ti pe diskite dan semen?"

Zot ti reste trankil, akoz dan semen zot ti pe diskite ant zot, pou konnen lekel ki pli enportan parmi zot. Alor, Zezi ti asize e apel son 12 disip. I ti dir zot," Si en dimoun i oule vin premye, fodre i vin dernyen e i

fer li serviter tou dimoun." *Unquote*.

Mr Speaker, sa i en mesaz ki tou dirizan enkli mwan menm nou merit mazine toultan e met an pratik. I en mesaz ki Prezidan in met bokou lanfaz lo la, akoz i pou ed nou tir politik dan servis piblik e annan en leker pour sa dimoun ki vreman dan bezwen. La i fer mwan mazin sa valer konpasyon ki ladministrasyon avan ti napa ditou.

Mr Speaker pile *LDS* in fini pile e rezilta se nou'n fini roul sa gro ros e zet sa Gouvernman enkonpetan ek lafanmir gro dimoun dan La Rivière Anglaise ater!

Se par pile ki ozordi pep Seselwa in kapab konn vre leta pei. Akoz Gouvernman aktyel pe met lentere son pep an premye e pa politik pou ganny en pozisyon Prezidan dan son parti.

E mon le fer en lapel avek tou zabitan La Rivière Anglaise, enkli mon bann aktivis, konpran ki, mwan Andy Michel Labonte, mon pe vin travay pou tou zabitan e pep Seselwa, akoz se sa ki mon'n ganny elekte pou fer e se sa ki mon Prezidan i anvi vwar.

Mr Speaker, mon bouz lo en lot size. Mon osi mon pa krwar dan paresez e

vagabonnen. Prezidan in dir ki prensip travay dir i merit vin nou moto.

E mon ti vreman apresye ler dan son *interview*, Prezidan ti dir avek son pep ki, avan zot vin tap laport *Welfare* fer sir zot inn fini tap laport Biro Lanplwa. Akoz tro bokou labi in arive dan lepase. E in ariv ler pou *mindset* nou sitwayen sanze e revin sa pep travayan parey avan.

Minis Finans dan en konferans lapres in dir ki i annan 30 *Scheme* benefis anba *ASP*. Sa pa akseptab avek en Bidze par lao R1.5bilyon san okenn bon gidans. Sa i merit ganny revwar imedyatman la ki Prezidan in fer kler ki *ASP* i merit zis en soulazman tanporer.

Mr Speaker 15 mil *GOP* pa akseptab, ler nou annan de 100enn sitwayen ki lo program *URS*! Me ki parey Prezidan in dir ankor sa pa merit vin en zafer permanan, parey sa ansyen Gouvernman in fer zot krwar ki *URS* in vin *UPS*.

Mr Speaker Prezidan larepublik Sesel in dir ki nou dan negativ e nou bann profesyonnel parey Mr Peter Roselie e Ms Ingrid Sinon in dir nou, granmoun i dir, nou pa kapab fouy trou pour bous

trou, espesyalman la ki *US* in kit en kof vid pour pep Seselwa!

Mr Speaker Mr Roselie i kontinyen, i dir nou, “Ki letan delo pa pe antre dan ladal, si ou sey kree delo i kapab vin *cancerous*.” E se sa kanser ki Gouvernman avan in kree. Me parkont, nou bezwen kontinyen ed bann vre dimoun ki dan bezwen.

Mr Speaker la ki nou dan en pandemik global e deviz etranzer ki pa pe antre dan nou lekonomi pei. Mon zwenn ek Prezidan ankor pou reget lo sa size lenportasyon. I annan bokou komodite ki pa esansyel e nou pa bezwen enporte.

La mon mazin dile koko dan *can*, pake *chips* bannann sorti dan Lenn, pake gato *swiss roll*, serten legim ek fri ki nou kapab gannyen lokalman e i annan bokou lezot ankor. Annou ankouraz nou pep pou vin pli inovativ e promot nou prodwi lokal.

Mr Speaker mon osi krwar fermeman ki sa bann *retailers* ki pa pe pey zot *tax*, kan zot in fini anmas sa *VAT* avek pep Seselwa, bann aksyon sever i merit ganny pran avek zot.

Mr Speaker, la mon pou bouz lo en lot keksoz ki mon vreman konsernen avek, e sa zafer lakaz. I en gro demann

dan Sesel malgre ki mon'n tann Prezidan koz lo *part payment*.

Mr Speaker permet mwan al pli an detay, napa la transparans dan sa sistenm pwen. E Gouvernman avan in fer nou bann zenn krwar ki nou bezwen fer en trale piti pou nou vin lo lalis priyoriter.

En bon sitwayen i bezwen planifye son fanmir aköz en etidyan pa kapab *study* apre ki in fini *seat* son legzanmen, aköz i pou'n fini *fail* sa legzanmen.

Mr Speaker nou pa kapab fer 8 *unit flat 2* lasanm apre promet plis ki 60 zabitan lakaz. Sa i apel malonnet de lapar Gouvernman *US* e ki ozordi leta lespri nou pep pa anpe.

Menm apre ki en zabitan in esper plis ki 15an pou ganny en lakaz. Finalman son bi i monte i fer son *saving* aste son bann meb. Gouvernman *US* zot move planifikasyon zot met en gro tenk delo dan plafon.

Dan 1er bomaten ouswa ler sa dimoun i sorti travay pou vin repoze, tenk delo in deborde oubyen rakor in kase e mouy tou son defreye de tou dan son lakaz. En legzanp tipik sa kales kase, se sa bann *condominium* ki sa bann prop profesyonnel in aste anler Union Vale.

Mr Speaker, se sa leta ki *US* in met nou pei ladan. Mon osi krwar ki term referans sa

bann proze Pti Payot fodre ganny revize. I byen ki nou fer sir ki nou bann trwazyenm-az i ganny zot konfor.

Me mon pa konpran aköz nou konstri en lakaz pou en dimoun aze, ler i deza annan en gran, gro lakaz lo son non e 6 mwan apre i mor. En lot manm son fanmir i erit sa nouvo fwaye san ki i kontribye en sou.

Mon krwar sa ki erit sa nouvo fwaye i merit pey Gouvernman son larzan ki in depanse pou konstri, e koumsa Mrs Paul Annis ek Ms Lorna Lesperance anler dan leo Ma Joie ava kapab ganny asiste zot osi.

Mr Speaker mon'n tann Prezidan koz lo koripsyon. I vre ki sa i partou kote. Ler mon get sa Gouvernman avan in anbet nou pep ankor dan tou fason, Zis get sa zafer koup pye dibwa.

Ki mannyer ou plant en pye fri lo ou propriyete, ou les li byen gran, me ler gro divan i pase, sa pye dibwa ki ou'n plante ou menm i tonm lo ou lakaz, se Gouvernman ki bezwen peye pou koupe e menm repar ou lakaz kot in andomaze? Mon krwar nou pep i bezwen vin pli responsab parey Prezidan in dir. Annou vin *proactive* osi.

Apre gro garson dokter i dir ek medya parti *US* i en parti

progresiv e *LDS* i en parti liberal. Menm parey ou fer en miray san permisyon *Planning*, me, ler i ariv en dezas sa Gouvernman ankor i bezwen peye.

Mr Speaker tousala se labi lo resours, e rezon ki zot in fer sa se, ler ou get tou sa bann pti kontrakter ki pe fer sa bann louvraz, se zot bann dalon sorti dan parti *US*. Ankor politik in pran plas dan tou keksoz!

Mr Speaker sa fodre arete tou de swit. Pep Seselwa annou pran nou responsabilite, akoz *DA* ek *MNA* pa kapab ganny maltrete zis akoz move ledikasyon de lapar sa Gouvernman *US*.

Aprè sa gro garson dokter i dir ankor, “nou pe vin en sistenm bef dan disab sakenn vey son lizye.” Mr Speaker en size serye e sansib.

I vre ki Gouvernman in sanze e nou annan konfyans total dan kapasite nou bann Minis pou delivre.

Mon kontan ler mon ti tann Prezidan dir avek lapres ki Legzekitiv i bezwen pran lord avek sa Gouvernman aktyel ki dirize par Prezidan Wavel li menm. E dan son *SONA* in koz, lo fodre ki nou koup birokrasi ki mon 100poursan dakor avek.

Mr Speaker permet mwan pou al pli lwen, ankor fodre tir

politik dan zwe. I fer lapenn ler nou get serten sa bann *PS* ek Direkter ki'n la pou plizyer lannen e zot pa oule konpran ki i nepli ler pou zot kontinyen met retar, dan bann devlopman e trenn zot lipye.

Gouvernman Lokal in ganny site koman en legzanp. La mon mazin sa madanm ek sa msye, ki krwar i ankor kapab fer lavi son prosen difisil, akoz li i pou sey diform tou direktiv ki nouvo Minis i donn li.

En legzanp tipik se en proze kot English River santral pou met koltar lo en pti morso semen lot kote Sant Lasante La Rivière Anglaise, kot plizyer lannen zot ti'n sipoze mete, me zot ti deside fer lavi Mr Hugh Hoareau, malere zis akoz i pa'n zanmen krwar dan sa ansyen Gouvernman.

Kan tou teknisyen in vizite, me li sa madanm dan biro i koz zis lo son *Master Plan* pou en development pour sa teren. Me nou pa zanmen war sa *Master Plan*. Mon demande eski i vremen egziste sa *Master Plan*?

Fodre zot konpran ki nouvo ladministrasyon pa krwar dan sa filozofi ek nou ou pa ek nou ki ansyen Gouvernman ti krwar ladan.

Leta nou nasyon pa ti an bonn sante e Seselwa i ankor pe

soufer. Mon osi mazin sa madanm ki pe zis anmar lanmen nou bann operater *Daycare Center* ek nou bann *child minder* avek son bann standar pa aplikab dan nou kiltir Seselwa.

I vre nou bezwen annan standar, me parfwa mon demande, si ler i ti zanfan ti egziste *Daycare Center* lo sa nivo, ki petet in fer li ozordi ganny tou son lentelizans.

En lot legzanp ankor, se mon pa kapab aksepte ler sistenm *sewage* i zis 5 met o bor *housing estate* me i pa konekte avek, en legzanp tipik se Vilaz Lespoir. Zis nek *septic tank* i deborde e koz en lenkonvenyan pou tou zabitan. Ankor depans larzan sa pep pou ponpe de ponpe.

La mon pe fer lapel avek bann gro sef dan Departman Gouvènmantal ou parastatal, ki ganny en Bidze atraver larzan piblik pou pran zot responsabilite.

Akoz zot ganny byen peye e mwan ki pe reprezant lavwa mon distrik, mon anvi dir zot ki mon pou regard byen zot Bidze, akoz sa bann gro sef zot kontinyen *enjoy* zot gro pozisyon ek saler, me pep Seselwa enkli sa bann ki'n lalit pou fer sa sanzman i ankor pe soufer.

Sa i enkli *DRDM*, ki ler ou telefonn zot pour okenn evantyalite, zot dir sa zabitan telefonn biro *DA*. Silvouple, si ou pa kapab delivre sed la plas pou sa ki anvi travay. La mon oule felisit *Red Cross* avek en pti gin resours ki pe fer sitan bokou, kontinyen lo menm laliny Ms Esparon avek ou lekip.

Mr Speaker Prezidan in pronons son lekor lo nouvo *Policy GOP* lo travayer etranze. I vre, mon vremen apresye me mon pou al pli lwen ankor. In plis ki ler ki nou get dan *welfare* nou travayer Seselwa, akoz nou pa kapab toultan vwar etranze pli byen pase ki nou Seselwa dan nou prop pei.

Ler zot vin Sesel, zot ganny defreye de tou, bel lakaz, gro loto, gro isi, gro laba an plis en gro saler, lekol peye pour zot zanfan. Me nou pti Seselwa nou ganny *peanuts*.

Aprè nou dir Seselwa i pares. Mr Speaker, dan en Konferans Lapres nou'n tann koz lo 25mil pour lakaz zofisyè Zidisyer konpare avek 1700 pou malere.

Me se sa, tousala se ansyen Gouvènmàn *US* ki'n soutire tousala! Dir Mersi Prezidan Wavel Ramkalawan ki'n vin sov nou pei dan tousala, akoz i en zonn ki pa

zanmen les tonbe e ki pe vin repar sa kales kase!

Mr Speaker, Prezidan in dir nou ki i annan 108 *Board*, ki kout Seselwa R36milyon, lekel ki ti kree tousala? Zis pou donn zot bann dalon plis larzan.

Ankor politik dan zwe. I byen ki Msye Prezidan pe al revwar e koup kot i merite, e bann travayer Gouvernman ki *attend Board* dan letan travay pa merit okenn *allowance*.

Mr Speaker lo size drog, mon krwar sa dernyen *warning* ki msye Prezidan in donn sa bann eskobar in enn ki kler, fran, direk e byen lontan en Sef D’Eta ti’n merit fer.

E la mon demann bann manm *ANB* e mon dir zot ki boul i dan zot kort. Akoz bann paran ki pe soufer la deor i anvi war sa bann gro eskobar ganny met deryer baro anler Montagne Pose!

Drog pa kapab kontinyen vann partou dan lari, pli move ki pwason lo bazar. Zis al kot ansyen laboutik Jotty o bor Krishnan Mart la konmela, i pou koz pou li menm. Mon napa nanryen kont sa ki fim son pti lapay mwan. Me sa eroin e lezot *hard drugs* ki nou merit eliminen enn fwa pour tou.

Mr Speaker mon osi anvi ki nou sant lazennes La Rivière

Anglaise i retourn pour lazennes non pa pour *accommodate* sa bann ansyen kandida *MNA* Lepep ki ti *fail* dan eleksyon 2016!

La i fer mwan mazin lontan sa bann bon *sportsmen* ek *sportswomen* ki ti sorti dan *RA*. Mon mazin parey Ms Lina Lestranger, Donal Monnaie, gran Pierre, Leonel Ravignia, Brian Ravignia, Georges Ravignia e Sandwick Louis ki fek kit nou tar lannen pase.

Mon annan lespwar ki ler nou elimin drog, nou pou refer nou sport, pa zis lo nivo distrik me lo nivo Nasyonal. Pa oublie ki lalkol osi i en problem. Me *comme* dir sanson i dir, ‘I annan pozitiv la ater.’

La mon mazin parey ankor enn fwa ki sorti dan mon distrik Denis Rose dan ladans, Axcel Ravignia dan foutbol e bokou lezot ankor.

Mr Speaker la mon anvi dir zabitan La Rivière Anglaise, ki mwan Andy Labonte mon pou fer tou sa ki mon kapab ki nou Sant Sosyal, i retourn propriyete Gouvernman e reste touzour pou zabitan La Rivière Anglaise.

En parti politik pa kapab aste nou Sant Sosyal dan kasyet an sousekre. E nou pa kapab vwar en *MNA* ki’n ganny defet dan dernyen eleksyon

kontinyen fer bay, kan ni en bazar i pa'n kapab donn son peser La Rivière Anglaise!

(APPLAUSE)

HON ANDY LABONTE

Mr Speaker sa Stad Lanmizik pa zabitan La Rivière Anglaise ki ti demande pou ganny konstri lo nou laplenn football.

I ti sipoze *sound proof* me zis zour i fer *trial*, mwan dan leo Ma Joie mon pa ti kapab dormi! Petet nou ava itiliz li pour bann artis fer bann lezot aktivite. Me pa bann gro selebo akoz sa pou zis vin en polisyon tapaz dan La Rivière Anglaise.

Mr Speaker lo size *Air Seychelles*. *Air Seychelles* i vremen en lafyerte pou tou pep Seselwa. E mwan personnelman mon ti ava fodre vwar *Air Seychelles* kontinyen anvole. Me mon pou les bann *expert* ek bann dimoun ki annan leksperyans dan kreasyon *Air Seychelles* fer analiz pli detaye lo la.

La mon mazin *Captain Plows* ki sorti dan mon distrik. Premyerman i enportan ki *Air Seychelles* i retourn 100 pousan pou Gouvernman Sesel ou oubyen bann partner Seselwa. E la mon demande ki

en odit detaye i ganny fer depi son legzistans ziska ozordi.

MR DEPUTY SPEAKER

I reste ou 3 minit Onorab.

HON ANDY LABONTE

Mon ava kontan, e mon ti ava kontan ki en *body* par bann *expert* i vremen annan lenterer *Air Seychelles* i ganny kree pou get dan sa sityasyon.

Mr Speaker, mon annan sitan bokou laverite pou mwan dir lo leta aktyel mon pei e mon distrik, me letan i liminite. Mon osi annan lespwar ki apre ki nou'n ganny laviktwar lo sa pandemik *COVID-19*, Sesel pou re fleri e Parti *US* pou'n disparet lo lasenn politik.

Pou konklir mon anvi dir tou zabitan La Rivière Anglaise ki sa listwar ki nou'n fer le 22, le 23, le 24 Oktob 2020 pou reste vivan dan liv listwar.

Akoz pou la premye fwa apre retour miltiparti dan sa pei, sa pti dimoun parey mon ti'n ganny dekrir par sa lafanmir bann gro dimoun, in kapab zet zot lanpir ater!

Mon anvi fer en pledwari avek tou zabitan pou ekout mesaz nou Prezidan. Annou met politik de kote e ralye ansanm e travay dir pour re batir e inifye nou distrik e nou pei.

Atraver rekonsilyasyon dan linite nou ava fer nou kominote vin en vre paradi, kot bann bon valer parey lanmour e la spirityalite i a vin nou lapriyer toulezour.

Akoz tou zanfan Sesel i annan en responsabilite pour zwe dan rekonstriksyon sa nasyon. Ki Bondye papa i retir tou sa bann retar e blokaz ki dan nou semen, lo non son garson byen *aimé Zezi Christ*. Mersi Mr Speaker.

MR DEPUTY SPEAKER

Mersi Onorab. Mon rekonnèt ki i annan 2 Manm ki zot lanmen i anler. Onorab Ghislain.

HON CHANTAL GHISLAIN

Mersi Mr Speaker, bonzour tou dimoun. Mr Speaker zis en pti pwen klarifikasyon. Lefe ki Onorab Labonte ti pe eksplik nou ki manner i pronons Msye Prezidan, non Prezidan, Ramkalawan, non pa 'Wamkalawan.'

Mon ti ava osi sey dir li, demann li ki manner i prononse, si Wavel ouswa Wavel? Akoz *all along* in kontinyelman dir Wavel. Mersi Mr Speaker.

MR DEPUTY SPEAKER

Onorab *Leader* Lopoziyon.

HON SEBASTIEN PILLAY

Mersi Mr Speaker. Mr Speaker mon'n en pti pe konsernen avek en *statement* ki Onorab Labonte in fer. Nou kapab eskiz li i pa'n pronons non Prezidan byen. Me mon konnen Prezidan i apel Prezidan Wavel Ramkalawan. Nou a eskiz li pou sa. Me dan son ladres in koz lo en madanm ki'n ganny laz e ki in dir taler nou pou al war li en pti kou.

Mon ti anba lenpresyon ki Minister Lasante in donn gidans kler, ki si ou pa sorti dan en fanmir, ou pa kapab al dan en lot. So petet ti ava bon ki bann Manm, pa lans en mesaz, petet ki en pti pe *confusing* pou piblik an deor. Akoz piblik pe ganny demande pou *abide* par bann regilasyon ki Minister Lasante in donner. Mersi Mr Speaker.

MR DEPUTY SPEAKER

Onorab *Chief Whip* LDS.

HON SANDY ARISSOL

Bonzour Mr Speaker, bonzour tou bann Manm, bonzour tou dimoun ki a lekout. Bonzour sa madanm ki ganny lanniverser La Rivière Anglaise.

Mr Speaker mon krwar dan term Kreol ler nou dir nou pe al war en dimoun taler, nou kapab donn li en *phone call*, nou kapab anvoy en mesaz atraver son zanfan.

Tousala Sesel i form parti sa langaz nou pe al vwar li taler. So annou pa perdi letan Lasanble, pou nou koz lo bann *petty things* parey zot in komans fer depi Lasanble in komanse. Mersi bokou e bonn zournen bann ki pe ekoute.

(APPLAUSE)

MR DEPUTY SPEAKER

Nou'n komans lo en bon not. Sertenman sa ti en pwen mon krwar ki *Leader* Lopozisyon ti kapab leve personnelman avek Onorab Labonte. Be selman lo kestyon non Prezidan.

I vre ki mon'n note, ki letan Onorab Vidot ti pe koze, son prononsyasyon in annan en *slip* nou apel sa. E Prezidan son non, nou tant pou, dan Sesel normalman bann non, nou tant pou pran en prononsyasyon Franse avek la mazorite bann non prop dan Sesel.

Me son non li i pa en non frankofonn. Alor toultan nou bezwen pronons li lo en baz Angle, Wavel Ramkalawan.

So, pou benefis bann Manm e pou benefis piblik Seselwa, nou tant pou pronons son non toultan lo en tonasyon Angle, konpare avek bann non ki nou plito pronons bann non prop dan non frankofonn Sesel. Mersi pou sa.

Nou pou *break* aprezan e nou pou retourn l 1er bomaten. Ziska prezan nou pe al byen, alor annou kit li koumsa ziske taler. Mersi.

(BREAK)

MR DEPUTY SPEAKER

Welcome back tou bann Manm Onorab. E ankor enn fwa bonzour tou bann dimoun ki fek zwenn nou. Nou pou kontiny nou deliberasyon, reaksyon bann Manm lo Diskour Prezidan Larepiblik lo Leta Lanasyon ki ti prononse Vandredi.

Prosen enterven an lo lalis se Manm Proporsyonnel LDS. Onorab Naddy Zialor.

HON NADDY ZIALOR

Mersi Mr Speaker. Mr Speaker, Koleg Manm Onorab, Lepep Seselwa, bonzour. Le 25 Oktob, 2020 Lepep Seselwa ti vir en nouvo sapit dan sa paz apele politik dan nou listwar. Apre 43an pep Seselwa ti pran en

desizyon dan son gran mazorite pou pas en mesaz byen kler. Ki nou anvi donn Sesel en nouvo souf, nou anvi donn Sesel en nouvo komansman e wi nou anvi donn Sesel en nouvo Dirizan.

Pou bokou lannen bann dirizan in vin devan Lepep Seselwa avek bokou promes. Promes e promes. Me pou premye fwa nou'n vwar en Dirizan vin devan sa pep avek fransiz. Dan en fason in vin dir avek Lepep Seselwa keksoz ki nou bezwen tandè. Annefe in vin dir avek Lepep Seselwa son vre realite.

Malgre ki serten i vwar sa koman en larogans, mwan Mr Speaker, mon'n vwar sa koman en *wake-up call*. En *wake-up call* pou tou Seselwa. Pou nou sorti dan nou *comfort zone*, pou nou aret krwar ki keksoz i *business as usual* e pou nou arete avek sa latitud lese fer.

Bomaten mon pou tous lo detrwa size ki Prezidan Larepiblik in koz lo la dan Diskour Leta Lanasyon, sa se linite koman en pep. Lalit kont drog e koripsyon e en size pertinan se *welfare* avek lanplwa.

Mr Speaker, linite se lakle devlopman en pep. E bomaten mon anvi adres Lepep Seselwa dan sa fason. Pep Seselwa

eleksyon i vini, eleksyon i ale. Kanpany i vini, kanpany i ale. Prezidan in ale, en lot in vini. Me nou, nou reste koman en pep. Sa vwazen ki reste obor ou, sa manm ki en manm ou fanmir, sa koleg ki travay avek ou, menm si i annan en divers lopinyon politik, i reste ou vwazen, i reste ou koleg, i reste ou manm fanmir.

Mon mesaz, e sa *wake-up call*, se annou pa les nou ganny konfize avek serten ki zot menm zot dan zot prop konfizyon. Sesel ozordi pe demann avek nou pou nou travay ansanm koman en Nasyon. Ki swa ou rouz, ki swa ou ble, nou anba en sel paviyon.

En lot size ki depi yer e depi Vandredi e bomaten nou'n tann koz lo la tre fortman se bann trafiker drog. E la mon anvi dir kot nou vwar serten lespri konfizyon ki nou anvi senm avek sa pep. Nou pe donn lenpresyon ki trafiker drog fek annan pandan sa 89 zour. Kestyon ki mon demann mon lekor, ti la nou ti konnen lekel bann trafiker, be ki nou'n fer pandan sa 4an e pandan sa 43an ki nou'n la?

Ki zot in fer pou zot elimin sa bann trafiker, ki ozordi zot pe dir avek nou ki zot pa anvi *warning*, me zot anvi aksyon.

Aksyon ti merit fer bokou letan pase, Mr Speaker.

Permet mwan ozordi adres sa bann trafiker dan en fason direk. Eski zot leker pa fermal, ler zot vwar zot prop frer ek ser pe soufer koman viktim drog pandan ki zot, zot pe anrisir zot bann lanpir? Eski zot mazin sa paran ki son larm pe koule toulezour, akoz li osi in vin viktim son prop zanfan?

E la mon pe demann avek nou Lasanble pou nou zwenn ansanm dan en fason, pou pa fer konfizyon e divizyon, me senm en mesaz kler ki nou dan sa Lasanble nou pa pou toler trafiker drog. Sa mantalite konfizyon annou arete silvouple.

Dan plas ki nou asize e asasin karakter en endividi, zis akoz azanda personnel, oubyen azanda politik, annou zwenn ansanm e konbat kont sa fleo si vremen nou senser pour Sesel.

Bokou koze in ganny koze lo rehabilitasyon. Lo *methadone*. Annefe *methadone* ti en topik politik. Me ozordi anba nouvo Gouvernman, mon pe demande ki annou fer en *assessment* e vwar konbyen dimoun ki'n lo program rehabilitasyon *methadone* pandan sa dernyen 2an? E dan sa 2an, konbyen zot ki'n sorti, rehabilite e ganny remet dan sosyete san ki zot in

bezwen retourn a plizyer repriz lo program *methadone*?

I kler ki malgre in annan politik lo sa size, apre sa 89 zour, program *methadone* i ankor pe donner Sesel. Me parkont kont mon pe lans en lapel avek Gouvernman pou rod bann lezot mwayen rehabilitasyon alternativ apart ki program *methadone*.

Mr Speaker, *welfare* ek lanplwa in en topik ki'n ganny koz bokou lo la isi dan nou Lasanble e mon ti a kontan mon osi aport mon kontribisyon. E la ankor enn fwa fodre mon note ki nou ankor pe senm konfizyon avek Lepep Seselwa. Prezidan Larepiblik pa'n dir i pe al aret donn *welfare*. Prezidan Larepiblik, pa'n dir i pe al aret asiste dimoun pou ganny lanplwa. Sa ki Prezidan Larepiblik in dir, se ki *welfare* i bezwen pli byen restriktire e donn dimoun ki merite.

E fodre ki nou pep i konpran ki nou pa anvi fer zot vin depanse, me nou anvi atrap zot lanmen e montre zot komanter i marse, pou ki demen zot osi zot vin endepandan. En dimoun pa kapab reste lo *welfare* pou 2an.

E sa i fer mwan vin lo program *Unemployment Relief Scheme*. Yer swar nou'n tande lo televizyon ki apartir Mars,

Unemployment Relief Scheme pou nepli egziste e apartir Fevriye, sa *allowance* pou koupe pou vin R3,500. Mwan ki en dimoun ki'n travay dans a departman, san fer li dan en fason konfli lentere, mon krwar i enportan ki nou donn en oriyantasyon akoz ki nou'n ariv dan sa leta ozordi.

Ki ti bi *Unemployment Relief Scheme*? Ki son bi ozordi? Eski vremen in ganny *manage* dan en fason ki soutenab. Ouswa in vatevyen, o e ba, o firanmezir, dapre kondisyon oubyen soutenab pou Gouvernman presedan.

Mr Speaker, nou konsyan ki pou annan 1700 dimoun ki pou afekte avek sa desizyon. Me nou osi konsyan ki *Unemployment Relief Scheme* se pa en *permanent employment*. O komansman atraver ou Mr Speaker, letan ki *URS* ti ganny met an aplikasyon an 2018, son *URS Act* ti kler, se ki okenn dimoun ki antre lo *URS* i antre atraver *welfare* e son peryod letan i 6 mwan a 1an selman.

E pandan sa letan sa resipyan ki antre lo *URS* i sipoze pa ganny plis ki minimonm *wage* e la ti annan diferan fason travay. I annan ki ti lo *casual* pou *half day*, apre i annan ki ti lo en *fix term allowance* pou *full day*. Me kestyon se, eski

Gouvernman in zer li dan en fason soutenab?

Nou'n vwar ki pandan sa dernyen 3an olye ankouraz dimoun pou fer *URS* vin sa pon kot i antre, olye ki i asiz dan lakour i ganny en *welfare* anba *unemployment benefits* pou 3mwan, sa *welfare* i ganny ranplase par *URS*, sa dimoun i al travay e i ganny peye.

Me i pa neserman le ka. Pa tou ka ki'n mars koumsa. I annan dimoun ki 3an i ankor lo *URS*, Mr Speaker. Se pousan rezon nou vwar nou dan sa sityasyon. I annan landrwa travay ki'n kontinyen fer promes avek sa bann dimoun ki zot pou ganny anploye. Tout an konesans ki dan Gouvernman bann pozisyon in *freeze* e la nou vwar nou dan dilenm avek sityasyon ekonomik. Kestyon se eski nou kapab kontinyen fer sa program vin soutenab?

Parkont mon pe lans en lapel avek Departman Lanplwa. Dan sa legzersis ki zot pe fer pou vann *vacancy* pou ranplas Seselwa. Annou fer ki pandan sa 2 mwan ki pe vini, sa 1700 dimoun ki lo *URS*, se zot ki vin priyorite pou *full time employment*. Sa i ava ed nou pou gradyelman retir zot lo program. Me sa ki pli enportan se ki nou pep e nou dimoun i bezwen konpran ki la, ler ou

ganny en louvraz pou reste dan travay.

De lezot benefis ki mon ti a kontan tous lo la e aport mon kontribisyon an se ki konsern *welfare*, se bann *home carers* avek *disability* e *invalidity benefits*. La ankor i annan serten travay ki bezwen ganny fer pou get dan *welfare* bann *carers*. Sirtou bann paran ki travay avek zot zanfan dezabilite 24 lo 24. Bann paran ki vwar zot, zot in bezwen kit zot *full time employment* e sakrifye zot profesyon, pour ki zot kapab pran ka avek zot zanfan. Parske i sel dimoun ki sa zanfan i kapab *mingle* avek e konpran pli byen.

Me lefe i reste ki in annan labi an se ki konsern *carers*. Pandan ki mon pe koze i fer mwan mazin en sityasyon kot en dimoun i ganny anploye koman *carer*. I leve bomaten, i pran son zanfan i met dan bis, bis i anmenn zanfan kot lekol. Sa pran li pou 8er tan i kot lakaz. Me selman i travay *carer* avek son zanfan.

Ouswa i fer mwan mazin sa sityasyon kot sa dimoun aze, li i Anse Boileau, *carer* i reste Port Glaud. Me figir *carer* i ganny vwar kot dimoun aze zis 1 fwa par semenn. Lafen dimwan i ganny son lapey plen. Mr Speaker, sa bann kalite

mantalite i sanmenm keksoz ki nou bezwen revwar dan sistenm *welfare*.

Pandan ki mon pe koz lo sa size, dapre statistik Lazans Proteksyon Sosyal, i annan 1511 dimoun ki lo benefis envalidite. 1902 dimoun ki lo benefis dezabilite.

Mr Speaker, mwan mon en dimoun ki senserman krwar ki bann dimoun ki otreman kapab, i bezwen ganny loportinite pou li *empower* son lekor e viv en lavi endepandan. Dan sa konteks mon krwar ki i annan travay ki bezwen ganny fer pou regarde, si serten bann dimoun ki lo sa benefis i annan posibilite pou zot ganny *reskilling* e zot rebran zot lavi dan en fason endepandan an menm tan anmenn plis *income* kot lakour.

La i fer mwan mazin bann legzanp kot mon bann koleg i leve dan bomaten, i al travay. Alor atraver program *URS*, nou met zot. Promes ki ti ganny fer ek zot, se ki zot pou ganny anploye. Mr Speaker, ziska ozordi sa bann dimoun zot ankor lo program *URS*. E la mon mazin Andy, mon mazin Marie-Antoinette, mon mazin Rico, mon mazin Ibrahim. Mon swete ki la ki Minister Lanplwa in dir regard dan posibilite pou

anpoye, sa bann dimoun i ganny pran an konsiderasyon.

Ler mon dir ki nou bezwen regard posibilite pou *reskill* nou bann dimoun ki en fason ou en lot zot in vwar zot dan en sityasyon kot zot ti pe travay, me apre zot in *acquire* serten dezabilite. I fer mwan mazin Ruben, Walter, Mary. Ki zot, zot dir avek mwan, “Naddy mon anvi travay, me partou kot mon ale laport i fermen.” Mon swete ki avek lapel ki pe ganny lanse, bann anplwayer i pa regarde dezabilite sa bann dimoun, me zot abilite, Mr Speaker.

Osi lontan ki nou kontinyen met dan lespri nou pep ki nou kapab depan lo Gouvernman, nou pep pa pou progrese Mr Speaker. Nou pou bezwen *empower* zot, donn zot, atrap zot lanmen e montre zot ki mannyer nou fer pti pa, pti pa pou nou kapab marse.

Pandan ki mon pe fer mon lentervansyon, mon ti a kontan tous servis piblik. Mon zwenn avek Prezidan Larepiblik pou felisit nou bann *public servant* ki reste devoue anver travay Gouvernman. O komansman mon’n dir Prezidan i ale, en lot i vini. Eleksyon i ale, en lot i vini. Me Gouvernman Sesel i reste.

Me i malere, i maler pou dir ki i annan serten ki ankor krwar ki parti i Gouvernman e

Gouvernman i parti. Sa pti group, zot ankor annan en lespri *undermine* servis piblik. Mon lans en lapel avek zot, ki Gouvernman Sesel i la pou deservi tou Seselwa. Sa latitid *boycott*, trenn lipye ouswa rezenbe ant 8er-4er. Mr Speaker, sa latitid i bezwen arete enn fwa pour tou.

Mon lans en lapel avek bann *public servant*. Travay avek zot leker. Travay avek lanmour. Travay avek lekspektasyon pou delivre pou Lepep Seselwa e non pa pou zot pos selman.

Nou’n tann koz bokou lo koripsyon. Mwan mon dir ki enn fwa pour tou, koripsyon pa merit ganny tolere dan bann Lenstitisyon Gouvernman. 2021 i en loportinite pou nou atrap lanmen Sesel e travay koman en vre patriyot.

Mr Speaker, permet mwan pou sezi sa loportinite ozordi dan sa Lasanble avek bokou liminite, pou mwan salye Linyon Demokratik Seselwa. Linyon Demokratik Seselwa in montre mwan, in montre Sesel, in montre lemonn ki en dimoun ki annan abilite, nou bezwen valoriz son potansyel. E osi lontan ki mwan mon kapab travay dan lentere Sesel, mon pou fer li.

Mon pou kontinyen rod fason pou ki enklizivite i reste lo azanda Gouvernman. Ankor enn fwa mon repete, eleksyon i vini, eleksyon i ale. Me Lepep Seselwa i reste. Me sa ki pli enportan, desizyon ki nou vwar nou ozordi, kot nou annan en nouvo Gouvernman e en Lasanble dirize par *LDS*, sete desizyon Lepep Seselwa e nou bezwen respe sa.

Mr Speaker, pou Sesel reisir i bezwen tou son zanfan. I pa depan lo zis en Seselwa me tou Seselwa. Mon napa okenn dout ki si vreman nou travay koman en patriyot e non pa dan lipokrizi, Sesel pou reisi. Bokou koze in ganny koze lo sityasyon *COVID-19*. Mon profit sa lokazyon pou mwan salye bann *frontliners* pou zot devouman e mwan koman en Seselwa mon konnen ki si nou travay ansanm nou pou sorti venker.

E ankor enn fwa mon lans en lapel. Annou aret senm konfizyon. Yer, zot ti dir avek nou annou respe desizyon bann profesyonnel. Ozordi, zot dir avek nou serten desizyon ki bann profesyonnel i dir, i an dout. Sa i senpleman konfizyon.

Pou terminen mon anvri lans en lapel avek tou Seselwa, *be the change that Seychelles need*. Ou ki otreman kapab

annou kontinyen rod fason inovativ pou nou pran plas dan nou sosyete. Ou sa zenn pran *ownership* ou lavi. E ou sa travayer kontinyen donn tou pou ou pei Sesel. Mon annan konfyans ki Sesel pou reisi. Mon annan konfyans ki nou pou reisi. Avek lasazes Sesel e Seselwa pou sorti venker! Mersi Mr Speaker.

(APPLAUSE)

MR DEPUTY SPEAKER

Mersi Onorab. Lasanble i *ok*, nou pou travay ziska 12.30, savedir i annan ankor 2 entervenman. Mon remark Onorab Naidu pe asiz laba deryer. Ou pa pou koz la bomaten selman, lot Onorab ki pou komans met pare pou al deryer se Onorab Bistoquet. Me selman la antretan prosen entervenman lo lalis se Onorab Manm Elekte pou distrik Baie Ste Anne. Onorab Churchill Gill.

HON CHURCHILL GILL

Mersi Mr Speaker. Bonzour Mr Speaker, bonzour tou Manm e bonzour tou dimoun a lekout spesyal zabitan Baie Ste Anne. Avan tou Mr Speaker, menm si mon lofis in fini anvoy remersiman, pour tou zabitan Baie Ste Anne apre ki zot in

donn mwan sa laviktwar dan dernyen eleksyon, Oktob 2020, mon oule sezi loportinite, pou mwan dir tou zabitan Baie Ste Anne, mersi pou donn mwan en lot manda pou travay pou zot, pour sa prosen 5an ki devan nou.

Mersi, pou zot konfyans. Defi pou annan en kantite, me ansanm dan linite, perseverans e avek determinasyon mon konvenki ki nou pou raport laviktwar lo tou nivo.

An menm tan mon le remersye tou bann dimoun ek *PBA* ki'n zwen mon e vin devan an solidarite koman en kominote pou aport nou siport pou Minister Lasante e travayer Lopital Bais Ste Anne. Mersi pou sa zes tre for pou nou distrik.

Mr Speaker, mon konsyan, zabitan Bais Ste Anne i konsyan, ki nou'n pti pei Sesel ozordi i en pei ki pe fer fas avek plizyer gran defi ki demann en zefor kolektif, lo en dimansyon Nasyonal. Nou bezwen koste dan linite, koman en sel nasyon.

An plis e zisteman legzistans lemonn konman en vilaz global i fer ki ozordi nou vwar nou pe bezwen kontribye nou par dan demars lemonn, pou defann son lekor kont en pandemik devaster, mertriye, ki

annan potansyel pou detri laras imen, si bann mezir drastik pa ganny aplike.

Malgre tou, se moman pou pran bann desizyon an fas avek bann mezir nesaser. Tou konsiderasyon i oblize ganny soutenir e balanse, avek finalite pou prezerv e garanti lasante ek lavi popilasyon Seselwa. Tou bann lezot konsiderasyon i vin apre ki nou'n kapab garanti lasante e lavi sa sitwayen Seselwa.

Mr Speaker, nou pa kapab fer okenn konpromi avek drwa lasante e drwa lavi okenn sitwayen. Egalman, mon enplor sak sitwayen Seselwa, sak endividi, sak fanmir pou sakenn pran zot responsabilite. Dan sa fason, ansanm nou ava pe met anba kontrol propagasyon viris *COVID-19*.

Mr Speaker, an fas avek en lekonomi ki gradyelman pe vwar li difisil pou fonksyonnen, Nou'n ekout lanons desizyon ki bezwen ganny pran lo kestyon *Air Seychelles*. Donner lenportans ek konsekans lenpak okenn desizyon, koman en Manm *FPAC* mon sizere ki sa dosye *Air Seychelles* i ganny evalye dan son totalite avek *management* e *Board Air Seychelles* pou ganny bann detay nesaser pou en apersi zeneral lo vre sityasyon *Air*

Seychelles par Komite FPAC. Oubyen vin dan Lasanble pou en sesyon lo dosye konplet *Air Seychelles* enkli zot dernyen raport odit ki'n konplete.

Nou'n ekout lanons program *FA4JR* ki bezwen diskontinyen apartir le 01 Avril. Dan konsiderasyon Gouvernman, sa bann mezir i neserer. Nou aksepte ki pou rezon soustenabilite finansyel pei, i tre difisil. Me i tre enportan ki nou ganny met okouran ki bann mezir alternatif ki Gouvernman i annan pou kontinyen soutenir tou sa bann ptipti, mwayen e gro biznes. Egalman tou sa bann zonn, fanm travayer ki ti pe direktman oubyen endirektman ganny sipor finansyerman atraver program *FA4JR*.

Mr Speaker, mon swete ki Diskour Bidze pa pou manke pou aprofondi nou Lasanble lo sa bann size tre, tre enportan, pou plizyer antrepriz e fanmir travayer Seselwa. Akoz lenpak *COVID-19* lo zil Praslin e La Digue, in fer dega tre konsiderab lo en nivo tre destriktif dan aktivite ekonomik lo sa zil. In dekoulo tre for lo nivo Nasyonal.

Zis semen pase serten pti lotel lo Praslin in fini komans fer *redundancy*, e sa bann *staff*

pe sey rod en lot travay pou zot kapab ganny en saler lafen dimwan Fevriye. Sityasyon i kritik lo Praslin.

En konversasyon i bezwen konmanse ant bann biznes lo Praslin ek Gouvernman pou deside ki zot kapab konpromi lo la, avan lafen Mars pou zot kapab tonm dakor lo en *way forward* donner gravite sa sityasyon.

Mon bezwen met lo rikord pou remersye bann biznesmenn lo Praslin ki kontinyen siport zot bann travayer, pou asire ki zot kontinyen ganny zot lasyet manze pandan sa moman tre difisil. Mon konsyan ki zot sityasyon i tre difisil. Mon pou kontinyen donn zot mon siport dan sa moman eksepsyonnel ki nou ladan lo nou zil.

Mr Speaker, lespwar fitir devlopman ekonomik Sesel, dezormen i bezwen ganny zere dan en fason sistematik oubyen konsekan. Kot nou anmenn plis diversifikasyon dan nou aktivite ekonomik ki tenir kont eksplwatasyon tou nou potansyel lokal. Me non pa, potansyel oubyen dinamik ekonomik ek finansyel lezot pei dan lemonn.

Dan sa konteks preparasyon, langazman ek komitman en lafors travay de kalite, lo nivo Nasyonal i vin en

latas endispansab. An fas avek lanons desizyon pou revwar an totalite sistenm *GOP* dan Sesel.

Pou zil Praslin ek La Digue, mon le atir latansyon Gouvernman ki dan bann program *reskilling*, Praslin i bezwen annan en landrwa kot program *reskilling* i ganny fer pou zabitan, ki bezwen zwenn en tel program e an menm tan zabitan La Digue i kapab partisipe. En landrwa ideal ki sa i kapab ganny fer se dan *Ex-Restoran Touch Down* ki baze dan *building SCAA* lo Erport Amitie Praslin.

Mr Speaker, dan konteks diversifikasyon ekonomik e konsekaman rediksyon nou depandans lo serten komodite enporte, mon pa'n tann koz nanryen lo nou Sekter Lapes, Sekter Lagrikiltir, Lekonomi Ble. I napa nanryen lo rediksyon lenportasyon, lavyann, fri ek legim e plizyer komodite ki Sesel i annan potansyel fer li.

Nou Sekter Lagrikiltir i annan en fon finansman anba *Livestock Trust Funds*, sa fon i annan serten kantite lazan ki kapab ed bann fermye ki dan bezwen, ek zot plan ek zot program ki pou benefisyé kominote e pei an zeneral dan en fason tre konsekan.

Sa lasistans *loan* atraver *DBS*, bokou fermye in ganny ase e dekouraze avek sa kalite prosedir an plas, pou zot kapab ganny akse avek sa *loan*. E sa pe met retar dan nou devlopman agrikol. Pou ede aport sipor imedyat pou sa bann fermye ki dan bezwen ek bann bon program, mon pe demann Minister pou Lagrikiltir pou propoz en revizyon lo sa Polisi akse avek *Livestock Trust Fund* pou fer li relevan avek nou sityasyon ozordi, e pou fasilite akse pou nou bann fermye dan en fason pli kourt dele posib.

Mr Speaker, pe enport ki nou fer dan Sesel, ozordi e dan lavenir. Pe enport ki parti politik ki form Gouvernman e dan *State House*, konsernan mon bann zabitan dan distrik Baie Ste Anne Praslin, osi letan ki i rezonnab e pa ankor ganny donner en solisyon pour sak sa bann fanmir ek zabitan. Zot konsern i reste e preokipasyon pou mon lofis.

Laprev i la dan rikord Sizyenm Lasanble, kot mon'n fer sir ki tou konsern Baie Ste Anne in ganny met devan tel parey ki size labatwar ki pe ganny fer renovasyon. Proze nouvo kordgard ki dan staz final, *fitness trail* ki dan staz finalizasyon. Alokasyon later lo zil Eve ki *tender* pe al sorti tre

byento. *Revizyon Procurement Act* ti sipoze vin dan sa Lasanble depi lannen pase, pou asire ki serten kontra lo Praslin i ganny rezerve pou kontrakter Praslin. Amelyorasyon tapaz ek polisyon ler lo stasyon zenerater *PUC* in en sikse, me i reste ankor travay pou fer lo size re-alokasyon bann serten fanmir.

Mr Speaker, permet mwan pou tous travay bann zonn, fanm dan servis piblik. I enportan ki i lo rikord ki bokou devlopman in ganny fer dan distrik Baie Ste Anne, tel parey ki devlopman lakaz *housing estate* Marie Jeanne, Moulinyen, Salazie, obor kazino kot 307 fanmir in benefisyek zot prop lakaz. 30 fanmir in ganny lasistans later *land bank* e lasistans *loan* atraver *HFC* pou fer zot prop lakaz. 155 fanmir in ganny asiste ek *loan HFC* pou fer amelyorasyon lo zot prop lakaz.

Nouvo por pou *cargo*, nouvo por pou pasaze menm si i reste ankor en pe travay pou fer pou bann *supporting facilities*, basen naze, lekòl Baie Ste Anne, *fire station*. Me i osi en fe ki koman Manm Elekte pou distrik Baie Ste Anne, mon'n fer li mon devwar pou met bokou konsern zabitan Baie Ste Anne devan.

Me mon'n ganny bokou difikilte pou kapab fer bouze serten bann proze tre enportan pou serten zabitan Baie Ste Anne. Menm si mon konsyan prosedir devlopman en distrik i gradyel donnen bann prosedir an plas ;-

Proze pou lafanmir Joachim Marie, Cote D'or. Sandra ek Sonny L'Esperance. Madanm ek Mr Valentin, Anse La Blague. Mrs Margaret ek Joseph Rose. Proze semen Mrs Jeanne an montan *PUC*. Susan Camille ek Donny Lesperance, Ogani Bar. Semen Salazie, Proze pou adres lerozyon kot la fanmir Pool Anse Boudin. Linondasyon Anse La Blague. Gran Lans, Pti Lans, Anse La Blague, pe osi eksperyans bokou difikilte. Ler i annan gran mare disab i mont tro bokou e transport pa kapab sirkile.

Ka bann dimoun ki'n fini pey zot kare later, me zot ankor pe ganny difikilte pou zot ganny zot lavant menm si tou bann prosedir nesaser in fini fer. Proze pou peser Praslin pou ganny zot prop fasilite, in ganny diskite, dan plizyer repriz lo en komite ki mon avek Onorab Woodcock enkli Manm Lasosyasyon Peser Grand Anse e Baie Ste Anne Praslin i reprezante. Peser Praslin i

ankor pe esper pou ganny zot fasilite. Dapre dernyen diskisyon ki'n ganny fer resaman avek nouvo Minis responsab pou Lapes, sa bann fasilite pou kapab met a dispozisyon nou bann peser dan 10 mwan.

Mazorite nou bann fermye pe vann zot legim, fri, lavyann ek gro manze obor semen. Nou'n fer propozisyon kote pou met zot tanporerman pou evit konzasyon trafik dan Sanmdi bomaten, depi 2018, me nou ankore pe espere.

Mr Speaker, sa Nasyon Seselwa i tre matir ozordi, ranpli avek kapasite ek konviksyon. E mon konvenki ki zabitan Baie Ste Anne i annan ase potansyel pou deside lo kwa ki meyer pour zot. E ki kapab garanti en bon lavenir pou sa bann endividi ek zot fanmir.

Mon swe se ki Praslin i kontinyen ganny sa ki meyer dan redistribisyon oubyen lapartaz larises nasyonal. Enkli dan la fason ki distribisyon bidze anyel i ganny donner pour nou zil. Mersi Mr Speaker.

(APPLAUSE)

MR SPEAKER

Mersi Onorab. E aprezan prosen entervenans i pou Manm

Proporsyonnel *LDS*. Onorab Rosie Bistoquet.

HON ROSIE BISTOQUET

Mersi Mr Speaker. Bonzour Mr Speaker. Bonzour tou Onorab. Bonzour tou dimoun ki a lekout avek en bonzour spesyal pou tou travayer lasante e bann zabitan Pointe Larue.

Mr Speaker, mon kontan ki Prezidan Larepublik in delivre pa zis en *speech* Leta Lanasyon parey nou Konstitisyon i demande, me pou la premye fwa dan Sesel nou Prezidan in met la realite devan nou avek fransiz. E sa i plizoumwenn pou nou tou pran nou responsabilite, dan linite dan sa kriz sanniter e ekonomik ki nou pep pe pas ladan pou nou transform nou la demokrasi. E sa, sa tenm ki nou Prezidan ti koz lo la.

Mon pou al plizoumwenn en pti pe dan seksyon lasante, prensipalman dan sa kriz sanniter, lo repons *COVID* dan Sesel. Mr Speaker, dan sa konteks mon pou felisit Minis Lasante, avek tou son lekip ki pe met an aplikasyon tou bann mezir, plizyer mezir atraver plan lasante piblik konkret pou konbat *COVID-19* dan nou pei, malgre i annan serten defi.

Wi, byen boner lannen pase nou pei pe fer fas avek sa

gran defi, me la sityasyon in vin pli pir kot nou tou nou bezwen pran nou responsabilite pou anmenn sa lalit. En endividyel li tousel pa pou kapab fer li, me nou tou ansanm nou bezwen ini ansanm sirtou avek fanmir, vwazen, kominote, travayer, employer e osi bann *Leaders* Politik.

Mr Speaker, ler Sesel ti konmans fer fas avek sa dezyenm vag oubyen dezyenm *wave COVID*, nou'n trouve ki plis bann ka ki anrezistre i par transmisyon kominoter. E dan sa fason i pli difisil pou kontrole. Me la realite se ki nou'n pran nou responsabilite e swiv ban regilasyon ki Minister Lasante i fer sorti, nou pou kapab met sa mons ater.

Tou pei a en serten pwen parey Sesel, i ti pe enplimant ban lentervansyon non farmasoutik, parey dan karantenn ouswa ferm lekòl, bann dimoun i travay dan lakour, tenir zistans sosyal e lezot ankor. Malgre tou defi ekonomik, sa Gouvernman in vwar lenportans sov nou pei ek son popilasyon, pou fer sir ki mezir farmasoutik i mars kot a kot avek mezir prevansyon.

Mon felisit vizyon nou Prezidan. Si sa Gouvernman *US* avan ti kontan son pep parey zot dir koste pour Sesel, olye

donn bal dan sa bann larzan *FA4JR*, zot ti'n kapab pran en gran porsyon sa larzan, met de kote koman en *deposit* pou aste vaksen pou protez nou popilasyon avan menm Sesel i antre dan sa dezyenm vag *COVID*. Sirtou menm avan ki nou ti ganny transmisyon kominoter!

Kote sa bann gran koneser ki nou'n tande ki konn kontrol byen *COVID* ti ete avan le 25 Oktob? Annou pa les bann swadizan sa bann gran koneser bat nou latet avek sa bann demagozi ouswa bann pti koneser deranz nou sistenm avek fo lenformasyon, avek bann plan ki napa direksyon. Nou Prezidan in bezwen al mandyan pou rod sipòt avek bann zanmi, non selman lokal me enternasyonal pou met an plas en programme vaksinasyon efektiv, pou fer sir nou popilasyon i reste rezilyan kont sa viris.

Mr Speaker, nou tou nou konnen ki vaksen i sov milyon e de milyon lavi tou le lannen traver lemonn enkli Sesel. Vaksen i travay par *train* e prepar defans natirel dan nou lekor. Dan lekor imen e lezot lekor zannimo osi. San menm sa ki nou apel en sistenm defans ou en *immune system*.

Sa sistenm defans i apre rekonnèt e target bann viris ouswa bakteri ki atak nou lekòr a travèr bann lenfeksyon e detri zot avan zot kòz lenfeksyon ouswa anpes maladi.

Isi Sesel program vaksinasyon ti ganny entrodwir depi an 1861 pandan lepidemi Lavaryol. Nou ti war lentrodiksyon vaksen Lavaryol pou bann baba aze 4an. Ozordi 2021, i annan 14 kalite vaksen parey Lafyev Zonn, Difteri, Lakoklis, Larouzol, Laveret enkli vaksen *COVID* ki'n ganny entrodwir dan nou program. Sa i demontre ki vaksinasyon i tre nesese dan nou sistenm lasante pou anpes maladi e osi kre en *herd immunity* ki kapab ganny kontrole par vaksen. Dapre program Minister Lasante, i pa premye fwa ki vaksinasyon, en kanpanya vaksinasyon in ganny donnen e ganny fer pandan en nenport ki lepidemi.

Mr Speaker, dapre vizyon Lopoziyon, zot pe ensiste pou fer *lockdown* pou 2 semenn e an menm tan fer vaksinasyon popilasyon. Eski sa de mezir *lockdown*, vaksen i mars ansanm? Mwan mon pou dir non. Alor mon'n fer en pti refleksyon lo la, akòz mon'n dir non.

Pou ganny en *herd immunity* 70poursan, Minister Lasante in target 65mil dimoun pou vaksinen, tou dimoun pou ganny de doz vaksen.

Baze lo statistik, en *minimum* 100 vaksen pe ganny donnen par zour. Dan 2 semenn nou konnen ki apepre 12mil dimoun i pou ganny zot premye doz vaksen. Baze lo nou kapasite aktyel tou dimoun i bezwen al kot en stasyon pou pran zot vaksen. Sa i vèdir la mazorite dimoun pou bezwen pran transpor piblik ou komersyal ouswa marse pou al pran vaksen. E eski sa i pa pou ogmant transmisyon kominoter?

Alor pou vaksin 65mil dimoun zis pou premye doz pou pran *minimum* 2 mwan edmi. Pou tou le de doz i pou pran anviron 5 mwan. Mon pe dir minimonm. Mon kestyon Mr Speaker, eski nou pei in pare pou antre dan *lockdown* pou 5 mwan dan sa sityasyon ekonomik global? *US* in dir *lockdown* e reste se ou, pa desann. Me selman al pran vaksen!

Pou konplet de doz pou 65mil dimoun pandan 2 semenn, fodre Minister Lasante i vaksin 9,300 dimoun i ganny vaksinen par zour. Kote Minister Lasante pou ganny sa

kantite ners ouswa teknisyen pou antreprann sa legzersis tre anbisyè?

Mon tir mon sapo pou tou sa bann ners ki pe travay dan sa kanpany vaksinyasyon. Mon konnen zot pe donn en servis profesyonnel, akòz mon ti responsab sa program vaksen avan ler mon'n vin la. Mon'n donn lanmen form zot e mon konn zot kapasite e mon konn zot *professionalism*, konmdir Angle i dir.

Anba direksyon teknik Mrs Bijoux, mon asire ki sa kanpany vaksinyasyon pou ariv lo son target. En gran mersi osi pou Mrs Bibi ek Mrs Marimba 2 ners ki'n pran zot retret pou zot retournen e kontinyen donn en koudmen dan sa aktivite nasyonal. Zot in toultan la pou ofer zot servis.

I fer mwan osi refer lo tenm 2020 ki *WHO* avek *ICN* ouswa *International Council for Nurses* ti demann lemonn pou sipòrt ners. Lannen 2020 ti ganny dedye koman lannen bann ners. E la lemonn enkli Sesel ti pli konvenki ki valer ners dan sa sistenm lasante la ki nou pe vwar nou ladan. Sa i fer nou retourn an ayer, sirtou ler ners ti pe demann en meyer *Scheme of Service*, zot ti bezwen al fer lamars an 2017, pou zot lavwa ganny tande.

Me malerezman dapre Gouvernman *US*, zot ti napa larzan dan Bidze pou donn ners e valer zot demann ti ganny rezete. Mon annan konfyans avek sa nouvo Gouvernman valer bann ners pou pli ganny apresye akòz zot pe *champion* sa lepidemi avek bokou konviksyon, determinasyon e *professionalism!*

Mr Speaker, Minis Lasante depi ki lepidemi *SARS* ti komanse depi avan, ki ti ravaz nou pei. Sa ti an 2002 a 2004. E nou'n trouve ki Minister Lasante in demann konstriksyon en *isolation centre* pou fer sir ki tretman e obzervasyon bann pasyan i ganny sirveye tre pros, pou evit komplikasyon e transmisyon. Mon krwar *MNA* Anse Royale i a dakor avek mwan, akòz sak fwa Sesel i fer fas avek en lepidemi, Lopital Anse Royale i ganny met an karantenn.

Pli grav ankor, servis lasante dan sa rezyon i ganny bouze dan en lot kondisyon ki pa favorab pou donn en servis lasante spesyalize, e bann *staff* sirtou bann profesyonnel zot touzour pe savoy pake. E sa i tre enportan akòz i difisil pou enstal bann lekipman lasante pou fer dyagnostik dan en sant kominoter.

Ziska prezan Sesel pa ankor ganny en *isolation center*. Mon 100poursan dakor avek sa nouvo Gouvernman pou pran sa desizyon en fwa pour tou. Nou bezwen annan en sant modern pou fasilite travay bann travayer lasante dan bann sityasyon difisil.

Mon osi pran sa lokazyon pou osi felisit bann ki'n met tou zot zefor, sirtou bann *staff* ki pa'n ezite pou travay dan sant karantenn Perseverans e lezot landrwa ankor. Bann ki pe travay dan karantenn malgre ki *staff* in redwir akoz bann ki'n al dan *COVID*. Ouswa zot in ranplas zot koleg, bann ki'n ganny afekte ou enfekte e zot osi zot in bezwen al dan karantenn. Zot pe osi ranplas *staff* dan lezot swen e servis lasante non-*COVID*.

Ler mon dir non-*COVID* sirtou kot i konsern servis lasante, savedir pour nou napa okenn servis ki'n ganny arete. Bann madanm i kontinyen ganny swen prenatal, zot in al maternite e zot in ganny zot pti baba, zot in tourn se zot. E sa i Praslin, La Digue osi. Zot in ganny servis pos natal, tou *ward* dan lopital in kontinyen donn swen. Lopresyon in ganny fer, *casualty* in fonksyonnen, dyaliz pasyan in kontinyen vini pou pran zot tretman. *Family*

planning e lezot ankor, lalis i long. Zot ofer en travay profesyonnel e sa i devret pe ganny tre byen apresye.

Mon pa kapab kontiny mon *speech* san donn en kondoleans la fanmir Rose. Anver enn nou ser Bernadette ki'n donn tou e ki ti pe travay dan karantenn avan son lanmor. Adye Bernadette ki ou nanm i repoze anpe.

Mr Speaker, pou ranforsi sa repons lasante dan sa kriz sanniter, Minister Lasante i osi demann plis ranforsisman dan sa ban sistenm swivan. Sa i pa pou ede dan zis *COVID*, me dan lezot lepidemi ki nou pe i fer fas or i pou fer fas avek. Premyerman ogmant resours imen parey dan sa bann domenn swivan, prevansyon sirtou triyaz, sirveyans pou fer *contact tracing*, laboratwar pou asir lavites ki rezilta i gannyen lo sa standar 24erdan ouswa 48erdan.

Revwar e investir dan en kalite ou lavites sirveyans pou fer sir ki Minister lasante i ganny bann *real time data*. Pandan sa lepidemi *COVID* laplikasyon sa de proze ti'n fini ganny fer depi Mars 2020 pou aste 2 *software*. Sa proze ti pou permet annan en program *GIS* ouswa *geographic information system*, ki kouven tou sistenm

zeografik dan Sesel. I zer *data*, donn lenformasyon vizyèl pou tou distrik afekte dan nou pei. Sa sistèm i ganny servi dan diferan pei sirtou anba sipervizyon *WHO* par teknisyen lasante.

Sa lot ankor i en proze ki pou *feed* sa *GIS* ki pou benefisye nou sistèm. Sa i apel en *GoData* ki promot pli bon program sirveyans. Sa i en zouti ki ganny servi pou anmas lenformasyon lo *site* dan nenport ki kriz sanniter. Sa program i pou fasilite *contact tracing*, kot travayer lasante i kapab *trace* en group dimoun ant 24 a 48er. En standar rekomande dan en sistèm sirveyans, pou asire ki pasyan, kliyan dan karantenn ouswa son kontak, zot a ganny latansyon lasante pli vit, sirtou kot i konsern pou zot kapab fer sot tes. Akoz enn ler zot dan dout. I annan i dir ou koumsa zot in dir li espere, in al kot li. E i ankor pe atann pou li ganny en *call* sorti kot lasante.

Sa i pou osi tir en pe presyon lo sa bann tim *RRT* ouswa *the Response Team*. Sa i pou kapab ganny zere par nenport ki dimoun ki pe travay dan sa lepidemi e dan kontrol. E sa sistèm i annan en sistèm ki Minister Lasante i pe deza komans servi, i *ODK*. E

ODK i en sistèm, en *software* ki ou kapab fer *real time data* dan sirveyans ki konmela la, nou pe fer sirveyans pou Polio avek program vaksinasyon dan Sesel depi i annan plis ki 2an.

Mr Speaker, mon pou donn tou mon sipor travayer lasante dan sa moman difisil, konman bann *frontline workers* e donn zot tou mon lankourazman pou kontinyen travay dir pou Sesel ganny laviktwar. Me parkont Mr Speaker, dan sa lespri responsabilite ek linite, mon pou lans en lapel avek serten pti group ladministrasyon dan Minister Lasante, pou revwar zot responsabilite kolektiv e donn tou zot sipor Minis Vidot pou bouz sa sistèm an avan.

Aret fer dimoun vir an ron pou ganny akse avek servis. Mentenir lapwentman bann kliyan. Tou *management* i devret pe pran bann desizyon ferm, pou fer sir ki zot *staff* i swiv en direksyon byen kordinen. Ouver zot laport pou asir bon kominikasyon, pou asir en meyer servis lasante e swen pour nou popilasyon. Sa ki ankor pe trenn lipye, revwar zot *mindset*.

Mon pou osi fer en lapel pou tou administrater lasante, konman en tim profesyonnel

nou bezwen asire ki tou profesyonnel ki ganny anploye avek Minister Lasante i swiv tou protokol, tou standard, tou SOPs pou asire ki pasyan e kliyan i ganny meyer swen.

Prezan mon pou bouz lo en lot size ki Prezidan in koz lo la e mon konnen mon bann lezot kanmarad in deza kouver. E mwan mon pou al lo sa bout ACC, ki *Anti-Corruption Commission*, ki mon pou bref lo la.

Mr Speaker, en lot topik dan Ladres SONA ti vize ver sa lazans endepandan. *Anti-Corruption Commission* ki pa'n performen pandan sa 3an depi ki zot in etabli. Mon'n al *google* anba zot *website*, napa gran, gran lenformasyon resan ou rapor striktire ki a dispozisyon piblik. Me selman mon'n al *google* anba sistenm Moris, zot annan en rapor detaye, *the latest* i ti 2016 a 2017.

Wi zot in ganny etabli an 2016 e dapre zot lobzektif, zot en lotorite endepandan ki fer lenvestigasyon, detekte e anpes bann pratik koripsyon dans Sesel. Mon'n osi fer en pe resers lo lezot model, prensipalman dan bann pei *OECD, Organization for Economic Corporation and Development*. Kot zot sistenm i en pe parey pou nou e i pli liberal. I relye

avek demokrasi, politik e liberasyon ekonomik. Laplipar pei sirtou Sengapour, Lanmerik, Moris parey mon'n dir taler, isi Sesel in adopte sa model.

Mr Speaker, pou mwan ganny plis lenformasyon, mon ti al vwar model *FIU* ki ti ganny restriktire 2an pase e sa *Unit Envestigasyon* ti ganny transfer anba striker Lapolis e vin *FCIU. Financial Crime Investigation Unit*. Sa reform ti ganny propoze par nou Vis-Prezidan an se moman ki sa letan i ti en Manm *FPAC* dan Lasanble Nasyonal.

Menm si i annan bokou kritik lo sa desizyon par *US*, depi ler *FCIU* in etabli, 2an pase, zot in delivre e montre plis efikasite. Legzanp, zot annan plizyer ka Ankour, zot in osi fer lasezi plizyer bann gro dibyen mal aki. Parey transport, lakaz, bato eksetera. Kot Sesel in vwar en progre ki sa lazans in fer.

Alors pou fer sir ki lalit kont koripsyon i ganny entansifye dan nou pei Sesel, mon pe propoz sa de opsyon swivan. Enn, ACC i devret *strengthen* sa sistenm parey Prezidan in deklare pou donn plis kapasite imen e osi lekipman efikas. Legzanp mon pou donner, par egzanp en *mobile* Lulu ou pa gannyen

internet lo la, pou sa bann dimoun travay avek. E an plis ki sa mon krwar devret get en pe dan *welfare* zot bann *staff*, akoz mon pe get *staff attrition* i en pe o. Apre nou a evalye son performans.

Ouswa transfer sa bout envestigasyon entegre anba Lapolis parey lazans *FCIU* ki levidans in donner, ki zot pe delivre pandan sa 2an ki zot an egzistans. Sa propozisyon mon pou les avek nou Gouvernman pou evalye e desid lo meyer solisyon.

Mr Speaker, prezan mon pou adres bann sityasyon pertinan ki pe afekte mon bann zabitan, bann zabitan Pointe Larue pandan plizyer lannen anba en sistenm 'ek nou pa ek nou.' Mank responsabilite kolektiv, gaspiyaz, birokrasi dan servis piblik, mank sinerzi ant bann Departman Gouvernen, labi pouvwar, non-eklisivite e osi mank koneksyon avek nou zabitan.

Koman en zabitan Pointe Larue, malgre ki mon pa'n ganny elekte, me *LDS* in fer mwan konfyans par mon nominasyon proporsyonnel. Pour sa mon remerci *Council LDS* pou rekonnet mon enklisivite, profesyonnel, *leadership* e osi mon

lantouzyazm pou konekte avek nou kominote.

Mr Speaker, mon remerci tou bann ki'n vot pou *LDS* dan sa dernyen eleksyon, e mon osi remerci tou bann ki pa'n vot pou mwan. Me selman mon a zot dispozisyon pou travay avek tou dimoun dan Pointe Larue, akoz mon leker i pou zot tou.

Konter avek mon koleg *US* ki lo lot kote latay, sak fwa bann dimoun i vin vwar li avek en problem, zot dir li al kot Rosie, akoz zot pa'n vot pou li.

(laughter)

HON ROSIE BISTOQUET

Sanmenm sa prensip *US*? Nek kree divizyon, nou'n koz divizyon. Nek kree divizyon parmi nou pep, kontinyen avek sa prensip 'ek nou pa ek nou.' Malgre parey mon koleg i dir mon'n pas laport deryer, mon koleg *MNA* Pointe Larue in dir, in fer propagann lo la. Mon asir li ankor dan sa 5an se li ki pou pas par lafnet.

(APPLAUSE)

HON ROSIE BISTOQUET

Mr Speaker, en nouvo divan in soufle dan Pointe Larue dan eleksyon Prezidansyel, kot pou la premye fwa nou distrik in

transformen pou vin en distrik kot *LDS* in koze dan bwat vote e anmennen Prezidan Ramkalawan *State House*. Sa i fer mwan tre fyer.

Atraver vizit, konsiltasyon, avek zabitan Pointe Larue sa bann pwen swivan in monte e zot merit ganny latansyon spesyal aköz Pointe Larue i en distrik ki'n ouver laport avek lemonn atraver nou Erport Enternasyonal. Me zabitan Point Larue in ganny neglize pandan 43an.

Lo size lakaz, Pointe Larue in ganny met lo lalis lakaz atraver laplikasyon, baze lo sa bann pwen parey tou bann distrik in koz lo la. I annan ankör ki ankör pe espere plis ki 29an. Sa i fer mwan mazin Elfrida dan leo Nageon Estate. In reste avek son manman dan en lakaz, mon pe dir bann vye model Nageon Estate lontan. In met son non pou ganny en lakaz plis ki 20an pase. Ozordi i annan li 39an avek 3 zanfan. Son manman in mor 6an pase, sa lakaz i delapide. *Wiring* partou kote. Elfrida i ankör pe esper son trou pou ganny en lakaz pou fer pou son fanmir.

Mr Speaker, sa ki konsern later *land bank*, en kantite aplikan pe esper pou ganny en bout later dan sa proze Ex-

Mellon Estate plis ki 15 an. Zot ti ganny let parti let e dernyen let ti an Novanm 2019 pou averti zot ki zot non in ganny met lo lalis pou zot ganny en bout later. An Oktob lannen pase, zot in ganny dir verbalman ki zot bezwen kontinyen espere aköz semen pe ganny fer avan ler lakaz i ganny fer.

En lot sityasyon ankör lo bann *flat PMC*. Sirtou bann flat *PMC* ki egziste dan Pointe Larue. Mr Speaker, dan Pointe Larue i annan 3 flat. Ex-Albert, Anse Francois e Mirabel. Konstriksyon pou sa enn ki pli resan i 14an pase. Tou sa bann flat napa en sistenm *sewage* an akordans avek regilasyon *housing* avek regilasyon lasante.

Zot pa'n zanmen ganny konekte avek sa sistenm *STP*. Sa ki apel *Sewage Treatment Plant* dan distrik, e blokaz desarz kabinen i en lavi ki bann zabitan i fer fas avek tou le mwan ouswa ler lapli i tonbe, tou le semenn.

Sak fwa *1st floor, toilet* avek lot i bloke, sa ki lo *ground floor* i soufer. Sa i fer mwan mazin Sharon, ki sak fwa sistenm i bloke, li lo *ground floor* i anmas lepokase. Son lakaz i noye avek desarz kabinen, meb andomaze,

kabinen, lasanmben inonde e loder pa kapab tenir. In ale vini kot *PMC* i annan plis ki 4an e zot ankor pe fer li vir an ron. I ankor pe rod en solisyon pou son problemn. E mon krwar avek sa nouvo Gouvernman *PMC* pou be aranz en pti pe son lekor.

Mr Speaker, de lot kote i annan en lot flat ki'n fer avek san planifikasyon, sa se Anse Francois. Tou le semen *septic tank* i *overflow*, e fer en *swimming pool* ki pa pran okenn kliyan apart ki mous ver, lera ek lezot vermin. Zanfan pa konnen kote pou pase pou zwe ouswa pou al lekol. Zabitan i ganny ase avek *PMC*, akoz zot pran zot letan pou rezourd zot problemn ki tou le semenn, tou le mwan zot pe ponpe menm !

Mr Speaker, parey angle i dir *the worst scenario* se Mirabel Flat swadizan en *emergency block*. Sak fwa lapli i tonbe, tou desarz kabinen e lasanmben i *overflow* dan sa pti *bedsitter* e *septic tank* i debord devan lakaz. Delo i monte, napa semen pou pase. Otour lakaz, pli move, in vin en melanz de tou. Swadizan Mirabel flat ti pou ganny kraze depi 2011, me bann eleksyon Nasyonal in war plis lokasyon.

Pov Derrick pa konnen ki manner pou fer son bann

zanfan navige dan sa semen parmi sa bann desarz avan ki zot trouv semen pou zot kapab al lekol. I ti menm ganny dir par sa *MNA* Pointe Larue ki la lot kote latab, ki i pou rezourd tou problemn Mirabel Flat koman eleksyon i fini. Oli? Oli Derrick mon zonn, ou ankor pe espere menm.

(Interruption)

MR SPEAKER

Order !

HON ROSIE BISTOQUET

Mr Speaker, i osi annan en *condominium* ki apel France Joseph Estate Flat, ki akomod diferan fanmir dan Pointe Larue santral. Malgre bann defi ki zot pe rankontre avek *sewage*, zot tou zot in fini pey *PMC* ouswa lakaz pou sa bann blok apartman. Me *PMC* pa oule transfer zot lavant. Zot pe demande ki Gouvernman i revwar zot lagreman e transfer zot lakaz akoz tou zot in fini pey tou det.

En lot sityasyon dan Pointe Larue se inondasyon. Mr Speaker, sak fwa lapli i tonbe i paret i en kiltir ou en tradisyon ki zabitan Pointe Larue in erite. Nou pa konnen avek ki selman. Sak fwa lapli i tonbe menm dan en zour, Ponte Larue i koule,

rigol i deborde, lakaz i ganny inonde e menm biznes osi i fermen. Zannimo i maron, aksidan, trafik lo semen i ogmante akoz napa vizibilite. Zanafan lekol.

MR DEPUTY SPEAKER

One minute, Onorab.

HON ROSIE BISTOQUET

Zanafan lekol i mars dan labou toulezour. Gouvernman US in fer plizyer resers mon konnen dan Pointe Larue pandan sa 20 an. Zabitan Pointe Larue pe demande pou fer en miting piblik pou ganny lesplikasyon lo sa bann resers e trouv en solisyon pou sa bann problem en fwa pou tou.

En lot sityasyon dan Pointe Larue se lanmin ki pe ganny tire Ile Du Swet. Mr Speaker, Lapli i ale, linondasyon i disparet, soley i pran plas, zabitan Pointe Larue i ankor dan problem. I annan en konpanyen ki pe tir lanmin e kas ros lo sa bout montanny Pointe Larue, lo bout Erport depi an1980. Ler lanmin i tire, sa vibrasyon i fer lakaz tranble, vit i degrenn, tapaz i fer dimoun sourd. Bann trezyenm-az e bann ki malad pa kapab repoze. En kantite dega in arive avek batiman, propriyete personnel sirtou bann zabitan Pointe

Larue Santral. Dapre konplent mete par bann zabitan Pointe Larue atraver en petisyon an Novanm 2000, kot Minister *Land Use and Habitat*, zot ti ganny enformen ki sa konpanyen pou aret tir lanmin an 2006. Me sa aktivite pa'n zanmen arete o kontrer prezan ki i vin pli entansif.

An Septanm 2019, zabitan ankor ti re ekrir sa menm Minister e eksprim zot dezapwentman konsernan sa size lanmin. Atraver en let sinyen par PS, zot ti ganny enformen pou met sa lakonpanyen Ankour pou li tir lanmin, akoz i pe tir lanmin lo later Gouvernman.

Alors tou sa ki pe ganny afekte par sa aktivite pe demann Gouvernman pou fer en investigasyon dan sa zafer lanmin e donn en leklersisman pou rod en meyer solisyon pou zot problem avan ki domaz i vin pli grav.

En lot sityasyon ankor Mr Speaker, ki paret mwan bann dimoun Pointe Larue in erite, se trafik bloke. Mr Speaker, sa sityasyon problem i vize ver popilasyon ki reste dan les e dan sid. Zabitan Pointe Larue i soulaze pou vwar ki la an se moman SLTA pe debrouye pou deblok lasasen par kreasyon en trwazyenm *lane* dan sa

dezyenm faz sa proze depi komansman sa lannen, 2021. Me sa i pa pou realize sitan vit akoz i annan bann propriyete prive ki pa ankor donn zot konsantman.

Alors mon ti a lans en lapel pour tou bann lazans konsernen sirtou propriyete prive, pou donn zot korporasyon pou amelyor lavi tou dimoun dan kominote. Sirtou bann ki reste dan les Mahe.

Nou konnen ki en diskisyon pe ganny fer par *SLTA* pou anmenn en senmen alternativ pou ganny fer pou konekte Pointe Larue avek Anse Aux Pins dan leo pou siport en lot akse routyer. En lot size ankor ki mon konnen ki en pti pe delika.

MR DEPUTY SPEAKER

Ou pou bezwen *wrap-up* prezan Onorab akoz ou dernyen minit ki ou annan la. Mersi.

HON ROSIE BISTOQUET

Mr Speaker. Alor Mr Speaker, avek tou sa bann refleksyon mon pou remersi nou *leadership*, nou *leadership* politik. Sirtou bann Minis. Mon garanti zot pou fer en travay ekselan akoz Prezidan, i en zonn parol e i en zonn determinen e sen zonn

spirituel. Pli enportan i en vizyoner pou anmenn Sesel pli devan.

Mon osi remersi tou mon bann aktivis e bann zonn ek fanm for dan distrik Pointe Larue, ki'n pouse pou donn sa nouvo souf pou tou zabitan Pointe Larue. Ansanm nou pou pran nou responsabilite e anmenn linite dan sa nouvo kriz lasante piblik. Mersi.

(APPLAUSE)

MR DEPUTY SPEAKER

Mersi Onorab. Zis pou note in koz egzaktaman 30 minit, i ti komans 11.38, i fini 12.08, savedir i pa'n ganny okenn lapliferans minit an plis.

Tou bann Manm zot maksimonm letan. Mon rekonnnet lanmen Manm elekte pou distrik Pointe Larue i anler, i annan en *point of order* ou pe *raise*, Onorab Gabriel.

HON CONRAD GABRIEL

Yes Mr Speaker, mon oule *raise point of order* anba *Order 49(1)*. Mon panse Mr Speaker, ki Onorab Bistoquet pe *mislead* nou Lasanble. I napa okenn moman ki mon'n promet okenn zabitan okenn faver, okenn keksoz. So, a mon pwennvi i pe *mislead* Lasanble e *mislead*

dimoun an deor, piblik ki pe ekout nou. Mersi.

MR DEPUTY SPEAKER

Ok, mon krwar ou'n fer le pwen. Donk nou ava ... Ou oule, klarifye serten keksoz, akoz mon pa'n tro sir, akoz ou ti annan ou mas, ki'n en pe ... So, mon pa konpran ki ou pe dir mwan.

HON CONRAD GABRIEL

Yes, Mr Speaker, mon dir ou par egzanp mon ti lev en *point of order 49(1)*.

MR DEPUTY SPEAKER

Wi mon'n regarde.

HON CONRAD GABRIEL

Onorab Bistoquet pe *mislead* nou Lasanble e piblik ki pe swiv an zeneral. I napa okenn moman kot mon'n refer okenn zabitan kot li e mon pa'n fer okenn promes okenn zabitan. mon ti a kontan i *retract please*. Mersi.

MR DEPUTY SPEAKER

Onorab Bistoquet oule klarifye natir ou deklarasyon.

HON ROSIE BISTOQUET

Non, mon pa pou *retract* Mr Speaker. Mon pou dir mon a donn li non apre si i anvi. I annan Dimans, sa Dimans la,

mon ti annan en msye ki ti vin kot mwan.

MR DEPUTY SPEAKER

Ok, donk nou pa ava trenn nou dimoun dan piblik.

HON ROSIE BISTOQUET

Ok.

MR DEPUTY SPEAKER

Savedir mon ava *advise* ki zot zwenn zot de.

HON ROSIE BISTOQUET

I annan levidans. I annan levidans, mon a donn non tou. Mersi.

MR DEPUTY SPEAKER

Ok, tre byen. Avek sa nou ava *break* ziska 2er pou kontinyasyon nou deba lo larepons Leta Lanasyon apartir 2er ozordi.

(BREAK)

MR SPEAKER

Bonn apre midi tous, dan lasal e a lekout. Nou'n ariv lo Onorab Sathya Naidu. Onorab.

HON SATHYA NAIDU

Mersi Mr Speaker. Bonn apre midi tou koleg Onorab dan Lasanble Nasyonal e en bonn apre midi spesyal pou sa group

rezilyan, zabitan St Louis e piblik an zeneral.

Kales kase, sa se Leta nou Nasyon. Mr Speaker diskour par Prezidan Larepiblik ti en diskour ranpli avek lonnekte par nou premye Prezidan elekte. Non pa en Prezidan ki'n vin o pouvwar atraver koudeta, non pa en Prezidan ki'n vin o pouvwar atraver pas baton, me en Prezidan ki'n ganny elekte par son pep atraver bwat vote. E pour sa mon bezwen dir, mersi pep Seselwa vi ki zot in fer en tre bon swa.

Ler i annan en diskour ranpli avek tel degre lonnekte, byensir i pou toultan annan en group zot dan minorite, ki pou toultan obzekte baze lo tou sa ki'n ganny dir.

Me selman Mr Speaker sa se vre Leta nou Nasyon. Prezidan in dekrir larealite ki nou a pe viv ladan ozordi. I pa'n kree en *illusion* konmkwa tou keksoz i *ok*, ler i pa *ok*, in dir keksoz parey i ete, Leta nou pei i parey en kales kase.

E pou nou bouz an avan fodre ki nou azir dan en fason fran. Ozordi si nou pei pe fer fas avek en kriz, se aköz en konbinezon de eleman prensipal. Enn se *United Seychelles*, e lot se *COVID* azout li ansanm ou ganny sa kriz.

Se pourtan, pou sa rezon ki le 25 Oktob 2020 pep Seselwa in donn nou, isi dan Lasanble Nasyonal 25 syez e zot in met Mr Wavel John Charles Ramkalawan *State House*.

Pep Seselwa in koze dan zot gran mazorite. Ou konnen kwa Mr Speaker, mon pa konnen si ankor dan 10 mwan i pou reste 10 zot dan sa parti ki apel *US*. Mon pe dir sa baze lo lafason ki zot a pe fer politik ozordi, kot zot in adopte bann pratik pou senm lafreyer e konfizyon dan lespri nou pep, kot zot a pe partaz fo lenformasyon.

Wi! *Fake news*, atraver zot azan lo rezo sosyal. Olye promouvwar bann plan prensip ki anliny avek linite, zot pe sey diviz nou pep, olye vin devan avek solisyon, zot pe kree panik.

Me selman sa, pa pou abouti dan nanryen aköz pep Seselwa in war kler. Sa gro nyaz nwanr in fini komans ale, e i pou ale aköz Prezidan Ramkalawan ki pe *run border!*

Sityasyon *COVID* pe preokip nou tou baze lo lenpak ki'n annan lo lemonn an antye. Lo kote Sesel in fer nou realize ki Sekter Lapes ek Lagrikiltir in ganny neglize. Mon totalman dakor avek lafason ki Prezidan in dekrir kalite marsandiz ki lo

marse ozordi. Vre ler nou pe gete nou pei in vin parey en *dumping site*.

Kot nou vwar tou sord kalite marsandiz, ki pou normalman pou ganny rezete par konsonmater dan lezot parti lemonn. Me selman nou, nou a pe aksepte sa san realize ki konsekans i annan lo nou lasante e lasante nou pep.

Si ou gete ozordi, i annan en kantite dimoun ki pe lager kont obezite, kantite dimoun ki annan dyabet, kantite ka kanser pe kontinyelman monte. E i donn mwan en lenpresyon ki nou bezwen, nou annan en bon poursantaz nou popilasyon ki malad e sa i vin en fardo pou sistenm lasante e nou sosyete.

Alors fodre ki nou re-anforsi nou mwayen, an term *quality control* lo kalite marsandiz ki nou fer antre dan pei, e menm bann prodwi ki ganny fer lokalman.

E mon ti ava kontan felisit bann travayer kot *SBS* ki pe fer zot travay dwat e onnet. Me pou lezot ki pa pe travay silvouple fer zot louvraz byen, aret pran gous dan zak. Akoz se nou koman konsonmater ki pe pey le konsekans. Annou promouvwar nou Lendistri Lokal, nou bann fermye ek peser, e lezot prodikter. Se ler nou aste lokal ki nou kapab

ankouraz zot pou pran sa linisyativ, pou agrandi zot biznes kot zot pou ganny plis reveni e sa an retour pou donn zot loportinite pou kree plis lanplwa dan sekter.

Annou valoriz nou bann pti fermye. Sesel i annan bokou fermye ki baze lo montanny, dan bann vale ki napa ni en semen pou ariv lo zot laferm. Minister pou Lagrikiltir mon pe lans en lapel avek ou. Al kot sa bann fermye, get zot problem, ed zot pou bann ki napa semen fer en semen arive.

La i nepli letan, pou en ti bet bare ek tol pou kas bed. Nepli letan pou bal fimyen lo likou pou savoy lo montanny. Mon le pran sa loportinite pou demann bann fermye, pou ralye ansanm atraver diferan lorganizasyon ki a zot dispozisyon, pou ede anmenn bann solisyon ki dan zot benefis. Linyon i fer lafors.

Si sa pei i anvi ki nou annan ase legim e fri lokal a en pri rezonnab, kot en zour nou pou kapab koup net lo lenportasyon, fodre ki nou komans siport nou fermye ozordi.

Mon repete ankor ki Sekter Lagrikiltir in ganny neglize, e se pour sa se pourtan pou sa rezon ki nou bezwen donn Lekol Lagrikiltir sa

lenportans nesese pou kree en lanfaz for pou enteres bann etidyan vin bann fermye demen.

E si nou fer sa, sa nouvo zenerasyon fermye ki pe vini pou en zour kontribye enormeman pou fer Sekter Lagrikiltir vin en pilye for dan nou lekonomi.

Mon annan lespwar, ki lagrikiltir i annan en lavenir briyan anba nou Gouvernman. Annefe Onorab Churchill Gill dan son diskour dan pou larepons Leta Lanasyon, i ti'n fer resorti bann difikilte ki bann fermye dan son distrik pe fer fas avek.

I kler, ki sa sistenm in fel, e kot sa sistenm in fel, nou lo nou kote nou pou aprann pou pa repet menm fot e nou pou valoriz nou bann fermye.

Mr Speaker, avek *COVID* nou'n war lentrodiksyon *FA4GR* ki ti annan en bon lentansyon avek en bi pou stabiliz lanvironnman dan Sekter Biznes, kot sa bann biznes ti kapab kontinyen marse dan sa nouvo normal avek en bi pou retenir zot travayer.

Mr Speaker, i ti osi en lannen eleksyon, an 2020. E fodre nou pa anbet nou lekor poudir ki *FA4GR* pa ti'n ganny servi koman en lenstriman politik! Zot ti dezespere e alor

zot in al avek zot sistenm 'ek nou, pa ek nou.'

Se la kot fristrasyon in antre. Ler mon'n tann non sa bann lakonpanyen en endividi ki'n ganny lasistans, mon ankoler Mr Speaker. Napa lazistis! E mon apresye ki Prezidan i anvizaze kontinyen avek sa *Scheme* zis pou trwa mwan ki pe vini. Kont son kriter ki vin avek, i pou ganny respekte. E byensir sa desizyon menm avek son kou ki pe ganny sibir, i pe ganny fer lo en baz imaniter e dan benefis, travayer e anplwayer ki vreman, ki vreman dan bezwen. Mon koman en optimis mon santi ki *by the time FA4GR* pou arete nou lekonomi i pou dan en pli bon leta.

Mr Speaker, nou bezwen derasin sa sistenm 'ek nou, pa ek nou.' Kantite koripsyon ki'n annan dan bann departman tel koman *ASP* i soka. Akoz in annan en mankman an term en mwayen pou kontrol lafason ki *welfare* in ganny donner. In annan en kantite labi lo sa kote.

Ou konnen kwa Mr Speaker, nou bezwen en sanzman radikal. Fodre ki nou anmenn sa sanzman pou tir nou pep lo depandans lo Leta, e fer zot vin en pep ki prodiktiv e endepandan. Annou redonn zot dinyite! Malerezman sa defi ki

nou pe fer fas avek se gras a sa sistenm 43an kot nou pep in vin en lesklav mantalman. E ou konnen akoz zot in fer sa? In ganny fer avek en bi pou *US* reste o pouvwat, me zot devret konnen ki sa bann zour in fini ale, pep Seselwa in koze.

Alor Mr Speaker parey Prezidan in dir, annou pou pa donn nou pep zis en pwason pou li manz pou en zour, me plito donn li en laliny e ed li ek son premye labwet, pou li kapab lapas son prop pwason e debrouye lo li menm.

Pou non selman soutenir son prop lekor, me osi son fanmir. Fodre ki nou asire ki sa pep i komans konpran, sa lenplikasyon. Ier ou pran ou responsabilite o serye ou pou bezwen delivre, se la kot ou pe vremen travay dir.

Nou pou bezwen fer tou sa ki posib a nou dispozisyon pou edik sa pep avan i vin tro tar. Mon pa le war en lot zenerasyon ki pe viv zot lavi san en bi. Ozordi si i annan en problem lanplwa dan nou pei, se akoz nou'n donner, nou'n donner e nou'n kontinyen donner san eksepte nanryen.

Ozordi nou pe kree en lekspektasyon kot zot bezwen rod travay avan ki zot rod lasistans *welfare*, e pour zot bann anplwayer mon konnen ki

i vremen difisil, anliny avek bann difikilte ki zot fer fas avek serten travayer, me selman pa pini lezot ki pe rod lanplwa.

Donn nou bann ser ek frer Seselwa en dezyenm sans, nou lekonomi i bezwen li, nou pei i bezwen tou son zanfan. Komansman ozordi fodre ki nou adopte bann mezir strik a sa ki konsern *welfare*. Donn bann ki vremen bezwen, pa bann ki'n abiz sa led ki zot in gannyen. Nou pa ou kapab kontinyen adopte en lapros pou satisfere tou dimoun akoz nou pei i pa pou kapab *afford* sa.

Mr Speaker fodre ki mon azoute ki vremen enkyetan Ier mon war statistik ki'n ganny bibliye, ki montre sif lakantite dimoun ki'n ganny *COVID* dan pei, me dan lot kote nou vwar ki nou pei pe mont premye, anver premye lo program vaksinasyon.

Sa i vremen byen e i anmenn en pe lafyerte. Me ankor en fwa lo lot kote mon ganny bate ek dekourazman Ier mon vwar en group, pe defi lord Lasante Piblik. Pou sa bann ki pe azir dan en fason egois avek en latitid lesefer, Tyonbo en kou, mazin nou bann frer ki'n perdi zot lavi kont sa viris. Lavi i presye, annou valoriz li. Annou ini ansanm e se atraver

nou bon konportman ki nou pou sorti venker.

E avek sa, mon le pran sa loportinite lo non mon bann zabitan mon distrik pou senserman remerci Minister Vidot, Dr Gedeon ek son lekip ki lo *frontline* pou sa travay merveye ki zot a pe fer.

Mr Speaker mon oule koz en kou lo leta mon distrik. Ler mon ti en kandida mon ti'n fer en promes, ki mon pou kontiny sa bon travay ki Onorab Sandy Arissol in komanse. E avek Legzekitiv lo mon kote i annan bokou pou mwan fer pou mwan bann zabitan.

Mr Speaker i annan serten konsern ki mon pou met devan pou Legzekitiv tand e pran aksyon lo la. I annan plizyer rezidan, ki pe reste dan flat Dan Koko e menm Ex Gees ki pa ancor ganny zot lavant. Menm apre ki zot in pey tou sa ki zot dwa. I annan serten ki'n peye depi 10an pase. Mon swe se ki *HFC* i pa kontinyen trenn zot lipye aköz sa i pa akseptab ditou. Kwa zot pe esper sa bann dimoun mor avan ki zot ganny zot lavant? *Sorry* Mr Speaker, mon bezwen partaz fristrasyon mon bann zabitan.

Size lo kote later ek lakaz i enn ki tous tou nou bann distrik. Ozordi mon pe vwar en kantite dimoun ki ancor pe

esper lakaz, ou later pou plis ki 20an e sa in ganny fer *délibérement*, avek en bi pou persekit zot, baze lo zot krwayans politik. Me selman mon vremen apresye ki Prezidan in donn nou sa garanti ki nou pou finalman tir politik dan travay, nou koman en Seselwa nou tou nou bezwen ganny trete dan en fason egal, san regard afilyasyon politik e se sa vre lespri Sesel pou tou son zanan.

Drog ek lalkol, pe ravaz mon distrik. I annan plizyer groupman bann zenn zonn ek fanm, ki mon'n abitye vwar zot koman en zanan, pe leve pe al travay, tou le bomaten. Me plizyer lannen pli tar mon'n remarke ki zot in al rod konfor dan sa pwazon ki apel eroin. Nou bezwen rode, ki rezon aköz eski zot in tonm dan sa latrap? Aköz eski zot in soumet zot lekor ek sa mons?

Mr Speaker drog i en size ki ganny koz lo la, lannen ale lannen vini. Me kwa ki'n vremen ganny fer? Mon'n remarke ki larzan in ganny devide. Diferan lenstitisyon in ganny itilize, me pwen final se i pa'n abouti dan nanryen. I pa'n abouti dan nanryen, aköz lo kot Legzekitiv, *US* sa letan in annan en mankman lavolonte politik

pou lager kont drog! Eski sa ti en stratezi politik?

Mr Speaker, ozordi nou napa leskiz pou dir ki nou pa pou kapab adres sa problem. Sa problem, akoz se nou ki dan Legzekitiv, an plis ki sa nou annan en mazorit total dan Lasanble e mon swe se ki nou pou kapab adres sa problem o pli vit posibil. Akoz sa zafer ki apel drog i ositan danzere ki COVID. Akoz in deza detri plizyer fanmir e avan ki afekte en lot zenerasyon, fodre ki nou pran aksyon.

Mr Speaker nou pa pou kapab viv dan linyorans. I kas mon leker ler mon war bann zenn zonn ek fanm lo semen pe marse san okenn direksyon. E bokou fwa zot ganny ensilte, e zot ganny maltrete. Mon pa war li ok, akoz sa bann manmay i viktim sa sistenm.

Se sa sistenm ki'n fel zot, e fodre ki nou pa repet menm fot. Mon oule konnen, eski Dr Herminie pa ti kapab fer en Konferans De Pres direk lo SBC pou koz en kou lo program *methadone*, olye COVID? Pou mwan personelman sa program in fel, senpleman akoz mon pa'n vwar rezilta. Eski in annan okenn piblikasyon dan en form tanzib pou dir konbyen dimoun ki lo sa program?

Oli *bann success stories*? Annefe i annan plis dimoun ki lo eroin ki *methadone*. Sa i bezwen vremen dekourazan pou bann staf ki pe donn tou kouraz laba kot APDAR, me zot zefor pe al anven. *Because the wrong man has been at the top*. E mon byen dakor ki i pe ale!

Mr Speaker, fodre ki sa program i ganny revwar. Fodre ki i annan plis zefor lo kote reabilitasyon parey Onorab Naddy Zialor ti'n fer resorti. Mon'n fatigue vwar zot pe debout o bor en pti bis pe pran *methadone* tou le bomaten, e 2erdtan pli tar zot in retourn lo semen, pe fouy dan bin, ouswa zot retourn lo gento pe pran sibstans.

Fodre ki annan en program konpreansiv, pou ankadre zot. Fodre ki apre zot doz *methadone* ki zot pe retourn travay. Si napa travay rod li en louvraz pou li fer. Gard zot okipe, ouswa si zot dan en sityasyon kot mantalman zot pa pou kapab sezi kwa ki pe ariv avek zot lavi, silvouple fer zot ganny led atraver bann endividi ki konpetan, atraver bann program stab, e mon swe se ki i annan en bon odit ki ganny fer pou amelyor e, e lev standar sa program.

I osi enportan lo kote lapolis pou fer zot louvraz byen,

se zot bezwen asire ki nou pep i viv an sekirite. Pa abiz zot lotorite silvouple, bokou zabitan i le vwar zot pe mars apye dan nou kominote.

Mon konnen ki COVID i vin en pwen konsern, me zot la pou gard lape, fodre ki zot fer sa sakrifis. E pou bann ki pe fer sa louvraz byen mon le remersye zot pou zot devosyon, sa mesaz i aplik pou bann zofisye dan ANB.

Mon swe se ki bann aktivite ilegal ki pe pas dan mon distrik i ganny rezourd enn fwa pour tou. Fer zot travay byen, akoz zot ki pou vin bann ero pour sa lot zenerasyon ki a pe grandi devan nou.

Mr Speaker, lo kote proze e lenfrastruktir mon santi ki mon distrik in ganny neglize. Senpleman akoz zot pa'n zanmen les tonbe. E avek sa letan abnormal ki nou pe pas ladan, mon konnen ki mon zabitan, dan mon distrik zot pou reste pasyante ziskan ler lekonomi i komans vreman rebran e se la kot nou koman en distrik, e koman en zabitan nou pou kapab bouz an avan.

Ou konnen kwa Mr Speaker, keksoz ki pli pozitiv se Prezidan Mr Wavel Ramkalawan i sorti dan mon distrik e Sesel koman en pei ki pou benefisye. Akoz sa msye

annefe avan ki mon ti'n menm ne ti'n komans son parkour. In persevere, in determinen e i pa'n zanmen les tonbe! Son bann prensip pa'n zanmen sanze e si ozordi lo lot kote zot pe dir i arogan, i isi e laba *he was always the same, he never changes* e ozordi nou annan 55poursan dimoun ki krwar dan li, e avek letan lo lafason ki li i pou diriz Legzekitiv, i pou annan plis dimoun ki pou swiv li, akoz lo lot kote *you are intellectually spent!*

(APPLAUSE)

HON SATHYA NAIDU

Ozordi, mon konnen ki si i annan lentegrite, definisyon lentegrite se Wavel Ramkalawan. Lot kote zot mank lentegrite.

Mr Speaker, mon pa pou kapab bliy sa bout kot Prezidan in dir, pou nou koman bann politisyen pou pa diviz sa pep. Linite i en zoli parol ranpli avek lemosyon ki vreman amenn nou ansanm, me selman pou nou valoriz sa parol, fodre ki nou met sa pratik o sant dan tou keksoz ki nou fer.

I enportan ki nou koman bann reprezantan nou deservi nou pep avek enparsyalite. Akoz si nou ti kapab tap lo laport tou dimoun pandan letan

eleksyon, nou devret gard nou laport ouver.

Pli enportan se ler nou koman bann zofisyè dan Gouvernman *be it* Legzekitiv, Lezislatif e menm Zidisyer nou pran sa responsabilite o serye se la kot linite pou renye.

Mr Speaker si mon la ozordi, se gras a zabitan St Louis. Ti annan lezot distrik, lezot zabitan dan lezot distrik ki ti annan lensertitid ler ti konsern mwan koman en kandida. Me selman zabitan St Louis dan tou sa bann dimoun ki mon'n war zot in met konfyans dan mwan, zot in krwar dan mwan e pour sa mon dir mersi e mon pou travay dir pou zot.

Mon pou donn tou dan sa zefor pou amenn nou pep ansanm. E mon demande ki Bondye i beni nou pep ek nou later e permet li pou donn nou sa kouraz, pou pa zanmen les tonbe dan sa misyon pou rekonstrir nou pei Sesel! Mersi.

(APPLAUSE)

MR SPEAKER

Mersi Onorab. Nou ava ekout Onorab Sylvanne Lemiel.

HON SYLVANNE LEMIEL

Mersi Mr Speaker. Bonn apre midi tou Manm koleg Onorab ki

la prezan en bonn apre midi spesyal pou bann zabitan Anse Royale e ser pep Seselwa ki a lekout.

Mr Speaker lannen 2020 in ale avek tou son defi. Nou'n akeyir 2021 ankor dan sonm, e avek plis defi pou nou sirmonte. Vandredi le 22 Zanvye 2021, nou'n tann Prezidan Larepublik vin delivre son diskour lo Leta nou pei.

Mwan, mon'n port byen latansyon, lo sa ki Prezidan in vin dir. E ozordi mon pe ganny sa sans pou mwan fer en pti analiz lo son diskour.

Pandan *weekend* ki'n pase mon'n ganny bokou koud telefonn, e bokou mesaz sorti kot zabitan mon distrik kot zot in eksprim zot santiman e osi donn mwan zot pwennvi oubyen reaksyon lo sa diskour.

Mr Speaker, mon'n note ki bokou zabitan in fer resorti ki zot konfize e zot pa vreman vwar vre direksyon kot nou pei pe ale, apre ki zot in ekout Prezidan Larepublik. Zot in osi fer resorti ki zot in atriste avek tonasyon lo ki sa diskour in ganny delivre.

Mr Speaker Prezidan ki'n komans son diskour an dizan ki ozordi plis ki zanmen Seselwa i pli dan lazwa, Seselwa i konn dir bonzour kanmarad, eksetera.

Me parkont, kontrerman avek sa ki Prezidan Larepiblik in dir ozordi plis ki zanmen bokou Seselwa pe viv dan plis lenkyetid e dan dout. Bokou dimoun i vreman enkyet pou zot lanplwa, e zot byennet sosyal, zot fanmir. E zot santi zot enserten lo ki lavenir Sesel ozordi.

Vi ki Sesel, nou zoli patri in ganny dekrir koman en kales kase! Mon demann mon lekor si en Sef D'Eta i kapab al ziska sa zistans, pou dekrir son prop pei, ki li i pe dirize koumsa, ki konfidans ki bann lorganizasyon enternasyonal e bann investiser pou annan dan Sesel, ler zot tann son prop Prezidan pe koz koumsa, lo son prop pei? Mon espere ki sa Gouvernman nef, i ava kapab zot kales kase vin enn ki operasyonnel e ki i pa ava rankontre okenn problem.

Mr Speaker, an tou ka mon santi diskour Leta Lanasyon pou 2021, pa'n donn nou solisyon konkret, oubyen ki plan Gouvernman pou tir nou pei e Seselwa dan sa sityasyon ki nou ladan.

E ki mannyer i pou redres nou lekonomi. Mr Speaker depi ki LDS in vin o pouvwar nou tann koz zis lo kof i vid, napa larzan, lekonomi i zero, in

annan labi e la in vin koman en kales kase osi.

Me sa ki nou pa'n tande, se ki mannyer sa nouvo Gouvernman pou tourn sa bann defi dan bann loportinite pou kapab ranpli kof, e tir lekonomi lo zero.

Mon oule fer pep Seselwa remarke ki ler Prezidan Danny Faure ti ki *State House* ti annan \$427milyon ki i ti kit dan kof Labank Santral. Ki pe ganny zere par madanm Gouverner Caroline Abel. I byen note, ki dan sa menm sa kof ki ozordi Gouvernman LDS pe pret \$30milyon, oubyen R500milyon pou li enzekte dan lekonomi Sesel!

Si kof ti vid, ozordi mon krwar ni menm en *Cabinet* Minis Gouvernman LDS ti pou napa. E pep Seselwa osi, ti pou pli dan mal ki nou ete ozordi. In plis ki ler, pou aret koz kof vid Mr Speaker! Akoz sa i pa larealite. Annou bouz devan, e travay ansanm pou amelyor sityasyon pei. (Taler ou ava koze Onorab ...)

MR SPEAKER

Mersi. Onorab Lemiel aret en pti kou.

HON SYLVANNE LEMIEL

Les mwan koze aret *disturb*.

MR SPEAKER

Onorab Woodcock.

HON SYLVANNE LEMIEL

COVID-19 parey ... Yes, Mr Speaker.

MR SPEAKER

Aret en pti moman. Onorab woodcock, i vre ou komanter pe deranz lasal. Alor silvouple gard li anba. Mersi Onorab Lemiel.

HON SYLVANNE LEMIEL

Mersi Mr Speaker. Depi bomaten i pe *disturb* menm li. *COVID-19* parey Prezidan sortan ti toultan dir, pou annan en lenpak tre serye lo lekonomi nou pei.

Menm si ler i ti fer sa bann lanons, serten nou ti dir se tou ki i koze. Mr Speaker Prezidan Faure i en zonn saz, i war lwen. E i konnen ki i ti pe dir. Ler nou regard sityasyon ozordi, nou pe vwar ki sa maladi, i ankor pe ravaz lemonn e Sesel nou zoli pti pei pe kontinyen fer fas avek sa bann defi ki sa maladi pe vin avek.

Nou tou nou ankor pe santi son lenpak, ki pe vin deplizanpli enkontrolab e enkyetan. Deza bokou dimoun dan lemonn in perdi lavi e Sesel in perdi trwa son zanfan. Mon profit sa moman pou mwan

senpatiz avek sa trwa fanmir ki'n perdi zot pros.

Mr Speaker mon'n toultan apresye e felisit travay sa tim lasante ki sa tim lasante pe fer, e mon kontinyen mazin zot dan mon lapriyer. Mon zwenn sa Minister, mon enplor nou pep e zabitan, pou respekte lord ki'n ganny mete, sinon pei pa pou kapab kontrol sa maladi la ki i pe fer fraka dan nou bann kominote.

Sakenn nou i bezwen pran nou responsabilite e egzers bann pratik lizyenn e gard zistans. Pou bann etidyan, mon demann zot pou *make the most of* bann leson ki zot pe gannye atraver diferan sours, pour ki kan lekol i formelman komanse zot pa pou'n sitan perdi.

Mr Speaker, ozordi ler nou regard sityasyon lanplwa dan Sesel sa in vin vremen enkyetan. Sirtou pou bann zofisyè o plase dan Gouvernman, la nou pe koz bann PS, Direkter Zeneral, *Special Advisers* e lezot ankor, ki pe travay lo en Kontra e bann osi ki travay dan serten Sekter Prive.

Bokou sa bann travayer zot dan lenkyetid e lensertitid. Bokou zot, zot Kontra pa pe ganny renouvle, bokou zot pa vremen ganny travay pou fer e

zot pa pe ganny okenn lenformasyon lo ki pou arive avek zot.

I enportan note ki sa bann travayer, ki mazorite i byen kalifye zot annan en fanmir pou sonnyen e zot osi zot annan det pou re-peye. Ki pou arive avek zot, letan zot pou ganny met deor?

In annan ki'n fini ganny fer aret travay. E zot in sey *apply* louvraz dan lezot landrwa dan Gouvernman menm, me zot aplikasyon in ganny rezete, menm si zot annan sa kalifikasyon.

Mr Speaker, zot ti vin avek en slogan Sesel pou tou son zanfan. Mon pou enplor sa Gouvernman pou pa ferm lizye, oubyen zwe sourd lo sa bann profesyonnel. Si zot Kontra pa pou ganny renouvle dan en landrwa, alors pa fer li difisil pou zot ganny en lot travay pou zot kapab pey zot det e sonny zot fanmir. Akoz parey zot in prese, Sesel i pou tou son zanfan.

Mon'n osi tann Prezidan koz lo *URS*, e enn de zenn mon distrik ki lo sa program in kontakte mwan e enform mwan ki zot in ganny *call* sorti kot Lanplwa pou dir zot ki *URS* pe al frenmen.

Sa group dimoun i vreman enkyet, akoz atraver sa pti

travay ki zot ti ganny en pti *allowance*. Ti ava byen nou ganny en leksplikasyon kler ki plan Gouvernman anver sa bann dimoun ki lo sa program?

I annan bokou zot ki'n ganny leksperyans travay depi ki zot in lo sa program. Si ti annan *vacancy* dan bann landrwa kot zot ti pe travay, petet zot ti devret ganny konsidere pou ganny en lanplwa.

Pour sekter prive, mon konnen ki serten zot avek lanons ki *FA4GR* pou koupe an Avril, keksoz pa pou fasil pou zot.

Serten zot pou kapab ferm zot laport e evantyelman bokou dimoun pou perdi zot travay. Mon oule ankouraz sa bann pti biznes, sirtou dan mon distrik pou reste rezilyan. Mon konnen bokou zot pe lalit pou zot sirviv.

Mon osi konpran bann ki bezwen serten etranze sirtou dan bann pozisyon kle dan zot biznes, dan sa moman difisil mon ankouraz zot pou konsantre lo anploy plis Seselwa dan zot biznes. *Pa give up* lo zot, siport zot e ansanm zot pou reisir.

An menm tan Gouvernman i devret osi konpran bann dimoun dan biznes, annan bann dyalog e

bann konsiltasyon avek zot parey ti'n komanse avek Gouvernman sortan e ekout zot konsern. Ler nou et latet ansanm nou pou kapab akonplir bokou.

Mr Speaker, mon remarke ki Prezidan Larepublik in rat sa sans pou dir pep Seselwa ki son plan, kot i konsern pou adres lapovrete dan Sesel.

Ozordi nou annan en kous dimoun 40poursan parey in ganny dir, ki pou bezwen serten sipor pou zot fanmir. La nou pa pe koz lo bann ki zot in dir abize, e depan lo lasistans, nou pe koz lo sa manman tousel, ki zonn in kit li, zonn in al dan sibstans e li i avek detrwa zanfan deryer.

Sa papa tousel, ki pe trimouse pou fer de bout zwenn e i annan responsabilite son zanfan. Sa fanmir, ki travay e pe lwe en lakaz aköz i ankor lo lalis espere pou ganny enn avek Gouvernman, e ki ti pe ganny en pti lasistans *part rental*. Ki i pou arive avek sa bann dimoun?

Mr Speaker fodre pa zanmen nou bliy bann ki dan bezwen, bann ki pli vilnerab, e ki bezwen serten soutyen e sipor sorti kot Gouvernman. Mwan Mr Speaker mon pa toler bann ki kale e ki oule zis depan lo lasistans *welfare*.

Mon'n totalman siport tou bann, ki pe travay dir pou ganny sa ki zot bezwen, me i annan en group ki menm si zot pe travay, zot saler pa ase pou kouver zot bann depans le mwan.

Alors sa group dimoun pou bezwen lasistans. Mwan enplor Gouvernman pou get sak ka byen e pa zis koup sa bann lasistans aköz bokou fanmir pou soufer, annou annan en leker Mr Speaker. Mr Speaker linite se lakle pou progre.

San linite nou pa pou arive abouti nanryen, bokou in ganny prese lo sa size, me sa i en mesaz ki Prezidan sortan Mr Danny Faure in toultan demann sa pep pou egzerse. E in osi par son aksyon montre nou ki i ti senser dan sa ki i ti dir.

Wi Mr Speaker, linite i primordyal, si nou oule anmenn nou pei odela bann difikilte ki nou pe pas ladan. Ozordi i pa en letan pou nou divize e met politik dan tou keksoz, si i annan en letan kot nou devret vin pli inifye e solider se la, dan sa moman kot i pli kritik.

Alors nou koman bann Dirizan, annou pres sa ki nou dir e apre sitwayen a swiv dan nou lepa. Mon le profit sa lokazyon la Mr Speaker, pour

mwan osi adres zabitan Anse Royale direkteman.

Ser zabitan Anse Royale, menm si nou pe fer fas avek sa pandemik e ki i pe ravaz nou distrik osi, nou bezwen reste touzour solider. Nou bezwen kontinyen ekout gidans Minister Lasante, pou nou kapab sirmont sa problemn.

Nou bezwen obzerv bann Lalwa ki ganny met an plas e osi ankouraz zot pou zot pran zot vaksen kont sa maladi. Annou donn nou korperasyon e kolaborasyon kot i nesesser.

E ansanm, nou pou sirmont sa problemn, parkont ser zabitan mon pou adres bann size ki konsern proze e lezot devlopman pou nou distrik dan prezantasyon Bidze ki pe vini byento. Mon oule remersye zot pou zot korperasyon e sipor ki zot toultan donner ler i ganny demande. Annou reste angaze e kontinyen met lanmen ansanm pou progre nou distrik.

An konklizyon Mr Speaker, mon le dir ki mon dezapwente avek diskour Leta Lanasyon fer par Prezidan. In en diskour ki pa'n enspir nou pep, in en diskour vid e pa'n ofer okenn mezir konkret pou adres sa sityasyon ekonomi grav ki pei pe pas atraver e donn lespwar nou pep.

Sa diskour pa'n donn lespwar sa manman tousel ki pe trimouse, pou fer de bout zwenn, i pa'n donn lespwar sa zonn e sa fanm ki lo en Kontra dan servis piblik e ki zot Kontra pa pe ganny renouvle. I pa'n donn lespwar sa pti biznessmenn, sa drayver taksi, fermye, *car hire operator*, kontrakter ki netway o bor semen, ki zot pou kapab kontinyen zot aktivite ekonomik, la ki *FA4GR* pe al ganny aboli an Avril. Me plito senm dout e lensertitid dan zot lespri aköz Prezidan pa'n prezant zot avek en program alternatif.

Diskour Prezidan in kit plizyer kestyon san larepons. Olye redwir dout, e lensertitid sa diskour atraver bann deklarasyon vag, e kontradiktwar in ogmant nivo lensertitid parmi nou pep. Prezidan pa'n koz lo pri lavi ki pe kontinyen monte.

Ledikasyon e sekirite alimanter, se sa bann size pertinan ki pe afekte leta nou Nasyon. Dan plas regard sipor ki lezot pe donner i ankouraz son bann Manm pou koz lo sabotaz.

Incitement, zis pou kree en klima laenn. Sa pa anmenn linite, Gouvernman i devret senser dan tou sa ki i fer.

Plizyer nou *MNA US* in pran vaksen san fanfar, san *limelight*. Nou pou kontinyen siport bann mezir ki bon. Me aport nou konsern e kontribisyon lo bann ki pa bon.

Ler Prezidan i dir ki menm dan *ANB* i annan soupson lo batay kont drog, mon demande ki Minis pou Zafer Etranzer e son Komisyoner, Minis pou Zafer Entern e Komisyoner, lapolis i vin devan nou Lasanble e Lepep Seselwa pou dir, kwa egzakteman ki pe ganny fer pou *deal* ek sa sityasyon. Fodre Gouvernman i aret konplent e pas a laksyon.

E la, e lo en dernyen not Mr Speaker, Prezidan Ramkalawan ek son Gouvernman ti erit kales le 28 Oktob 2020.

Avek \$427mil, \$427milyon koman rezerv. En group profesyonnel medikal ki ti pe zer sa pandemik *COVID* tre byen, e met li anba kontrol. Dan selman 89 zour, an rezilta lenkonpetans e *recklessness*, son ladministrasyon in fer ki sa kales pe roul lo serk.

E prezan i blanm Gouvernman presedan ki'n les li avek en kales kase. Pep Seselwa fodre note ki se Prezidan ek son Gouvernman nef ki'n kas kales. *So, the time*

is now! Re-aranz kales e annou bouz devan. Mersi Mr Speaker.

(APPLAUSE)

MR SPEAKER

Mersi. Mon ava apel Onorab Clifford Andre.

HON CLIFFORD ANDRE

Mersi Mr Speaker. Bonn apre midi tou dimoun a lekout, Manm Onorab e spesyalman zabitan Anse aux Pins.

Mr Speaker Leta nou Nasyon in ganny revele avek nou parey i ete. Pep Seselwa pe ganny montre laverite. Sa ki Prezidan in dir nou i posibleman par dan sa ki nou pou ganny eksplike. Lekonomi i dan mal Prezidan in dir nou.

Mr Speaker, entervenans avan mwan in dir ki Prezidan in vin dir kof i vid, me mon dir li avek parti *US* si kof i vid, nou pou dir zot! Si pei i parey en kales kase nou pou dir zot! Nou'n donn zot bann solisyon. Prezidan in vin eksplike.

Mr Speaker i enportan ki pep Seselwa i ganny bann sif kler \$427milyon i ti dan rezerv Labank Santral. I annan en diferans ant en rezerv e avek larzan ki ganny servi dan Bidze pou zer e *run* Gouvernman.

(APPLAUSE)

HON CLIFFORD ANDRE

Sa i ava ganny konfirman par ansyen Minis Wallace Cosgrow ki ozordi i en Manm Lasanble dan Lasanble Nasyonal.

Mr Speaker, letan Prezidan in dir nou ki'n fer en pre, Gouvernman in fer en pre R500milyon, se bann larzan ki ganny enprimen par Labank Santral. Se pa larzan sorti dan rezerv. Larzan dan rezerv Mr Speaker i pou bann komodite esansyel, tel ki medikaman letan i neseler, manze letan i neseler pou kapab fer pei kontinyen roule pou en peryod letan.

Mr Speaker, 'Sesel i pou tou son Zanfan' ti tenm ki *LDS* ti servi pandan kanpanye. E i reste relevan ozordi, e a sa moman dan listwar nou pei. Akoz mon dir sa Mr Speaker, se akoz ler nou antann Prezidan dir ki pou annan reform dan lafason ki *GOP* i ganny donnen, i montre nou ki i vre, sa ladministrasyon i oule fer Sesel reste pou Seselwa.

Ler nou ganny dir ki dan sa proses, travay pou ganny ofer avek Seselwa avan ki en etranze i vin dan Sesel, pou li benefisye avek sa resours presye, limite ki nou *forex*. An

dizan sa Mr Speaker, mon oule lans en lapel avek Minister Lanplwa, pou pa aprouv okenn *redundancy* si sa i vize ver Seselwa. Nou bezwen get *redundancy* vize ver bann etranze avan, e apre nou ava vin lo nou bann travayer Seselwa.

(APPLAUSE)

HON CLIFFORD ANDRE

I annan bann lotel 5 Zetwal Mr Speaker ki oule fer *redundancy* e zot pe target Seselwa. Fodre pa ki Departman Lanplwa i aprouv sa kalite program. Fodre ki Departman Lanplwa i pa les koripsyon antre, e les zot ganny motive par diferan kalite *perks* ki bann propriyeter gro letablisman i ofer zot.

Prezidan in dir ki koripsyon fodre pa ki i met nou pei an retar. Sa departman i enn ki devret ganny get ladan seryezman. Seselwa ki pe travay, bezwen kontinyen travay otan ki posib. Bann investiser, ki'n ganny zil e posibilite pou fer biznes isi Sesel, nou kontan ki zot in anmenn zot larzan dan nou pei.

Me fodre ganny kler ki zot pa vin kas nou Lalwa. Mon oule lans en lapel avek bann O Zofisye dan Minister Lanplwa, pa dir avek travayer Seselwa ki bann investiser etranze i kapab

fer sa ki zot oule akoz zot larzan i pou zot.

Sa i pa vre, investiser etranze i bezwen e mon repete bezwen respekte Lalwa Sesel. Pwen final! E ou sa DG, ou sa PS ou devwar se pou aplik Lalwa Lanplwa, non pa pou fer faver sa investiser.

Pa fer sa travayer soufer, me permet Lalwa ganny aplike dan tou son splander. Mon koz koumsa Mr Speaker, akoz dan sa detrwa zour apre Leta nou Nasyon ki dan mal parey nou'n ganny dir, mon soke pou mwan aprann bann mannigans ki pase dan nou pei. E set a sa pwen ki mon oule tous lo size koripsyon, ki Prezidan in koz lo la Vandredi pase.

Mon osi zwenn Prezidan pou demande ki Komisyon Koripsyon i akseler zot travay pou elimin sa fleo, ki met nou pei an retar e kout nou en fortin ki ti a kapab antre dan nou lekonomi e fer nou pei bokou dibyen.

Mon personnelman pa krwar ki eliminasyon sa *Board* ki govern Anti-Koripsyon i en bon *move*. Mon dir sa, akoz menm si mon krwar ki nou vremen bezwen sa 7 investigater, me mon krwar ki sa *Board* i nesaser akoz i zet en koudey lo travay ki sa Komisyon li menm i pe fer.

Koripsyon Mr Speaker i kapab ariv partou, e si napa *Board* tou pouwar i pou reste lo en sel dimoun. Alors se li ki pou deside sa i danzere. Mon ti ava demann Prezidan pou rekonsider sa pozisyon e kit sa *Board* an plas pou asire, ki annan en vre sipervizyon lo bann *case* koripsyon, dan nou pei e ki keksoz pe bouze.

En lot laspe ki Prezidan in dir, ki mon pa dakor avek se sa dele letan ki in donn Komisyon Anti-Koripsyon letan pou travay, si non dan Leta Lanasyon 2022 i ava vin dir nou, ki sa Komisyon pou nepli egziste.

Mon pwen ki mon ti ava pli kontan tande sete, si sa bann dimoun ki pe travay dan sa Komisyon pa delivre rezilta, sa i ava montre ki nou pou bezwen sanz zot e rod lot Seselwa konpetan pou delivre pou nou pei. Nou pa zet pti baba avek delo sal. Mon oule ki sa ki mon pe dir i ganny pran dan bon lespri.

Sesel i pou tou son zanfan e mon sir ki i annan Seselwa la ater ki pare e kapab fer sa travay, si posibilite i ganny donner avek zot. Parey mersener i dir, "I annan bokou pozitiv la ater".

Mon apresye ki i annan bokou defi Mr Speaker. Mr

Speaker Sesel ek Seselwa in tann bokou disparisyon larzan, me nou pa vwar personn pe rann kont. Pourtan larzan *tax payers* pe ganny servi pou pey saler sa ki sipoze pe rod e *deal* avek koripsyon.

Mr Speaker, nou war tou sord kalite leskiz i ganny donnen. Rezondet par deryer kreasyon en tel Komisyon sete pou fer retournen larzan vole dan nou pei e apre met sa ki'n vol larzan nou pei dan prizon. Napa nanryen konplike ladan. Mwan koman en Avoka Mr Speaker, mon konn tre byen e mon pou fer resorti si en *case* i ganny anmennen Ankour, e napa levidans pou asir en konviksyon, me sa i mon rol e mon devwar.

Bann antite ki fer envestigasyon bezwen fer zot travay byen. Pa blanm lezot lebra ou Lalwa ki pe gid zot. Me fer zot travay. Wi mon konnen, mon konnen e konpran ki pou annan toultan defi. Me se imen ki sirmont defi e mon pou dir ki Komisyon Anti-Koripsyon pe pran tro bokou letan pou fer son travay e pe met sa blanm lo Lalwa ek resours.

Mon oule fer resorti ki tou departman ek lorganizasyon i annan defi, me zot sey fer keksoz marse. In plis ki ler, pou sa Komisyon aret donn leskiz e

fer son travay ki'n ganny mandate.

Zidisyer in ganny mansyonnen dan diskour Leta nou Nasyon. Mon profesyon i anmenn mwan pou pas bokou mon letan dan sa lebra Gouvernman. Mwan mon le felisit nouvo Sef Ziz, i nouvo wi e i en zenn Seselwa avek leksperyans. I normal dan proses serten sityasyon pa pou fer plezir tou dimoun.

Me mon oule reasir Sef Ziz, ki mon pou donn li tou mon sipor pou fer ki lazistis i ganny fer. Mon oule demann li avek Prezidan Lakour D'Apel pou reste *focus*, e asire ki Lalwa i ganny aplike *comme il faut*.

Lendependans Zidisyer i merit ganny mentenir i pa devret ganny konpromi a tou pri. Si en antite ki fer lenvestigasyon i pa fer son travay byen e Avoka Ankour i fer resorti sa bann pwen, i devwar konstitisyonnell Lakour pa kondann sa akize.

Mon dir e mon pou repete, sa antite lenvestigasyon bezwen fer son travay byen, si i oule asir en konviksyon dapre Lalwa. Prezidan in mansyonnen ki koripsyon fodre pa i egziste dan Zidisyer, mon san pousan dakor avek sa.

Akoz napa plas pou sa kalite konportman dan nou pei.

Mon a sa staz demande ki bann striktir Lakour e bann Ziz Lakour D'Apel i ganny revwar.

Air Seychelles Mr Speaker, *Air Seychelles* i reste en topik vreman sansib. Tou fanmir enkli mwan, nou annan dimoun ki travay dan sa lakonpanyen, e se la kot nou bezwen balans lentere nou fanmir e lentere nou pei.

Bann zenn travayer devoue, ki fek komans travay avek *Air Seychelles* e zot anvi fer en karyer dan sa domenn. Me nou bezwen osi realis anver pep Seselwa, lo si nou pou kapab soutenir en det plis ki R800milyon, lo latet sa menm dimoun ki pe travay avek *Air Seychelles*.

Mon krwar ki bann keksoz swivan, bezwen ganny fer si i pa ankor ganny fer. I enportan, i enportan Mr Speaker pou nou tou ede revwar sa sityasyon ki *Air Seychelles* i ladan ozordi. A sa staz, a sa staz mon ti ava kontan remersye sa bann staf *Air Seychelles* ki ti dakor pou zwenn avek bann MNA rezyon Les, nou miting ti enn, ki'n vreman anmenn serten laklerte lo lafason panse.

Mon oule fer resorti ki apre sa miting ki ti ale ziska apre 10er diswar, mon oule demann osi Gouvernman pou angaz sa lakonpanyen dan en

diskisyon kot zot a vwar li, sa lakonpanyen ki anploy plis ki 700 dimoun, i bezwen reste e kontinyen fer *the Seychelles Spirit* anvole.

Se a sa pwen ki mon pou demann tou dimoun pou pran serye sa lapel pou nou fer flote nou paviyon Nasyonal, ki osi port menm kouler ki lo nou avyon *Air Seychelles*.

Sa i ava en sipor pou *Air Seychelles* e tou son *staff*. Mr Speaker lesplikasyon ki mon'n gannyen, se menm si Gouvernman i ferm *Air Seychelles*, sa det ki nou annan pou reste.

Alors i meyer pou nou rod fason pou fer sa lakonpanyen kapab *meet* son bann *operating cost*, sa Mr Speaker i en keksoz ki sa lakonpanyen in fer e pe vwar rezilta depi 2017. Rezilta in vin an 2020. I nesese pou fer resorti ki kantite staf dan *Air Seychelles* i posibleman bezwen osi ganny revwar. Me sa i kapab ganny fer par faz. *Air Seychelles* fek sanz son sistenm *booking* ek *check-in*.

Ki pe fer en *savings* enorm. E a sa pwen Mr Speaker mon ti ava kontan felisit sa tim Seselwa e antyerman Seselwa ki'n fer sa tranzisyon. E sa tranzisyon in al tre byen.

Konsantrasyon lo domestik e *ground handling*, pa

pou fer bokou sans aköz parey mon'n ganny dir saler i sorti kot tou lede *international* avek domestik. *The Seychelles Pride* bezwen kontinyen anvole, e nou bezwen fer bann ki'n *mismanaged* rann kont. Seselwa i anvi war nou pei reganny son souf. E nou avyon kontinyen pers nyaz.

Prezidan Mr Speaker in fer Leta nou Nasyon apre 89 zour, ki'n pran Sesel e in dir ki en Prezidan nouvo. Si nou kapab fer sa bann sanzman e rektifikasyon, pandan sa pti dele letan e ki Gouvernman in fer *savings* enorm pou nou pei, Sesel i vreman dan bon lanmen. Parey in ganny dir ki lekonomi Sesel pa dan bon, e sa pa lot ki nouvo Gouvernman anba direksyon Prezidan Ramkalawan ki pou fer lekonomi Sesel rebran.

Sa sete aköz i enportan pou annan en mekanizm ki pou fer Sesel avek Seselwa prodwir pou nou Nasyon. Nou bezwen kontinyen ankouraz Seselwa, pou fer sa ki byen. An dizan sa mon oule dir ki sa *statement* ki Prezidan in dir, ki nou pa devret demande ki nou pei i kapab fer pou nou, me nou devret demande ki nou kapab fer pou nou pei. I enportan fer resorti ki ler Gouvernman pe demann bann dimoun ki lwe lakaz ek

lofis avek Gouvernman zot bezwen donn en rediksyon, avek Gouvernman.

Me i nesaser pou demande osi, ki ler sa pe ganny fer lotorite i bezwen gete si sa bann dimoun pe osi servi sa larzan pou pey zot *loan*, ki posibleman zot in pran pou fer sa bann lakaz.

An dizan sa mon oule demann bann lakonpanyen Gouvernman, tel ki Fon Pansyon ki annan batiman ki zot pe lwe avek bann pti biznes, pou zot osi revwar pandan sa bann moman difisil, e kot sa bann biznes pa pe fer profi. Aköz zot pa pe ganny permisyon pou ouver zot biznes e fer larzan pou Fon Pansyon e lezot redwir bann *rent*.

Aköz mon sir, ki sa bann biznes napa larzan ditou menm pour zot pey saler zot travayer. Linite Mr Speaker i reste lakle dan nou pei. E i nesaser ki nou annan sa linite antre nou, bann sitwayen Seselwa se sa lakle devlopman e osi lekonomi.

Si nou pep pa inifye, i pou pran plis letan pou akonplir en lobzektif ki ti kapab ganny akonplir dan en letan pli kourt.

Mr Speaker, Prezidan in dir nou ki pou annan Kontra ki pa pou ganny renouvle. Sa i anmenn bokou soulazman pou bokou dimoun, aköz zot pa'n

ganny byen servi par serten *public servant*.

Ler en *CEO* i pas kot dimoun pandan eleksyon e pe fer kanpanny pou en parti politik, e i servi son pozisyon profesyonnel piblik pou li lenfliyans voter, e i donn zot en permisyon dan 15 minit kan in refiz zot sa menm permisyon pandan 2an, sa *CEO* son Kontra pa devret ganny renouvle. Akoz pou mwan i labi pouvwar Mr Speaker.

Annefe son Kontra pa senpleman, son Kontra pa senpleman pa devret ganny renouvle, me sa dimoun i devret ganny sarze pou labi pouvwar ki'n fer dan lofis. Lenvestigasyon devret ganny fer pour montre konbyen dimoun in fer soufer, baze lo afilyasyon politik.

Prezidan in dir kler ki ler ou vin travay kit ou politik kot ou. Travay pou sitwayen e sa Seselwa ki pe leve e debourye pou met manze lo latab son fanmir.

En lot eleman ki nou bezwen get for ladan, se si en dimoun ki sipoze pe travay koman en *DA* dan distrik, i dir en dimoun ki vin kot li ki si sa proze pa pe ganny fer, se ou *MNA* ki pe ser larzan. Me an dot mo si ou siport sa parti politik ki li i pe fer kanpanny pou ou, e

ou pou donn lanmen zour eleksyon pou anmenn dimoun vote, proze i ganny fer vitman. E *MNA* pa konn nanryen.

Mon demann Minister Gouvernman Lokal pou fer envestigasyon dan sa bann tel labi, e nou pou vwar kote larzan in ale.

Mon pa pe demann zis lenvestigasyon, me mon osi demann ki aksyon apropiye i ganny pran avek bann ki responsab e ki lazistis i osi pran plas. Sesel in sibir bokou labi. E se nou pep ki'n soufer, bokou dimoun ti pou dan bann pozisyon diferan sosyalman, si zot bann pti proze ti'n ganny aprouve e zot ti pou posibleman kapab fer bann kontribisyon sibstansyel ozordi dan lekonomi nou pei.

Me se akoz bokou zot rev in ganny brize akoz zot krwayans politik. Mon ti ava demann Minister Gouvernman Lokal pou fer sir ki *DA* dan distrik i vin travay enparsyel parey bann *MNA*, ki malgre nou'n ganny elekte par Manm e voter ki siport nou parti. Nou pou delivre pou tou dimoun dan nou distrik, ki dan bezwen. Sa i la fason ki mwan mon pe travay.

Mr Speaker fer en sitwayen reste dan lafreyer akoz in dir kot Ladministrasyon

Distrik ek *DA* pou fer laranzman pou koup en pye dibwa ki danzere lo son later, e ki nanryen pa'n ganny fer pou bokou letan. Me dan Bidze i annan larzan pou *tree felling*. Sa dimoun in bezwen aprezan ekriir Prezidan Larepublik pou ganny en remed. Eski se sa fason ki en *DA* i sipoze travay?

A sa pwen mon oule fer resorti, ki mon kontan ler Prezidan resaman in donn direktiv lo la fason ki *DA* i pou ganny anploye dan distrik.

Si i pa delivre, nou ava rod en dimoun ki pou delivre pou pep nou distrik. Mr Speaker, pandan sa 4 dernyen lannen dan Leta Lanasyon e dan Bidze mon'n toultan fer referans lo semen Dan Gravye ki al Dan Kreson.

E mon'n menm anmenn ansyen Prezidan Faure pou vwar difikilte ki sa bann zabitan i pas ladan, me nanryen pa'n ganny fer. Mon kontan, pou fer resorti ki letan bokou proze pe ganny bann difikilte *wayleave*. Lafanmir zeritye Edmond in vin devan e ofer par zot propriyete pou permet fer sa semen. Me mon osi konnen an se moman nou pou bezwen rod finansman alternativ pou fer en tel proze.

Me mon oule dir avek lafanmir Payet pou pasyante, pou pasyant ankor en pe aköz

anba direksyon Prezidan Ramkalawan keksoz pou bouze.

Egalman mon oule dir avek lafanmir Pillay bor lanmer, ki si i pa ti Prezidan Ramkalawan sa proze drenaz pa ti pou komanse. Mon konpran zot soufrans tou sa letan, e difikilte ki zot in pas atraver.

Me finalman keksoz pe bouze. Mon oule dir avek lezot dan semen Uranie/Esparon ki zot tour pe vin aköz mon pa'n bliy zot. Mon'n fer en vizit avek lotorite konsernen resaman, e zot proze i lo *drawing board*. Permet nou pei pou pas atraver sa sityasyon difisil e apre keksoz i ava ganny fer.

Nou byen kontan Anse Aux Pins ki finalman sa proze bazar pou komanse.

Sa i en proze ki pou benefisye bokou dimoun aköz Anse aux Pins i sa pon *drive* dan sid. Mon oule osi fer resorti ki Gouvernman i get dan sa sityasyon lakaz ki'n ganny *crack* avek devlopman Ile Soleil. Sa bann dimoun pe espere, pe esper tro bokou letan.

Permet zot osi zwir zot propriyete aköz zot pa pe vin pli zenn, me zot pe vyei e zot ti avan kontan vwar zot lakour an sekirite. E ki ler lapli i tonbe delo pa antre par sa bann *crack*.

Lakaz Mr Speaker, yer Onorab Gabriel in dir nou, ki dan son distrik Pointe Larue ki mon vwazen, pou annan byento distribisyon lakaz e i pe demande ki sa i ganny fer byen. Sa i anmenn mwan pou demann serten kestyon, akoz sa i montre ki dan lefase ti annan serten keksoz ki ti mars mal, dan la fason alokasyon lakaz ti ganny fer.

Mr Speaker fodre nou admet ki lakaz ti en zouti politik e si ou ti siport parti ki ti o pouvwar ou ti *ok*, e ou ti ganny avan sa ki pa ti siport sa parti politik ki ti o pouvwar.

Sa mon osi demande ki i le pli leka. Mon oule demann avek Minister Lakaz pou angaz *MNA*, *DA* dan diskisyon alokasyon lakaz, akoz nou ki pli konn nou zabitan. E zot vin kot nou, pou rod soulazman ler zot dan bann difikilte lakaz. Bann *MNA* ki tann tou sa soufrans e nou bezwen annan sa posibilite pou soulaz zot bann soufrans.

Be si nou pa form par sa tim alokasyon koman bann Manm Elekte, alors nou rol dan distrik i pou osi bezwen sanze. Mon kit sa avek ou Minis Rangasamy, me konnen ki ou'n vwar rezondet dan sa ki mon'n dir. Sa i osi aplik pou bokou lezot servis ki Gouvernman i

donnen koman alokasyon later e lezot.

Dan sa laliny mon oule tous lo sa size *part rental*. Mon konnen ki lentansyon Prezidan se pou fer sir ki bann ki ganny asiste i bann ki merite. Sa sistenm in osi ganny servi pou gen politik.

Ler ou vwar ki avan Zen ti annan 160 dimoun, e pandan kanpany sa in monte plis ki 300 dimoun, sa i relye avek mannev politik Mr Speaker.

Gouvernman bezwen donn lasistans bann ki bezwen e pa donn sa ki pa bezwen. *URS: URS* Mr Speaker mon oule dir ki se la kot in annan bokou labi pou rezon politik. Pandan dernyen eleksyon dimoun ti ganny mete lo *URS* senpleman pou vot pour parti *US*.

Dimoun ti ganny pran e ganny peye anba *URS* pou travay dan biro serten kandida *US*. Eski sa pa labi resours Gouvernman? Mon ankor enn fwa demann Minister konsernen pou fer bann lenvestigasyon apropiye e fer sa bann ki responsab *accountable*.

Eski Mr Speaker en lakonpanyen prive ki pe fer en Kontra kot en lotel 5 Zetwal, i kalifye pou ganny travayer peye par larzan Leta anba *URS*?

Sa i klerman en labi, e sa bann dimoun ki responsab aksyon bezwen ganny pran kont zot. Fodre nou nepli les dimoun donn bal dan larzan *tax payers*.

Mon pa pou toler en keksoz koumsa arive ler mon *MNA Anse Aux Pins*. Larzan sa pep i pou sa pep e pa pou ganny partaze avek en pti group. Mon kontan lapros ki pe ganny pran konsernan *URS*. Mon oule dir avek sa zenn ki'n teks mon yer an referans avek sa *issue URS*, pou li pran kontak avek Minister Lasante, pou gete ki manner son sityasyon ava kapab ganny rezourd.

Mr Speaker, lo kote *rent* nou'n ganny dir ki Gouvernman i depans bokou, dan *rent* parey mon'n dir avan e zot pe demande, zot pe demann bann dimoun ki *rent* avek pou asiste Gouvernman.

Anse Aux Pins Mr Speaker, semen ek netwayaz dan distrik. An montan Anse Faure napa okenn netwayaz semen ki pe ganny fer, parey ti le ka oparavan. Sa pe fer bokou dimoun fristre. Mon'n anmenn sa a latansyon Minis Lanvironnman pou li get ladan. Bann semen ki ti annan kontrakter pe netwaye, pa pe ganny fer dan lezot sou distrik. E dan tou kwen nou distrik.

Mr Speaker, mon vin lo sa fame *FA4GR*, mon kontan ki sa program pe ganny revwar. Mon annan lenformasyon, ki serten gran letablisman lotel, ki pe ganny *FA4GR*, zot annan lentansyon servi sa larzan ki zot pe gannyen anba sa program pou *fund* zot loperasyon, rezervasyon ki zot anvi tire Sesel e anvoy *Dubai*. Ki zot pe fer *Dubai* e larzan pou ganny servi pou *fund* sa loperasyon *Dubai*. Mr Speaker, sa i inakseptab.

Mr Speaker, Sesel i bezwen gard Seselwa dan lanplwa e alor Departman Lanplwa, pa dir ki si investiser in vin investir dan nou pei, i kapab fer sa ki oule aköz son larzan pou li.

Sa i fo, investiser i bezwen respekte Lalwa Sesel e sa bann dimoun kot Lanplwa fodre zot arete fer sa ki zot pe fer. I neserer pou lapolis ek Anti-Koripsyon get en kou dan sa bann sityasyon.

COVID-19 Mr Speaker: Kot i konsern sa pandemik *COVID-19* mon oule remersye tou dimoun ki pe fer zot mye pou esey met sa sityasyon anba kontrol.

I enportan pou fer resorti ki sa program vaksinasyon i enn ki pou fer Sesel fyer. I enportan pou dir ki bann

letablisman touristik e sirtou bann lo zil, fodre zot fer sir ki zot staf i pran sa vaksen, afen ki zot osi zot ava proteze ler ki nou lafrontyer i la, i kouraman ouver.

Lazenes Mr Speaker, mon oule dir avek nou lazenes, ler mon pe konklir pou zot pran zot ledikasyon, zot travay, zot fanmir serye pou ki Sesel avek Seselwa ava benefisyé. Sesel i pou reste pou tou son zanfan. Mersi Mr Speaker.

(APPLAUSE)

MR SPEAKER

Mersi Onorab. I reste nou 22 minit, non 17 minit dan sa sesyon. Mon pa pou pran en sans lo Onorab Labrosse. Mon ava anvoy li pou nou *Sitting* apre. Nou ava poz lo la e nou ava rebran 3.45. Wi, Onorab Pillay.

HON SEBASTIEN PILLAY

Mersi Mr Speaker. Mr Speaker zis atraver ou mon ti le pas en pti lenformasyon ki petet ou kapab ed nou avek. Mon'n resevwar detrwa konsern *from* bann dimoun en pe pli aze ki pe pran zot vaksen. *Regarding* bann latant dan laliny e pou zot ariv kot pou zot pran vaksen.

Petet mon ti ava, sizere ki i annan bann *advisories*,

oubyen bann lenformasyon ki ganny donner tanto. Pou ed bann dimoun sirtou pou zot kapab ler zot pe desann, mon'n ganny detrwa en bon pe dimoun ki'n anvoy mesaz oubyen ki'n teks.

Ler mon'n sorti la annefe mon'n al pran en *call*, lo sa size. Mersi Mr Speaker.

MR SPEAKER

Wi, mersi. Selman mon krwar Minister Lasante i okouran sa. E i annan en problem ki dimoun pa tro respekte, lenstriksyon ki zot gannyen. So nou ava les zot *deal* avek sa. Mersi. Parey mon'n dir nou ava rebran 3.45.

(BREAK)

MR SPEAKER

Nou a ekout Onorab Richard Labrosse.

HON RICHARD LABROSSE

Mersi Mr Speaker. Bonn apre midi Mr Speaker. Bonn apre midi tou bann Manm prezan. Bonn apre midi tou bann ki a lekout, e en bonn apre midi spesyal Mr Speaker, i al pou mon bann zabitan lo mon bastyon byenneme Plaisance.

Mr Speaker lannen ki'n pase 2020, Sesel ti selebre 250an depi son premye zabitan

ti debark lo nou zil. En Letan kot lavi modern ti ankor en rev pou zot. 250an apre Sesel in vin en Nasyon miltirasyal, diferan ras ki'n anmenn osi diferan lopinyon, diferan fason vwar keksoz.

2020 in osi kree en lot moman istorik, pou nou zenn la demokrasi dan Sesel. Mr Speaker kot sa ti anmenn kot senkyenm Prezidan pei ti ganny elekte pou la premye fwa dan en fason la demokratik, ki'n reprezant vre swa Lepep Seselwa.

Senkyenm Prezidan Sesel Mr Speaker ki Lepep Seselwa ti met zot konfyans ladan, ki osi annan enn parmi konman son responsabilite se pou adres Lepep Seselwa tou le lannen avan ki Lasanble Nasyonal i konmans son biznes. Sa i dan en diskour ki'n ganny nonmen konman diskour Leta Lanasyon. Se sa lokazyon ki Prezidan i gannyen pou vin koz ek son pep lo vre Leta son Nasyon.

Wi Mr Speaker mon repete vre Leta nou Nasyon. Pa vreman bann zoli parol parey serten kekfw ti a espekte li vin dir, parey bann pti parol komik, kekfw i annan ti pe espekte vin tann pou annan data dan TATA, tinel anvil ziska sepa ki bor i pou arive. Me sa i

pa vre realite ki Sesel i ladan ozordi. In plito vin fran, vin dir nou fran ki kwa ki vre larealite ki Sesel pe pas ladan. E kwa ki'n vin zwenn ler in vin pran lofis.

Mr Speaker konman nouvo Manm Elekte pou distrik Plaisance i en plezir pou donn mon premye repons diskour Leta Lanasyon fer par Prezidan Wavel Ramkalawan isi dan sa Lasanble Vandredi pase.

Mr Speaker apre bokou refleksyon lo sa diskour byen for, ki'n tous bokou dimoun an deor, ki mon'n deside pou mon konsantre mon repons lo en tenm spesifik, pou mwan adres mon distrik ek Lepep Seselwa ozordi.

Mr Speaker rezon ki mon'n swazir en tenm, se pou nou an osi demar mon premye konversasyon avek mon zabitan. Tenm ki mon'n swazir pou reponn Prezidan Larepublik lo son Leta Lanasyon i lazennes ver lavenir.

Mr Speaker ki pi bon fason pou lazennes Seselwa espesyalman lazennes Plaisance pou reflexir serye lo son lavenir lo lavenir nou pei e lavenir nou fanmir, e lavenir ou konman en endividi.

COVID-19 in kree en ta panik partou dan lemonn. E sa

byensir in fer ki sak pei in revwar lafason ki zot fer keksoz.

Me vokabiler prensipal ki nou pe tande partou kote an se moman se nouvo normal, nouvo fason fer. E pou byensir i annan ki pou ganny afekte avek sa bann nouvo fason Mr Speaker. E nou bann zenn la i le moman pou fer sa ki move vin pli bon dan en fason pli pozitiv. Parey nou dir pran negativ annou netway li pou fer li vin pozitiv.

Mon konnen i annan en bann ki'n deza revwar lafason ki zot reveni pe antre bann pti biznes dan mon distrik, Mr Speaker, ek zot fason inovativ ki zot pe vwar en lot fason kot reveni i kontinyen antre. Kantmenm bokou ti pe kriy *lockdown*, ki mon konnen parfwa bann politisyen anbisye i bliy bann ki napa naryen oubyen kekfwa parey dan en sityasyon parey kot zot pou *stand*, akoz zot politisyen mon asire zot in fini annan zot, zot *backup* ler ou tann zot pe kriy *lockdown*. Zot pe bliy sa pti Seselwa deor.

Mr Speaker nou pei an se moman vwar li dan en sityasyon kot i pa pou kapab donn nou pwason parey nou ti abitye, me mon vwar li plito i pou kapab donn nou laliny pou nou al lapas nou pwason.

Aprè plizyer lannen ki en sistenm ki'n fer nou krwar ki asize, ki tou keksoz i vin lanmenm ouswa ki nou pa kapab lapas pwason nou menm, zot bezwen anmenn pwason pou nou, ziska dan berso, ziska dan ou latonm. E lanmenm ler la zot ti annan lanvi pou zot al plant pwason tou.

Mr Speaker lazenes i touzour nou rev pou nou annan en travay nob ki nou fer li avek lanmour e byensir avek en rekonpans ki vin avek. Parske nou tou nou konnen dan lavi konmela, pou ou aste en konmisyon dan laboutik si ou napa larzan i napa valer.

Pou ganny en saler me ki nou'n vreman reve e fer bokou sakrifis pou *achieve* li osi, avek bokou sakrifis pou bann dimoun ki'n etidye pou zot ariv kot zot ete dan lavi.

Me parfwa sa ki nou toultan anvi ki nou gannyen ki lo *market*. Mon pou osi Mr Speaker remarke ki dan mon distrik osi mon'n vwar en ta zenn tou dernyerman ki'n angaz zot osi dan sa programm *URS*. Me selman en keksoz ki mon'n remarke ki sa programm in pa'n sitan donn zot sa skil, sa bagaz pou zot kapab ganny en lanplwa. Me parey nou konnen

nou fek sorti dan en moman eleksyon tou keksoz ti *ok*.

Mr Speaker sa bann zans in touzour annan en in touzour zwe avek lanbisyon ek lavenir lazenes sa pei. An 2020 pa tro lwen ki'n pase, zot ti ganny lodas dir ki zot pe vin met en zenn zonn lo tapi. Non sey dir mon ki kalite Gouvernman ki i annan lentere son zenn aker ki pou atak enn son zenn ki'n vwar li pe vin dan en pa dan en semen pozitiv, ki e sirtou en louvraz nob ki pou anmenn lavwa son zabitan devan.

Sa ki pli sagrinan par sa zot pou al trenn en dimoun ki ti dan son retreat Mr Speaker. Ki pe repoze apre plizyer lannen ki sa madanm in travay.

Mr Speaker si a pa voras pouvwar ki mannyer i apele? Me sa ki mon vreman apresye Onorab Ghislain zabitan Plaisance in met zot dormi ater lo tapi!

(APPLAUSE)

HON RICHARD LABROSSE

E mwan menm krwar sa voyaz pou lavi.

Zot a pran zot retreat Parti *SPPF*, les Lepep Seselwa trankil. Sa parti in touzour pran nou pou bann zenn konman zot yoyo politik, ler zot anvi zwe en kou ek nou zot larg lakord en

kou, la ler zot anvi anmare zot ser lakord en kou! Lazenes Seselwa lemoman in finalman arive, sa sanzman ki nou ti pe rode.

Annou koste pou re aranz nou pei ki sa bann zans in kit li parey en kales kase, ki vreman degoutan pou gete. Ladan menm Mr Speaker zot le nerve tou ler nu dir zot, zot in kit nou parey en kales kase! Be ale, nou a dir zot, zot in kit nou ek en *BMW* oubyen ek en *Mercedes*.

(laughter)

HON RICHARD LABROSSE

Bann zenn paran dan mon distrik ki leve tou le bomaten pou zot rod zot dipen pou zot met lo zot latab zot fanmir - wi mon konnen bokou zot, zot fer sa parkour tou le bomaten Mr Speaker. Mon'n vwar zot ek sa determinasyon pou zot kapab met en dipen lo zot latab.

Mon'n osi Mr Speaker touzour kestyonn sa demann mon lekor a Gouvernman ki'n la pou 43an, kwa ki ti vin dan zot lespri pou zot krwar ki sa Seselwa en *minimum wages* Seselwa ti pou bezwen R5mil ouswa R6mil? Selman get zot lapey ek pou zot bann dalon? *Anyway*.

Sanmenm sa ki en madanm Copolia fek met devan mwan semenn pase ler nou pe dyaloge lo telefonn Mr Speaker. Mr Speaker ler mon asize mon kalkile, sa bann zafer lapey koumsa zot in donn Seselwa la ti zis en latrap pandan tou sa bann lannen. Rezon par deryer ou a kontinyen vin kot zot pey mon bil, aste mon pwason, pey isi, pey laba. Ou, ou a touzour vin mandyan pou zot kapab manipil ou mannyer zot anvi plezir.

Eski sa lapey R10mil sa letan kot pei ti pe fer tre byen, dapre zot pa ti ale avek Seselwa ordiner parey zot kontan dekrir nou? Ti ale zis avek zot? Bann gro manman *allowance* ki menm mon'n aprann ki serten PS dan Gouvernman ki ti sipoze - konmsi pe sipoze - i annan bann travayer ki ti sipoze travay anba li, ki pe delivre plis ki li, li i pe zis asize donn lord, in okip son lekor byen in donn li son manman *fat allowance* ki pe anmenn dan lakour toulezour.

Bann *staff* ki pe travay dir anba zot, pe sibir bann gro zekli sa kales kase Mr Speaker. E ler mon lo sa topik lanplwa, nou Prezidan in osi fer sorti Polisi lo GOP. Mon'n toultan siport mon travayer Seselwa, akoz sa dan li menm i pe donn osi bann zenn en sans pou zot kapab devlop

zot lekor e montre zot talan osi ki zot annan. Ouswa en lot dimoun eksperyanse en sans pou li avans devan.

Ki nou'n vwar dan lepase dan bokou ka, nou dimoun lokal, nou prop Seselwa i reste deryer, se zot nou Seselwa Mr Speaker ki lamazorite ditan ki pe montre sa bann etranze mannyer pou travay.

Me sa bann etranze zot, zot pe ganny plis saler ki nou. La enn mon zabitan yer swar fek fer mon okouran pou dir mon dir sa pou li, mon bezwen dir akoz mon zot lavwa dan Lasanble kot PUC osi Msye Prezidan mon krwar laba ou bezwen get en pe sa ta *expatriate* ki i annan, eski i pa ankor ler pou Seselwa devan?

Ki rezon ki Gouvernman in met sa bann dimoun, in fer sa bann dimoun vin isi? Ki rezon zot pa'n *train* nou bann Seselwa. Zot in kree URS se pourtan. Mon krwar zis SPPF menm ki pou kapab konpran bann dimoun Mr Speaker.

Gouvernman fodre get en pe serye kot bann etranze ankor pe dominan osi Mr Speaker parey mon'n dir, *re-skilling* serye i merite. E li sa etranze ki pe pli byen benefisyé lo tou nivo Mr Speaker. E osi nou konnen ki annan plizyer zot sa bann

etranze ki pe manipil nou bann Seselwa Mr Speaker.

I annan bann landrwa travay kot menm pou zot donn en dimoun en papye pou tyonbo, zot balans ater zot fer Seselwa anmase. Sa bann latitud koumsa mon krwar nou bezwen arete enn fwa pou tou dan sa pei.

E zot menm zot Mr Speaker, zot pe ganny tiket avyon tou pou al konze ale, vini deor, san oubliy nou resours ki zot pe nou resours *forex* zot pe met presyon lo la.

Lakaz zot reste ladan, ou sa Seselwa ou mon pa konnen ki manner, en *teacher* Seselwa avek en *teacher* etranze ler ou demann en ta keston. zot ganny manze, *allowance* tou zafer. Alors li sa Seselwa li i ganny zis sa pti lapey lafen dimwan ni menm en pti tiket pou li al Praslin i pa gannyen pou li ale ek son fanmir Mr Speaker. La nou sans Seselwa, montre nou talan. Ler sa bann zafer *GOP* i ganny met an plas lo la, annou montre vin devan, annou travay dir pou nou ansanm montre ki nou osi nou annan valer dan nou pei.

Bann zenn la en lot loportinite ki sa zonn ki zot in met *State House* le 24 Oktob pe ofer zot. Annou met an pratik sa bann bon disiplin ki nou

paran ek nou bann ansenyan ti montre nou.

Mr Speaker ler mon koz lo ansenyan la mon mazin mon profeser matematik Sir Sebastien Pillay ki ti fer mwan matematik pou 2an pou Lekol Mont Fleuri Segonder.

(Non, mon dir li *Sir* Onorab Ghislain). La Mr Onorab Pillay mon ti a kontan zis adres ou atraver serten mon bann nou bann koleg ki ti dan laklas. Mr Speaker les mon zis koz zis 5 minit lo sa silvouple. Ler nou ti lekol Mont Fleuri Mr Speaker, ler nou ti annan ler laklos ti sonnen ler nou ti vwar lo nou *time table* nou ti annan matematik, tou manmay ti taye ti al asize dan son plas. Akoz en boug serye ti pe vin fer nou leson la. Pa en mis ki nou ti pe vin rikann avek.

Me ozordi ler mon get dan Lasanble parler manner i diriz son lekip, mon demann mon oli li sa *Sir serye* ki ti met lord ek nou lekol, e ki'n fer mon vin sa zonn disiplin ozordi Mr Speaker!

Mr Speaker en keksoz ki Gouvernman *SPPF* in fer byen ler zot ti o pouvwar, zot in organiz byen zot lekor Mr Speaker, zot bann dalon zot bann fanmir pros zot in get byen dan *welfare* zot bann fanmir.

La mon al direk lo sa kantite *Board* ki mon'n tann nonmen dan sa pei ki i annan. Lo sa bann *Boards* ler ou pe gete lamazorite i annan menm dimoun, menm dimoun ki ou vwar zot pe fer kanpany pou zot, menm dimoun ennler ki napa menm vreman sa konesans, e sa bann travayer in fer mon konpran ki anmar zot parler lo bann serten desizyon.

Konpare avek sa bann pov *staff* ki pe demann tou Mr Speaker, mon rapel ler mon ti travay *SIBA* ozordi i apel *FSA*, *Chairman* sa Letan ti Mr Adam ki ti *Chairman Board SIBA*, sa letan.

Mr Speaker sa msye ou konnen ki i ti fer? Sak fwa i ti ganny son pti larzan *allowance* i ti partaz sa avek tou *staff* ki ti pe travay kot *SIBA* sa letan. Ou konnen ki i ti dir Mr Speaker, li in vin la, i pa ni travay la i pa ni anploye i vin *meeting* zis en fwa, so akfer i pe ganny sa larzan? Selman en keksoz ki mon pa'n gete, kantite ki i ti pe gannyen akoz nou tou nou ti ganny en pti zafer sa letan Mr Speaker. Nou ti apel sa larzan Kaptenn, nou ti ganny li tou le, le 15.

Mr Speaker, prezan mon demann mon lekor bann ki pe ganny peye en saler ek Gouvernman *plus* son *allowance Board*, par sa dan li

menm i anmenn serten lenzistis pou sa bann travayer ki byensir zot letan lazournen i plis ki sa bann manm *Board*. Zabitan distrik Plaisance i byen apresye sa lanons ki Prezidan in fer e zot pe demann Prezidan pou aksyon lo sa bann *Board* o pli vit posibil e ki sa i ava sov en pe larzan ki pe ganny gaspiye, i ava retourn dan sa bann lorganizasyon. E sa bann travayer ki travayer dan sa bann lorganizasyon direkteman, zot ava ganny rekonpanse akoz zot ki delivre, zot ki la 8er-4er i annan menm ki travay *weekend* zot telefonn i bezwen ganny anmase ler zot ganny *call*.

E sa dan li menm in kout 36milyon ki ti kapab al lo lapey sa bann travayer ek dan sa bann lorganizasyon. Eski sa pa en lot kales kase *SPPF*?

E zansla Mr Speaker zot in byen organiz zot lekor. Mon konnen zot pa pou dakor avek sa mo kales kase, me selman se sa ki zot in kit nou pti bizou Sesel ladan. Byento Mr Speaker. Nouvo Gouvernman pou ganny li 100 zour dan lofis.

Me ler mon pe gete ou a krwar in plis ki sa. Bokou keksoz in ganny detekte, desizyon i ganny pran vit. Se sa kalite Prezidan ki Sesel ti pe rode Mr Speaker. In fer

desizyon san gete si son dalon ouswa son zanmi pou ganny pa kontan oubyen pou ganny afekte, i fer desizyon pou byennet son pei. E se sa ki i koz fran e se sa ki bokou pa kontan.

Me pa bann desizyon ki pe vin rod lavantaz politik, ki bokou in dir si Sesel ti ganny Prezidan parey pli avan, mon krwar Sesel nou ti pou kapab menm fer *lockdown* parey zot pe demande Mr Speaker. Parske nou ti pou annan larzan dan nou lekonomi, pou sak endividi asize se li. Parey Ketty Melanie avek Ton Joe i sante, “Nou ti pou dormi laport ouver!” Me solman mon pa oule dir sa lot bout.

Mon osi felisit bann Minis pou zot bann zefor ki zot pe fer partou kote zot bann Minister ek departman. Mon napa dout ki zot pe fer zot pe rankontre en bon pe defi. E selman mon konnen ki Prezidan Ramkalawan in swazir bann fanm ek zonm for Mr Speaker. E sa mon napa dout ki zot pou devlop sa bann defi e fer li vin loportinite pou zot pei e osi pou zot departman ki zot ladan.

Mon konnen zot dan en kannal movetan avek Bondye dan zot kote ek sipor Seselwa zot pou akonpli.

E Mr Speaker lo sa menm laliny mon ti a kontan osi felisit

2 Minis madanm ki sorti direkteman dan distrik Plaisance. Sa i Mrs Peggy Vidot Minis pou Lasante Mr Speaker parey Prezidan in fer sorti sa madanm pe travay san ses dan sa moman difisil ki pei pe travay ladan. Minis Vidot ansanm ek ou lekip profesyonnel zabitan Plaisance i siport ou.

E lot Minis Mr Speaker, ki’n osi pran en lot portfolyo en pti pe nob ki pou tous direkteman lafanmir, sa se Mrs Marie-Celine Zialor ki nou tou dan Plaisance nou vreman apresye li. Zot in fer nou fyer pou aksepte sa responsabilite akoz parey bann lezot koleg zot leker i bat pou zot pei.

Mr Speaker zis pou fer zot rapel i pa premye fwa ki Plaisance i donn Minis dan Gouvernman. Me Gouvernman avan mon’n remarke zot pa’n konn anmenn sa bann dimoun zot in gannyen e la dan Lasanble nou annan enn.

La zis get zis ansyen Minis Morgan, ek sa zoli proze ekselans Mr Speaker. Sa enn mon krwar ti tro for pou Gouvernman Faure anmenn.

Mr Speaker sa ki mon’n remarke ek Parti *SPPF* sak fwa zot bite ek dimoun pou zot rode la zot tay Plaisance! Mwan mon krwar in ler pou zot arete avek sa. In ler pou zot arete avek sa.

La pou Prezidan pou kandida Vis-Prezidan zot in mars port an port kaz a kaz.

MR SPEAKER

Onorab wi mersi, mon apresye me selman mon envit ou pou pa fer referans avek bann Manm ki dan Lasanble annou respekte tou dimoun. Mersi.

HON RICHARD LABROSSE

Ok Mr Speaker mon *apologise* pou sa. Wi Mr Speaker mon bezwen repet sa ki mon'n dir ankor.

Mr Speaker mon remarke ki sa bann zans sak fwa zot bite zot tay Plaisance pou vin rod dimoun ki mwan mon'n vwar sa i pa normal. La get pou Lasanble Nasyonal zot ti napa ditou kandida zot bezwen al rod en dimoun dan *retirement*. Pou Vis-Prezidan zot in mase port an port, kaz a kaz, dernyener zot in vin Plaisance menm pou vin rod Mr Loustau-Lalanne. Me selman pou tou respe ki mon annan pou li.

(Onorab Ghislain pa *disturb* mwan silvouple en?) Mr Speaker swa zot in swa i annan ki'n kit pei - Mr Speaker dan Plaisance i annan en ta zenn profesyonnel dan diferan domenn, *well* pa zis Minis ki nou'n donn zot osi pa zis bann kandida ki zot in rode ki nou'n

don zot. Nou'n osi donn zot bann zenn profesyonnel dan diferan domenn pou devlop sa pei. Ankor zot pa'n kapab anmenn sa bann zenn. Sa bann zenn pa'n kapab travay ek zot, akoz zot tro bokou enterferans politik, bokou in dir mwan sa direkteman Mr Speaker lo telefonn.

E i annan swa ki zot in bezwen kit pei al reste aletranze swa zot pe travay, swa zot pa'n kapab avek sa *minimum* ki zot pe gannyen. La mon profite osi Mr Speaker pou mwan lans en lapel avek bann zenn dan mon distrik ki pe reste aletranze. Lemoman in arive pou zot pou nou retourn dan lakour pou nou vin donn en koudmen, akoz nou pei i bezwen nou.

Vin partisipe, nou pei i bezwen ou plis ki zanmen. E la i sans pou ou zwenn lapel Prezidan Ramkalawan pou nou vin travay dir pou nou Sesel.

Mr Speaker si *Central Bank* in kapab fer son *staff* vin 100poursan Seselwa mon napa okenn dout ki dan bann lezot lorganizasyon Sesel nou pa kapab fer li.

FSA SIBA pe fer li an se moman Mr Speaker akoz lezot landrwa parey *Central Bank* ek *SIBA* pa kapab fer? E mon konnen i annan lezot lorganizasyon ki pe fer. E *FSA*

Mr Speaker in enn sa lorganizasyon ki'n ed pei bokou pandan letan *COVID* akoz son biznes i kontinyen pe marse, e Mr Speaker son *staff* parey mon'n dir 100poursan Seselwa. E mon osi fyer pou mon dir Mr Speaker, ki *FSA* i en lorganizasyon ki pe ganny dirize par 2 dimoun sorti dan mon distrik sa i son Tyermenn Mr Suketu Patel ek Mr Steve Fanny.

Bann lorganizasyon parey Mr Speaker, sa ou a dir mon ou bezwen en *Board* akoz i annan bann desizyon serye ki ou fer. Ou pa kapab fer en *Board* - plito mon pa dir.

Sa i en lot laprev ki Plaisance i kapab retenir son tit sanpyon Mr Speaker, parske nou dan nou distrik nou en laboratwar lentelizans ki a la flot!

Wi bannla nou'n kit rikord lo diferan podyonm dan sa pei, kot ou pase ou tann nonm Plaisance! Plaisance! Sportif ziska bann konpetisyon akademik dan Sesel.

Lo sa pwen Mr Speaker i fer mon realize ki mon distrik i en parey mon'n dir i en laboratwar lentelizans dan li menm. Ki'n kree plizyer profesyonnel dan sa pei Mr Speaker.

Plaisance atraver son lekol in donn Seselwa plizyer zouti. Mr Speaker sa distrik mon demann mon lekor oli sa bann dimoun? Oli zot ozordi?

Mr Speaker mon'n menm pase dan letan kanpanny, mon'n ekout zot sa bann profesyonnel Mr Speaker. Zot in montre mon zot dezapwentman lo zot figur.

Mon'n fer sir ki tanzantan mon pa pou ezite pou mon demann kestyon loportinite ler i arive lo bann size pertinan, ki pou konsern zot. Sa Gouvernman *SPPF* i enn ki bokou ki'n zet bokou profesyonnel e sa bann profesyonnel i konn plis ki mon konnen la.

Mr Speaker lo mon lot topik ki mon le adrese, se bann travayer Gouvernman ki apel zot lekor serviter piblik.

Dan sa bann dernyen lannen, mon krwar ki se piblik ki'n zot serviter. Kan saler zot ti pe plito serviter Parti *SPPF*. Ler ou al vwar zot swa zot dan *meeting*, swa zot dan konze, telefonn pa pe reponn, swa zot in sorti. Zot menm al pli lwen Mr Speaker pou gete ki bor ou vote avan zot servi ou.

Mon krwar lemoman in arive pou zot vin bann vre serviter piblik. Mon'n apresye Letan mon'n tann *Leader*

Government Business dir ki i dezormen *MNA* ek *DA* pou osi partisip dan bann dyalog lo kote lozman ek *housing*. Se sa dan li menm i reponn lapel manm piblik ki vin vwar *MNA* pou ganny en soulazman, apre ki zot in santi zot in ganny met dan en serk vir an ron demen tanto, ki zot menm zot dan en sityasyon ki zot nepli konnen ki bor zot pou al apiye ek zot soufrans Mr Speaker. La mon krwar in ler pou nou tal tou kart lo latab. Sa pov madanm ki plis ki 30an i lo lalis i a vwar en laklerte.

Mr Speaker la mon mazin mon ser Marie-May ki en bann Letan i lo lalis desote 30an Mr Speaker. Jennifer son ka Mr Speaker i rasker ler ou get kot sa zenn madanm kot pe reste. Se pourtan i pey pansyon i pey sekirite. Sharon tousala Mr Speaker, i ankor pe esper larepons avek zot.

Mr Speaker ler mon pe gete, konsiderasyon ek ka ki mon demann mon lekor, manner ki sa bann dimoun kot *Housing*, i ankor pe les dimoun reste dan bann tel sityasyon parey. Sanmenm sa en leker pou tou Seselwa? Wi Onorab Loze mon pou demann zot aköz zot ki ti la pou 42an.

Se sa ki apel viktimizasyon politik Mr

Speaker. Odette osi Mr Speaker en zenn madanm ki li sak fwa i fer alokasyon lakaz, tou lazournen i pou gannyen i pa pou gannyen. I espere se pourtan li i osi son sistenm i pe peye son i a pe travay li osi parey nenport ki. I a pe kontribye li i osi ankor enn fer i vwar son non ankor lo lalis espere. E la mon krwar bann zofisye konsernen nou pou bezwen ganny en bon dyalog tre byento.

Nou pou bezwen koze, e mon swete ki nou a finalman ganny sa lalis lakaz osi dan redevlopman Kangard ki en bann lannen mon pe demande, ki mon pe tann en bann zistwar par deryer.

Mr Speaker depi ki mon'n ganny elekte mon'n ganny plizyer *phone call*, mon pa pou vreman konnen kantite lakaz ki i annan la deor, me si mon'n ganny mon en 300 *call* ki dimoun i dir mwan i pe al ganny lakaz la deryer mon pa konnen.

Mr Speaker sa bann zwe politik ek lakaz pou bezwen arete enn fwa pour tou. Sa i en bann lager ki mon'n pare pou lager Mr Speaker aköz dimoun i soufer i rasker ler dimoun i vin devan ou i anmenn ou kot ou pou al vizit kot zot.

Tro bokou dimoun inosan in ganny kit deryer aköz swa

politik, ouswa menm akoz zot pa *look sexy* dan figir sa bann dimoun lo *panel* alokasyon lakaz. Ouswa akoz zot pa enterese lekel ki la. Mr Speaker, la osi mon pou dir Christelle mon pa'n bliy ou.

Mr Speaker Prezidan Larepublik dan sa menm Lasanble Vandredi pase, ti met en *case* devan Lasanble. Lo en size ki konsern nou tou mon krwar Mr Speaker. Sa se lakonpanyen Nasyonal *Air Seychelles*.

Mr Speaker, mon ti en plezir pou mwan vwayaz lo *Air Seychelles*, sak fwa mon al aletranze Mr Speaker. Sirtou ler mon mont abor mon vwar mon bann zenn an bor Lanbasader, la mon mazin bann Vesna sa bann letan *on board* Ms Janice, Ton Mike ek plizyer Anbasader ki ti fer nou fyer ler nou pe mont abor.

Mr Speaker mon'n fer li mon devwar konman Manm Elekte dan Plaisance pou mwan fer en dyalog par telefonn avek a 10 travayer *Air Seychelles*. Mon'n swazir 5 ki reste dan mon distrik e 5 ki reste an deor rezon pou mwan ganny zot pwennvi.

Mon pa'n le al dan sa diskisyon mon menm personnel, akoz si mon ti al ladan personnel mon ti pou koz

plis negativite parske mon'n vwar tro bokou ki pase dan sa konpanyen.

Mr Speaker sa ki mon'n tande ek bannla, sanmenm bokou mon'n dir ennler Mr Speaker ler ou vwar en dimoun pe netway en biro, parey nou dir en *housekeeping* ouswa parey zot dir en *cleaner*, pa zanmen *underestimate* li, akoz avek li Mr Speaker en ta lenformasyon ki ou pou gannyen ou menm ou pou reste soke.

Mr Speaker lo size *Air Seychelles* mon'n vwar li en size sansib, e mon ti a kontan ki nou ganny plis lenformasyon. E konman en manm *FPAC* mon osi mon pou fer li mon devwar, pou nou ansanm gete si nou kapab ganny en kantite dosye posib ki nou kapab pou sa lakonpanyen depi son konmansman ziska ozordi.

Mr Speaker akoz sa i konsern vant bann zabitan mon distrik, mon krwar mon pou get li en size tre, tre, tre serye.

Mr Speaker, sipor lapel mon pou siport lapel *Leader Government Business* Onorab Georges lo sa size, kot mon krwar nou merit fer deba en pti pe pli separe lo sa. E sa dan li menm i kapab eklersi lanmod mon defen granmer tro bokou lafimen dan sa dife.

Mon pou osi rekonnèt plizyer travayer, ki'n met dan mon latansyon, lo zot gratwite ki sa lakonpanyen ti dir pou pey zot lannen pase. Mon ti a kontan ki *management* nou ti a kontan ki ler zot vin fer sa *meeting* osi avek nou zot anmenn osi sa bann lenformasyon swivan, si i annan okenn problem ki pe anpes bann gratwite ki'n travay plis ki 10an, 15an e 20an ganny zot larzan Mr Speaker. Akoz mon krwar pa si sa bann dimoun i sipoze responsab pou bann fot ki zot pa'n direktman *involve* ladan.

So Mr Speaker, mon pe lans en lapel la avek *Air Seychelles* pou fer konnen son bann *staff* lo sa size gratwite si pou annan, si pa pou annan. E si pa pou annan akoz, e parey mon'n dir mon krwar in plis ki ler pou nou ganny en dyalog avek zot lo sa size *Air Seychelles*.

E i menm annan i annan menm ki annan plis ki 20an ki travay laba Mr Speaker, ki'n eksprim zot konsern lo la Mr Speaker.

E Mr Speaker lo sa not mon pou rezerv bann kestyon osi ki mon ti kontan demande lo sa lorganizasyon lo sa dyalog ki nou pe espekte pou gannyen avek zot. Parske mon annan en

bon pe kestyon. E mon pou osi felisit bann *staff* ki pe travay dir laba Mr Speaker i en bon pe zot ki pe devoue laba. Sirtou la nou pe mazin bann ki pe fer sa servis *ground handling*, e bann osi ki pe fer zot travay neseler dan *Cargo* ki nou konnen ki kargo i en keksoz esansyel la an se moman dan pei.

Mr Speaker laba osi i annan bann nespes zafer politik ki pe ganny deroule kot *staff* osi parfwa zot santi zot en pti pe an sekirite. Me sa ki mon kapab dir ek sa bann *staff* napa nanryen pou an sekirite pei in sanze, keksoz in sanze, travay dir. si zot santi ki zot pe ganny viktimize zot santi zot pe ganny menase zot konnen zot annan zot bann *leaders* ki *available* pou zot fer en dyalog avek.

Mr Speaker, mon le terminen an dizan pandan sa dernyen 43an nou lazenes in ganny neglize, oubliye, itilize par bann rezon politik sal.

Lemoman in arive, zenn Seselwa pou pran nou desten dan nou lanmen. Annou koste pa zis fer gro ta parey bann lenvitasyon sa dernyen 43an kot zis nou ti ganny envite pou bwar manze, manz 2 *burger*, bwar 2 labyer kontan ekout desizyon konsernen, kot bann desizyon ki konsern nou, nou pa ti ganny konsilte ditou lo la

nou. Letan pou met bann Dirizan, lazenes ti lev lanmen drwat kontan pa kontan.

Sa sanzman ki zenes Seselwa ti pe espere in arive. Mon ti a kontan remersye bann zenn e bann pli aze ki mon dan mon distrik ki met sa konfyans dan sa zenn *MNA*. Akoz zot in vwar ki zenn osi i annan son rol pou zwe dan politik nou pei. Ki zenn i annan nide pou donner. I kapab anmenn son kontribisyon, e zenn zabitan Plaisance, zot konnen ki mon ki bann desizyon ki mon pou pran mon pa pou fer li mon tousel. E nou pou fer li ansanm parey nou pe fer.

Dan lepase sa Gouvernman ki ti o pouvwar ti tro pran zenn konman bann pyon. Zot ti servi zenn lemoman ki zot ti vwar zenn pe reflexir e pe get keksoz en sityasyon antre-man ki lafason ki zot pa ti kontan, zot ti fer sa zenn degoute. Zot ser sa zenn, zot fer vey li e a lafen ti ganny viktimize.

Zenn pa akoz 43an ki sa Gouvernman *SPUP/ SPPF/ Lepep/US* in o pouvwar ki'n ganny met de kote. Ki aprezan ou pou reste a lekar.

Nou Prezidan dan son diskour irigasyon ti envit tou Seselwa pou vini. Vin donn lanmen konstri Sesel. Alors

lazenés Seselwa pa ezite vin devan larg dan nou landrwa travay donn sa ki i annan pli meyer donn tou sa ki meyer, donn ou Letan, nou nide, ou lafors ek ou zefor pou ansanm avek tou lezot zenn Seselwa batir nou Sesel beni.

Dan en konpanyy Parti Lepep pou Eleksyon dan lepase nou tou nou ti ganny promet kot en nouvo Sesel, ziska ozordi plizyer lannen apre nou pa'n vwar nanryen sanze ek Sesel. Sa Sesel i vin pli pir ki avan. Nou'n tonm dan en degradab kales kase parey nou'n Prezidan in dekrir. Pou fini parey en kales kase menm.

Bann promes pa'n zanmen ganny realize, akoz zot menm zot pa ti krwar dan sa bann promes. Tel ki retir koripsyon, lalit kont drog, birokrasi ek labi.

Mr Speaker bann zenn lo eroin zot paran pe soufer bokou. Bann paran zot in zwenn mon dan kanpanyy, bann ki'n lekol ek mon ki'n asiz lo ban lekol ek mwan, mon vremen emosyonnel Mr Speaker. Lemoman in arive pou nou fer nou paran fyer, ek nou pei fyer Mr Speaker.

Nou trwazyenm Repiblik pou sa lannen selebre son 28tyenm lanniverser, plizyer milye zenn ti ne dan sa lannen

nesans trwazyenm Repiblik pou osi selebre zot 28an.

I annan ki'n dezespere, i annan ki lezot ki la. Konmsi ki ou a fer, bann ki pe seye ki ou a fer ki zot kapab. En gran mazorite i vin papa ek manman. Alors pou mon nou trwazyenm Repiblik i en adilt ozordi.

E nou sa bann zenn adilt ki i annan menm laz ek nou Repiblik, nou devret montre nou responsabilite. Se nou lafyerte nou pei, zenn Seselwa annou pran nou responsabilite konman bann sitwayen, zonn ek fanm responsab. Pou nou ansanm anmenn en lalit determinen kot koripsyon dir non ler nou ganny ofer en lanvlop anba latab. Dir non ler nou ganny ofer en laliny. Dir non ler nou ganny demande pou al anmenn madanm ouswa piti entel tel landrwa. Annou dir non ler nou ganny demande pou nou met dormi en fayl dan en tirwar, akoz i pa ek nou.

Pran nou responsabilite, annou lit kont sa bann mantalite negativ. Sanzman i konmans ek nou. I pli fasil ler nou bann zenn i deside pou nou dir non. Sirtou devan enn nou bann koleg ki i annan latitid fer sa bann zafer. I ava pran legzanp lo nou zenn. E demen nou a fyer, *sorry*, e demen nou a form parti sa lekip ki anmenn

en *mind change* e ki arive vin en sanzman dan mantalite.

Avek sa Mr Speaker mon le swet tou zabitan Plaisance Lepep Seselwa, zenn, en bon konmansman lannen. Parey moto Lekol Plaisance Segonder i toultan dir nou '*Striving for excellence*', nou moto nou distrik i dir, 'Annan en vizyon pou prosperite.'

Alor Mr Speaker mon lans lapel mon lapel pou zabitan mon distrik pou sa nouvo lannen 2020, se nou travay ansanm pou nou rekolte sa ki pli meyer e ki nou a prospere. Mersi Mr Speaker. Mersi pou a lekout zot tou.

(APPLAUSE)

MR SPEAKER

Mersi Onorab. Mon ava apel Onorab Egbert Aglae.

HON EGBERT AGLAE

Mersi Mr Speaker. Bonn apre midi tou Manm Onorab. Bonn apre midi spesyal tou zabitan Port Glaud, pep Seselwa.

Mr Speaker, mon kontan ki Onorab ki'n koz avan mon in rekonnnet sa rol edikatif ki Onorab Pillay in zwe dan son parkour edikasyonnel.

Mr Speaker mon oule osi lans en lapel ek sa Lasanble ki ler nou servi bann sitasyon dan

labib nou pa kapab apre maltret nou prosen, denigre laparans fizik en endividi gro, gra, pti, meg. Zis parey ler ou deside form en relasyon ek en fanm ouswa en zonm nou bezwen respekte desizyon sak endividi.

Mr Speaker mon ti a kontan osi koz lo size paviyon ki Prezidan in mansyonnen dan son ladres *SONA*.

Mr Speaker mon konstate ki paviyon i en senbol Nasyonal. e ki pa merit ganny politize, e mwan mon ti a kontan, ouswa swete ki distribisyon paviyon i ganny fer anba en *body* endepandan sa i kapab ladministrasyon distrik, e sa ki i anvi en paviyon i kapab al rod pou li.

Mr Speaker pe al ariv omwen 3 mwan, depi sanzman dan ladministrasyon gouvènanans pei. Wi nou demokrasi in fleri lo nivo Lendeks Demokrasi Mondyal.

Sesel sa pti bizou dan *L'Ocean Indien* i byen plase. E sa i montre progre. En progre e lakonplisman ki ladministrasyon oparavan in akonpli gras a sa travay dir, byensir avek led diferan *partner* kle dan nou sosyete.

Nou'n ganny felisite lo lasenn enternasyonal pou en pasasyon pouvwar kalm e san

okenn vyolans. E sa i arive aköz Prezidan Faure e son Gouvènmàn in aksepte swa e desizyon sa pep, e pou sa mon felisit li pou son grander lespri.

In aksepte san okenn lensilt personn. San okenn lespri vyolans ouswa vanzans parey tou resaman nou'n vwar in arive *L'Amérique*.

Pep Seselwa nou pou mank en vre *statesman* egzanpler.

(APPLAUSE)

HON EGBERT AGLAE

Mr Speaker, apre ki mon'n ekout diskour lo Leta nou Nasyon e ler mon analiz larealite aktyel nou pei, pep Seselwa nou bezwen blanm nou prop lekor aköz dan lespas 3 mwan stati nou pti bizou Sesel pe deteryore.

Dan lespas 3 mwan bokou Seselwa pe viv dan lensertitid. Zot latet i fatigue, bokou pe komans tonm dan lamizer e lapovrete.

Mr Speaker dan lespas 3 mwan koman en pep sa sourir ki zot ti annan le 25 Oktob ki bokou ti pe selebre pe disparet pti a pti.

Akoz bokou ti krwar ki sa sanzman ki zot ti pe rode tou ti pou vin an roz, tou ti pou *ok*, zot ti pou lib pou fer sa ki zot oule,

zot ti pou ganny plis larzan e siperyorite, kot zot ti pou ganny en meyer kou lavi e en pli bon saler. Pep Seselwa ozordi pe *wake-up to smell the coffee*.

Mr Speaker ozordi ler mon pase lo semen, mon rankontre Seselwa ki mon konnen, mon vwar zis lenkyetid, lensertitid e zot in eksprim ek mwan zot mekontantman. Menm si serten i oule fer nou krwar ki tou pou *ok*, me mon pa tro krwar.

Mr Speaker, sa ladministrasyon ki la, ki serten ti asiz lo sa menm kote latab, ki boner 2020 avek larive viris *COVID-19*, napa ki pa ti ganny dir, napa ki pa ti ganny dir pou ganny fer pou prouve ouswa portre avek pep Seselwa ki ladministrasyon Prezidan Faure pe *mismanage* sa sityasyon sa sityasyon *COVID* ; - ki sa bann letan ti annan mwens ki 10 ka dan pei.

Me ozordi Mr Speaker, e la Mr Speaker sa mo *lockdown* ti rezonnen la anndan dan diferan repriz e la ozordi, zot pa oule tann parle sa mo *lockdown*.

Mr Speaker, legzanp in montre nou ki ler ou dan en pti soulye ou kapab tay pli vit, me ler ou met enn pli gran e gro ou abilite pou al pli vit i redwir. Ler ou pa dan en pozisyon dirize i fasil kritike e sa i en latas ki

LDS ti fer tre byen dan zot parkour politik koman en Lopozisyon. Me ozordi zot ki pe dirize. Zot ki dir ki pou fer alors *walk the talk!* Aret blanm US pou zot bann *failure to lead and inspire* sa pep.

Ozordi se *United Seychelles* ki dan Lopozisyon. Ozordi e nou travay se pou kritik dan en fason konstruktiv sa Gouvernman ki o pouvwar avek bi ekler sa tors 12 batri ki ti dan zot lanmen, zot in prêt nou an ka zot mank semen lo sa larout e parkour difisil.

Mr Speaker, dan ladres lo Leta Lanasyon Prezidan in konpar ladministrasyon Gouvernman ki zot in erite pou mon parey latet zonnyon. Kot ou tir en bout lapo e tir en lot, e pou mwan sa i portre en lensilt lo travayer ladministrasyon piblik. Me dan en lot kote en lot konotasyon atase ek retir lapo lo en zonnyon, se i kapab fer ou larm koule. Eski Sesel pou bezwen plere anba sa ladministrasyon *LDS*?

Mr Speaker, sa pei osi i ganny konpare parey en kales kase. Mon bann frer ek ser Seselwa, eski zot in deza vwar en kales kase? Mwan, mon pa'n zanmen vwar enn, e bokou nou pa'n zanmen vwar enn.

Eski ler ou ti fer ou premye *interview* ouswa ou

premye diskour Inogirasyon, ou ti felisit ladministrasyon pou sa *proper handing over*, kot ou ti demann bann *staff* pou kontinyen travay e menm dir personn pa pou perdi son plas travay. Alors eski ou'n erit en lekip travayer enkonpetan? Eski se atraver sa ou'n erit en kales kase?

Eski ler ou erit en kof ki preski \$500milyon dan Labank Santral, eski sa i ekivalan en kales kase? Eski sa ta pti biznes ki'n grandir, ki'n fleri dan lepase, eski nou pei i en kales kase? Eski nou lakonplisman lo nivo enternasyonal kot nou vin legzanp bokou pei o monn, eski sa i egal kales kase?

Eski ler ou regard sa kantite devlopman, batiman, lakaz plizyer lezot lenfrastruktir, eski sa i en kales kase? Ler ou'n erit en sistenm ki fonksyonnel malgre defi eski sa ou pou dir i merit kales kase?

Mr Speaker larepons i non. Sesel in devlope, Sesel in fer bokou progre e bann ladministrasyon presedan in fer son mye.

Mr. Speaker be kote problem i kapab ete? Si ozordi nou vwar nou dan en sityasyon finansyel pou mwan i pa neserman akoz in annan 100poursan move zesyon. Ti annan 2 swa pou

ladministrasyon Prezidan fer an 2020;- premye swa se pa donn okenn lasistans finansyel okenn sekter afekte avek *COVID-19*, sa i vedir si ou biznes pe ganny afekte demerd ou debourye.

E rezilta se, ou pous ou travayer e fer li arete. Li ki *self-employed*, pou bezwen ferm son biznes, ou ki dwa labank, labank i sezi ou lenvestisman, ou ki pa kapab pey ou *rent*, ou *landlord* i pran ou ek ou fanmir i met ou deor a laport. Ou ki dan bann lezot sekter atase ek touris, zero reveni dan ou pos,

Eski sa ti pou en fason responsab pou en Gouvernman azir a sa letan? Mr Speaker a sa letan lot kote ki ti dan Lopozisyon, koman zot natir zot ti pou fer en ta retorik politik e ensit zot dimoun, zot siporter ouswa rebel ouswa revolte atraver lamars e lensilt lo medya sosyal.

Me la ozordi zot pe dir par zot Dirizan ki i pa pou toler okenn *incitement*. Parey dikton Kreol i dir," fer sa ki mon dir ou pa fer sa ki mwan mon fer." Be sa i apel dominer.

Mr Speaker dezyenm opsyon ki ladministrasyon Prezidan Faure ti kapab pran e ki ti pran, dan en fason konsyan se asiste bann sekter ki'n ganny afekte direktman

ou endirekte man ziska Desanm 2020. Tou en panse ki COVID-19 i ava'n pran en lot lelan pandan sa peryod letan, e lemondn osi ava reisi met anba kontrol. Sa in fer ki bokou biznes in ganny sove e plizyer santenn lanplwa in ganny eparye.

Mr Speaker mon pou osi sezi loportinite pou remersi e felisit tou travayer Lasante, Dr Gedeon ek ou lekip ki ti la depi komansman, tou bann ki lo *frontline* ki pe konbate e ede, e osi endik sa pep lo lenportans pran tou mezir neser pou konbat sa viris

Mr Speaker egalman mon oule remersi tou pei zanmi atraver relasyon Diplomatik ki'n aport led ek soutyen a pep Seselwa. En gro mersi osi pou lakonpanyen e endividi ki'n aport donasyon pou pei e kominote.

Mr Speaker, larealite se ki COVID-19 i ankor pe ravaz nou kominote e nou pei. Mon annan plis keston ki larepons. Mr Speaker, ki pou arive si COVID-19 i entansifye e nou pa swete sa i arive, e sa *new strain* i antre dan pei e dapre *expert* medikal i pli danzere e propaz pli vit? La a ki nou'n ouver lafrontyer nou pei, kan lezot pei pe deside ferm zot lafrontyer. Ki pou devenir avek lasante sa

pep? Mon note ki bokou lanfaz pe mete lo vaksinyon me eski i annan ase levidans ki sa program vaksinyon pou afektiv fas sa nouvo *strain*?

Mr Speaker nou pou bezwen *être* pli pridan koman en pti pei. Lekonomi wi i enportan, me lasante nou pep i merit pas avan tou. Louvraz en dokter se sov lavi imen. Parey louvraz en pret se donn lakominyon e konfesyon e benediksyon.

Ki pou arive si plis dimoun i malad e menm perdi lavi, eski sa pou anmenn sa konfidans pou nou lafors travayer? E pli pir ki lespwar lezot pei pou annan pou ankouraz zot sitwayen vin isi koman bann touris?

Mr. Speaker dan sa konzanktir ki nou ladan en analis serye i bezwen ganny fer premyerman dan Sekter Tourizm, ki merit tal tou kart lo latab e analiz tou, pou ki Gouvernman i kapab pran bann mezir konkret e enportan,

Mon osi konstate ki lanons kennel FA4GR an Mars pe tourmant lespri sa sekter e bokou biznes lo zot lavenir. Eski en analiz in ganny fer *by now* pou konnen ki kantite *booking* atraver STB ki'n kennel pandan sa peryod? Ki kantite ki sityasyon finansyel sa

bann biznes? Ki pou arive ek zot travayer? Ki lenpak fer etranze ale aret travay? Eski nou annan ase Seselwa kalifye pou pran sa bann pozisyon ki pou vin *vacant*?

Mr Speaker, ki lopinyon ouswa konsiltasyon in annan avek Minister Tourizm atraver *STB*? Tousala i bann analiz serye avan ki desizyon pli drastik i ganny pran pou table pou ganny en portre pli kler fas a sa bann desizyon ki pou enpakte enormeman lo sitasyon finansyel sa sekter vreman enportan.

Mr Speaker, mon dir ankor plis kestyon ki larepons. Mr Speaker, nou bezwen rekonnèt ki san legzistans *FA4GR*, bokou biznes ti pou'n fini koule ouswa fermen e Sesel ti pou vwar li avek en pli o nivo *unemployment rate*. Bokou Seselwa ti pou san en lanplwa dan sekter prive prezizeman sekter ki relye direk avek touris.

Sa ti pou annan en lenpak direk lo lotelri, restoran, *tour operators*, *guest house*, *spas*, *casino*, *taxi operators*, e lezot ki atase avek sa servis. Konbyen ki ti pou dan problem finansyel? Konbyen zot ki labank ti pou'n sezi zot byen, konbyen fanmir ki pa ti pou kapab pey zot bill, e met manze lo lata? Ki lenpak sa ti pou

anmenn lo nou kominote e fabrik sosyal?

Ki kantite reveni ki *SRC* ek Minister Finans tin *forecast* koman reveni prozekte ki ti pou perdi ki pa ti pou antre dan kof Leta.

Mr Speaker i enportan pou analize avan dir ki tou sa larzan *FA4GR* ti mal ganny servi.

Me la ki pou annan rediksyon e evantyelman koup net sa *life support* pou biznes, eski Minister Finans in regard dan tou *angle*? Eski zot in get tou diferan senaryo, aköz nou pa fer bann revi *quarterly* e aziste o firanmezir sityasyon ekonomik i devlope ouswa amelyore?

Mr Speaker, mon konstate ki plizyer pti biznes pa'n rod sa led. Ki pou arive ek zot ozordi la zot tonm dan sityasyon difisil? Eski nou pou adopte en stil bef dan lasenn, bef dan disab sakenn vey son lizye, ouswa Gouvernman pou zwe sourd lo zot?

Mr Speaker kot i konsern *URS*, e mon'n vreman dezapwente ki serten Manm Onorab in konpar *URS* ek *carer* konman en louvraz I malere dir ki sa bann travay i enportan aköz li osi sirtou *carer* kot i permet serten manm fanmir al

travay san kit son zenn aze deryer.

Mr Speaker SONA in fer mansyon lo *URS* konman en pon ki serten pe reste lo la, me lentansyon *URS* se pou abzorbe travayer ki'n perdi lanplwa. E sa i osi donn bann adikt ki lo program *methadone* en dezyenm sans kontribye dan sosyete menm avek zot febles adiksyon.

Wi petet plis lanfaz ti a ganny mete pou pous zot ver en program *skill acquiring*. Me fodre osi rekonnèt i annan bokou Seselwa ki progrese lo program *URS*, e ki'n fer sikse bann ki'n antre parey *cleaner* in vin sekreter zot in *receptionist*, zot in al asistan, eksetera.

Mr Speaker eski an se moman i annan gran demann pou lanplwa? Eski dan en kourt dele Letan zot pou kapab ranplas sa bann etranze? Mr Speaker larepons i non.

Alor Mr Speaker *URS* i en pon enportan, sa lanons pou aboli sa *Scheme URS* pou anmenn konsekans serye. La i fer mon mazin Joel. I fer mwan mazin mon zanmi Mervin, ki apartir Mars i pou san en lanplwa.

Mr Speaker, en refleksyon serye lo sa size i bezwen ganny fer. Mr Speaker abolisyon entel *Scheme* nou riske vwar plis

delenkan, plis vol, lezot krim pou rebran sirfas. Fodre nou fer byen atansyon a sa bann desizyon.

Mr Speaker, mon le tous sa size *Social Welfare*. Mon rapel tre byen an 2008 ler nou ti pe al antre dan program reform *microeconomic*, anba *IMF*, kot sa letan rezerv Sesel kot i konsern lenportasyon ti preski zis 3mwan e sa letan nou Sekter Touris ti fonksyonnen vdir touris ti pe vini e pei ti pe anmas serten reveni, menm si larzan ti devalye.

Sa letan Gouvernman ti vwar li enportan pou etabli en *safety net* anba ki program *IMF*, ti agree pou sov sa bann ki pou tonbe dan sa parkour reform, sa i vdir anpar sa ki pli vilnerab avek en *income* pli ba.

Mr Speaker ozordi konteks i en pe similar, me zis ki nou napa touris, mwens reveni pe antre e to lesanz deviz in monte e Roupie in depresye. E malgre sa Mr Speaker an 2008 nou ti annan *redundancy* ek depar volonter.

Me la an 2021 nou pou vwar nou pou vwar plis *layoff*, *termination of contract* e si nou pa fer atansyon plis biznes pou fermen ki an 2008.

Alors nou vwar nesesite pou annan en *safety net* pou

anpar bann ki pou ganny afekte.

Mr Speaker, lo size *welfare* i byen ki diferan mezir i fer e met an plas pou evit okenn form labi. Me sa ki nou merit konpran, ler nou dir al tap laport lanplwa avan vin kot *welfare*, me ki *vancacy* i limite e osi lekonomi ki dapre mwan an Mars 2021 pa pou ankor relanse ek sityasyon *COVID*, ki pou arive ek bann ki pou san en lanplwa?

Mr Speaker *redundancy*, biznes fermen, akoz revini pa pe antre, kestyon alors kote sa bann Seselwa pou ganny en lanplwa? Si zot pa'n ganny abzorbe anba en *Scheme* dan en lanplwa kot zot pou *end up*? Kote sistenm *welfare or else* zot pou bezwen mor lafen.

Mr Speaker, zabitan Port Glaud ti pe esper plis mesaz lespwar. Bann ki mon'n koz avek sa manman, sa papa, sa zenn, sa trwazyenm-az, sa biznesmenn, sa peser, sa fermye, sa pti kontrakter, zot dezapwente avek sa ladres Prezidan. In dir mwan zot in plito ganny ensilte e maltrete apre tou sa zefor e kontribisyon ki zot in fer pou nou pei.

Zot in demande ki plan pou sofgard zot lentere, ouswa si zot pou bezwen rezonn parey

mon fek dir bef dan disab sakenn vye zot lizye.

Mr Speaker, dan sa ladres *SONA* napa gran lespwar. Napa en plan kour term. Napa mezir fiskal e i annan e i ensernten. Larealite nou reveni an deviz pei pa kler e tou lespwar pe ganny mete lo program lo vaksinasyon, ki nou menm nou pa konn si i pou efikas 100poursan. Ki pou arive si sa kanpanny pa efektif, ouswa pa etablir sa konfyans lo nivo enternasyonal.

Eski Sesel pou asize esper touris ziska *vitam aeternam*? Mr Speaker, mon ti a swete oli lezot solisyon inovativ pou fer plis larises kre plis lenvestisman entern pou koleksyon reveni?

Nou rezerve Labank Santral i kapab tenir nou pei pou ankor lan. Alors dan sa letan, akoz pa envit Seselwa e eksplor lenvestisman reel, potansyel nou bann zil, nou Lekonomi Ble? Kree kondisyon e *incentive* pou Seselwa ki annan sa ta milyon Dolar e Roupie dan labank, pou investir dan bann lezot domenn potansyel avek bi kit nou lekonomi entern fonksyonnen anmezir nou esper nou lekonomi eksteryer relanse.

Koman en pep nou bezwen vin pli proaktiv e inovativ. E sa

Gouvernman ki bezwen kree sa veikil pou sa arive.

Mr Speaker, kot i konsern Lekonomi Ble malgre pei i en kales kase Minister konsernen avek Lapes ti fer diferan vizit. E i ti menm dir ki lenfrastruktir i la. Lezot Minis osi ti fer diferan vizit dan zot departman e zot in dir ki lenfrastruktir debaz i egziste e sistenm travay i la an plas. Me napa okenn moman zot in dir ki en katastrof ouswa en kales kase. Alors sa teori kales kase ankor enn fwa i en lensilt lo pep Seselwa.

Mr Speaker, kot i konsern sa plis ki 100 *Board*, i bon note e eksplik byen aköz i annan tel ou tel *Board* e ki dan lepase Lopozisyon dirize par Prezidan dizour in anmenn en politik tir pouvwar dan lanmen sa *CEO*, sa *PS*, sa Minis e menm Prezidan, aköz desizyon final en lorganizasyon pa merit sorti kot en sel endividi.

E sa i osi a redwir tandans ouswa tandans koripsyon ouswa zwe dalon. Alors se sa *Board* ki pran desizyon final. La si nou al dan sa direksyon kennsel tou *Board* sa pou vedit ou pe al donn plis pouvwar sa Minis, sa *CEO* sa *PS* pou annan *final say, now here we go back to square one*. Ou pe al ouver en laport tandans pou

koripsyon, labi e viktimizasyon. Lepep Seselwa annou note.

Mr Speaker aköz nou pa antreprann en dyalog ek tou *Board* e dir zot pou en peryod 6 mwan pou napa okenn *Board fees* aköz sityasyon ekonomik pei, parey *Leader* Lopozisyon in propoze nou osi nou pa pran nou *allowance* Komite pandan en peryod difisil.

E si keksoz i amelyore, anmezir ki keksoz i amelyore Gouvernman a rekonsidere. Mon krwar sa dyalog e konsiltasyon i enportan.

Mr Speaker, Lepep Seselwa fas a sityasyon *COVID* i merit ganny plis lespwar par son Dirizan. I anvi konnen ki si i tonbe i kapab ganny anmase kekpar. I anvi konnen si i lafen i kapab ganny en lasyet manze a son porte.

I anvi konnen e satisfè ki ledikasyon son zanfàn pou kontinyen garanti. I anvi konnen si son lasante pou kontinyen ganny proteze fas a sa bann mezir. I anvi osi konnen, si i pou annan en lanplwa a lavenir. I anvi konnen si i pou kapab pey son bann bil, son bann det parey *loan* eksetera. Me zot ankor dan en nyaz pe mazine ki pou arive.

Mr Speaker pou konklir lo size *Air Seychelles* malgre ki

Legzekitiv in tir son responsabilite e larg lo Lasanble, kan zot ki domin tou lenformasyon finansyel sa lakonpanyen, mon krwar ki bokou refleksyon i merit ganny fer e ki nou pa devret tay avek sa desizyon akoz bann kompleksite konsekans ki atase ek sa size.

MR SPEAKER

Onorab ou'n sot ou 30 minit. Mon ki pe konte.

HON EGBERT AGLAE

Mr Speaker, mon pe konklir. Mr Speaker nou pe koz apepre 700 travayer Seselwa ki riske perdi son dyob. 2008 depar volonter ti annan ase lespas pou abzorb zot me ki la ki lekonomi, biznes i riske fermen napa gran louvertir lanplwa ki kapab abzorb zot.

Alors mon demann Gouvernman pou *take the Board of Air Seychelles to task*.

I enportan ki *Air Seychelles* i fer bann *cross-cutting exercise*. Premyerman get dan sa bann departman kot i annan travayer etranze e komans prosis ranplasman par Seselwa. Koup sa bann *heavy house rental*. Rann sa bann vye avyon ki pa ekonomikman efikas. Aret fer sa bann *long haul destination* ki

pa ekonomikman vyab. Komans negosyasyon si nesaser sirtou pou *upper management* pran bann *allowance cut*. Re negosye nou det ankor e rod fason sorti dan sa Kontra ki pe kout nou tro bokou. Revwar zot bann *assets* e vann bann ki pa tro esansyel e nesaser.

Mr Speaker i osi enportan pou note ki *Air Seychelles* pandan *lockdown* 2020 in ede anmenn kargo e menm fer serten *flight* ki lezot *carrier* pa ti oule fer, alors nou *National airline* si i annan posibilite sov li annou sov li.

Si nou bezwen diversifye son loperasyon annou fer li parey *Ethiopian* in fer avek son bann serten *airline* pou al lo kargo.

MR SPEAKER

Onorab konklir pou fini.

HON EGBERT AGLAE

Pou fini Mr Speaker pep Seselwa nou dan difikilte. Zot lavi pa pou parey, zabitan Port Glaud menm si mon pa kapab pas devan zot laport pou le moman, mon pou la avek zot. Pran swen ek zot fanmir, zot zanfan, sa enn ki aze, swiv byen bann konsiny lasante, si fodre servi nou bann latizann tradisyannel, nou bann raspay parey nou dir lontan servi akoz

sa viris pa swazir lekel ki i atake. *Stay safe, stay home*. Ki Bondye i beni sa pep. Annou koste pou nou sov sesel. Mersi.

(APPLAUSE)

MR SPEAKER

Mersi. Wi Onorab Pillay.

HON SEBASTIEN PILLAY

Mr Speaker mwan mon annan en keksoz ki mon en pe konsernen avek. Mon'n *time* tou le de Onorab, Onorab Labrosse ler in koze, Onorab Labrosse in al 3 minit an plis lo son prezantasyon. Onorab Aglae in al en minit an plis. Ou dir ek Onorab Aglae, son Letan in fini lo 28 minit. Mon pa tro, tro ganny en konpran ki mannyer nou pe *manage* letan. Akoz ou menm ou, mon'n vwar ou mon'n swiv byen ou reaksyon Mr Speaker ou pe get ler, e pandan letan ki Onorab Labrosse e mwan mon pa'n enteronp li akoz mon ti anvi Onorab i fini son *speech*. Akoz mon vwar poudir i pou annan letan pou fini son *speech*.

E menm parey pou Onorab Aglae mon ti ava apresye Mr Speaker, si pa ankor ariv son 30 minit i pa byen ki nou fer en Manm kas son *flow* ki pe koze e i pa ankor ariv sa letan.

Oubyen petet nou pe fer diferan *timing* nou tou le de.

MR SPEAKER

Nou koz pou 2 minit deza en.

HON SEBASTIEN PILLAY

I annan en problem Mr Speaker ki mon'n koze?

MR SPEAKER

Wi. Wi i annan en problem.

HON SEBASTIEN PILLAY

Be mon bezwen met devan ou, ou pa kapab pran en mezir ek en kote pran en mezir ek en lot kote!

MR SPEAKER

Onorab dan mon lopinyon mon'n aplik menm lareg tou dimoun ki'n koze. Si mon'n demann Onorab Aglae pou konklir, se akoz ki mon ti'n santi i ti'n depas son ler, e i ti'n ariv ler pou nou konklir. Mersi. Nou a apel Onorab Terence Mondon silvouple.

HON TERENCE MONDON

Mersi Mr Speaker. Bonn apre midi tou Manm koleg *Onorab*, e tou dimoun ki'n ekout nou, an partikilye zabitan mon distrik Takamaka.

Ser frer Seselwa, mon pran sa loportinite pou dabor remersye Prezidan Larepublik

pou son diskour fran e onnet lo Leta Lanasyon. E mon profite pou osi remersye zabitan mon distrik, Takamaka ki'n konfyé mon sa travay koman zot reprezantan dan Lasanble Nasyonal.

Mr Speaker mon'n travay akote Prezidan e mon konnen ki i en dimoun dwat e fran, kot i mal i pour dir ou i mal. Kot keksoz pa bon i pour dir ou pa bon. Se sa ki fer son diskour tre spesyal akoz pour premye fwa dan listwar politik nou pei nou'n ganny en Prezidan ki koz laverite avek son pep.

Annou pa oublie ki nou Prezidan in anmenn en lalit pou retir nou pep dan lafreyer e met nou pei lo en semen laverite e laklerte. Mon'n ekout bann reaksyon lo diskour Prezidan e mon kapab dir ki pep Seselwa pe mars kot a kot avek nou dan sa moman difisil.

Menm si dimoun i konnen ki zot pour ganny afekte par bann mezir ki pe ganny pran, lamazorite i rekonnét ki Prezidan i bezwen fer tou sa ki neser pou retir nou pei dan sa sityasyon difisil.

Mr Speaker Prezidan in prezant larealite bann defi ki son nouvo ladministrasyon pe fer fas avek. Me nou Prezidan in al bokou pli lwen ki sa, in fer nou konpran ki nou bezwen

brav pou fer bann sanzman ki neser lo nou menm dan nou lavi toulezour pou kree en sosyete pli solid e rezilyan.

Mr Speaker Prezidan i en zonn ki krwar e apresye valer en fanmir. E in koz koman en zonn kot en lakour kot sakenn i fer sa ki i anvi. In koz koman en papa ki pe resanti sa dezapwentman ler napa solidarite parmi son bann zanfan.

Dan en fason for Prezidan in eksprim son dezir pou ranvers sa tandans dan nou sosyete, e fer lapel solannel avek sakenn de nou, pou zwen li dan sa zefor pou anvoy en sel mesaz pour ki ansanm nou ava kree plis prosperite pour nou pep.

Dan son mesaz, Prezidan pe apel nou pou fer viv en kiltir responsabilite e respe pour nou lekor e pour lezot dimoun otour nou. Sa i ava anmenn en sanzman dan nou fason viv e dan lafason ki nou fer keksoz.

Lafanmir ki reste pilye pli enportan dan nou sosyete. E dan en fanmir for zanfan i aprann ki savedir responsabilite, ki savedir partaze e ki savedir fason pou konport zot dan zot lavi toulezour.

Dan en fanmir for zanfan i aprann pou vin responsab. Nou

sosyete i bezwen ganny fonde par bann fanmir bokou pli for, e dan kominote bann fanmir i devret zwenn ansanm pou ranforsi sa demars.

Wi Mr Speaker, nou responsabilite pa devret zis otour nou fanmir, dimoun ki nou konnen e kontan. Nou osi annan en lobligasyon anver lezot dimoun dan nou kominote. Nou bezwen kapab donn en koudmen fer en diferans pou lezot. Lafason ki nou konport nou e respe ki nou donnen anver lezot i fer en gran diferans dan en kominote.

Lafason ki dimoun i zwenn ansanm e partisip dan lavi kominoter i osi depan bokou lo sipor ek latansyon ki en Gouvernman i mete pou ranforsi sa komitman. I kler ozordi ki nou bezwen anmenn en nouvo lapros, ensi ki bann programm apropiye pou ankouraz partisipasyon dan lakominote.

Lo sa pwen, mon oule salye sa group dimoun Takamaka ki'n dedye en dimans 2 fwa par mwan pou fer travay volonter dan nou distrik. Sa group pe fer bann travay ki normalman *SLTA* pe pey kontrakter pou fer.

Mon profite pou remersye tou bann motoris ki montre apresyasyon pou zefor ki nou pe

fer pou nou kominote. Mersi pou zot lankourazman. Wi Mr Speaker nou bezwen fer sa lespri volontarya vin vivan dan nou bann distrik.

E mon respekte ki Minister responsab pou Devlopman Kominoter, i fer tou le nesese pou ranforsi komitman ki nou bann dimoun pe demontre anver zot kominote. Si plis dimoun i pare pou ofer zot letan oubyen pare pou fer kontribisyon anver bann travay volonter dan kominote, nou pou kapab fer en gran diferans.

I pou osi nesese ki Minister Finans i met an plas en mekanizm o nivo distrik, pou permet nenport dimoun fer en kontribisyon dan en fason senp e transparan anver en tel linisyativ. I annan en kantite keksoz ki nou kapab fer o nivo distrik ki kapab ed Gouvernman pou redwir son depans.

Mon santi ki nou devret devlop sa posibilite sirtou la kot nou pei i dan en kriz finansyel. Mr Speaker sa ki Prezidan in osi aborde dan son diskour, se pour kre en kiltir responsabilite dan nou pei. Nou bezwen rekonnet ki sa kiltir responsabilite i pa toultan prezan dan sa ki nou fer.

Alor mon konpran ler Prezidan i dir ki nou bezwen fer plis, pou re enkilke sa striktir responsabilite dan nou lavi toulezour.

Pou tro bokou letan ki ou'n viv dan en sosyete ki fonksyonn avek bokou kontradiksyon, kot dimoun ki fer s aki byen dan en fason responsab i ganny pini. Tandis bann ki fer sa ki mal i ganny rekonpanse, legzanp i bokou.

Mon vwar sa osi dan koleksyon *tax*, bann dimoun ki gard tou zot rikord byen i bezwen pey tou zot *tax* parey Lalwa i demande, tandis ki bann biznes ki pa gard bon rikord zot kontinyen pa peye san okenn sanksyon ou pinisyon. Sa pa fer zistis pou bann dimoun ki fer keksoz byen e dan en fason responsab.

En sistenm *welfare* i pran avek dimoun ki travay dir, e donn bann dimoun ki napa okenn lentansyon travay. Sa i en sistenm i dekouraz nou bann travayer ki pran zot responsabilite serye. Se sa bann keksoz parey ki nou Prezidan i anvi sanze dan nou sosyete. Pour ki Gouvernman i anvoy mesaz ki kler e konsistan, mesaz ki pou ankouraz dimoun pou fer sa ki byen e vin pli responsab.

Mr Speaker zefor ek responsabilite i bezwen ganny rekonpanse. Mon respekte ki avek Bidze ki pou vin devan nou Lasanble byento nou ava konnen ki bann reform ki nouvo ladministrasyon pou anmennen dan sistenm *welfare*.

Me sa ki kler, se ki dimoun ki kapab travay i devret kapab ganny tou loportinite travay dan son pei. E Gouvernman pou bezwen met en *stop* avek dimoun ki pe abiz nou lasistans sosyal. Byensir bann dimoun ki vremen pa kapab travay i ava resevwar tou soutyen neserer.

I pou osi enportan ki Gouvernman i reevalye bann ka kot in annan labi e kot dimoun dan kominote pe kontinyen kestyonnen. Mon ekspekte ki Minister konsernen i ava met an plas en sistenm pli efektiv o nivo distrik, pou reponn a sa nouvo legzizans.

San dout sa nouvo lapros pou responsabiliz nou pep, i ava en lot pa enportan dan sa proses transformasyon nou sosyete.

Mr Speaker nou tou nou konnen ki nou pei i dan en sityasyon ekonomik pli difisil ki in deza eksperyanse. E bokou pli pir i kriz finansyel 2008. Si Prezidan pa pran bann desizyon

brav ozordi, nou pei pou pran fon.

Alor pou nou evit en dezafiskal, i enportan ki s nouvo administrasyon i pran bann desizyon difisil e koup depans Gouvernman pou kapab tenir nou pei alaflot ziska ki sityasyon i amelyore.

Me nou defi i bokou pli gran ki sa, akòz se dan sa moman difisil ki nou bezwen konstri en lekonomi dinamik avek pwisans nesese pou kre lanplwa ek nouvo loportinite pou nou pep.

Mr Speaker nou'n dir a plizyer lokazyon dan le pase ki nou servis piblik i enn ki troulour ki pe kout nou pei ser. Dan mon lentervansyon pou SONA lannen pase, mon ti dir e mon repete ozordi, "Bon governans i preskri en servis piblik ki efikas e efektiv. I enspir konfyans parmi Manm piblik. "

Malerezman lanvironnman biokratik Gouvernman Faure in plito ganny vwar koman konplike e inefikas e menm koronpi a serten nivo. Se sa ki mon ti dir lannen pase.

Mr Speaker ler nou pe koz nivo lapros dan servis piblik nou bezwen osi koup sa biokrasi santralize, kot pe gaspiy larzan e letan. Kot i posib met pouvwar e resours o

nivo kominote, kot nou pep pou kapab pli byen konekte.

Desantralizasyon dan servis piblik an traver teknolozi modern, pou kree lespas pou adres bokou problem ki nou pep i fer fas avek toulezour.

Tel ki problem trafik kot bokou letan i ganny gaspiye, sipervizyon bann travay netwayaz dan distrik kot ozordi sakenn i travay lo son prop standar. Akòz napa bon sipervizyon.

Mr Speaker sa moman in arive pou nouvo administrasyon regard servis piblik dan en nouvo perspektiv. Alors mon demann bann zofisy servis piblik pou les zot ganny gide par bann prensip ki donn pouvwar nou pep, e fer li zot misyon pour ki sa nouvo Gouvernman ek servis piblik i vin enn ki ouver, transparan e rann kont.

Se sa kalite lapros ki pou enspir konfyans dan nou kominote. Ler zabitan i konnen konbyen Gouvernman pe pey en kontrakter pou netway en morso semen, oubyen en bout lans dan son distrik. Sa zabitan pou konnen si i pe ganny valer pou larzan pou sa bann servis.

Nou bezwen donn dimoun lenformasyon ki zot bezwen pou fer Gouvernman ek sekter piblik rann kont. Nou bezwen

donn dimoun lenformasyon ki zot bezwen pou zot kapab zwe en pli gran rol dan zot kominote.

Mr Speaker i annan en lyen direk ant lenformasyon ek lentelizans. E sa lyen i osi kre lespas pou nouvo linisyativ. I mon swe ki sa nouvo ladministrasyon i kree sa lespas neserer pou nou bann distrik ki permet nou pep fer en pli gran kontribisyon.

Ler mon vwar ki i annan plis kontrakter sorti dan en distrik vwazen pe fer travay netwayaz dan mon distrik i fer mon koz bokou kestyon. I kler ki nou bezwen en lapros pli ouver e pli transparan pou bann servis netwayaz dan nou bann distrik.

Air Seychelles Mr Speaker i annan bokou koze lo nou lakonpanyen *Air Seychelles*. *Air Seychelles* ozordi i vwar li dan en sityasyon vreman difisil, me sa i pa en keksoz nouvo, akoz se ki lannen 2010 ki *Air Seychelles* ti apros Gouvernman pou rod lasistans finansyel pou ed li kouver son bann depans.

Pandan tou sa bann lannen ki'n pase, setadir pandan sa dernyen 11an *Air Seychelles* pa'n kapab fer profi. Menm anba ladministrasyon

Etihad sa lakonpanyen in kontinyelman perdi larzan.

E *shareholders* in bezwen vwar li entervenir pou sibvansyon sa lakonpanyen. Menm efas son bann det dan lepase. Olye amelyore nou vwar ki sityasyon in vin pli grav. Kestyon ki devan nou ozordi, se eski Gouvernman pou kapab kontinyen met larzan ver *Air Seychelles*?

Me avan ki nou reponn sa kestyon, i osi enportan pou demande, ki alternativ pou *Air Seychelles*? Parey nou Prezidan in dir, enn bann opsyon direk se reorganiz sa lakonpanyen. Les li konsantre lo bann landrwa kot i kapab fer larzan. Setadir *Passenger handling, Cargo, Technical*, i bann ... *Domestic*.

La osi i pou osi enportan ki rol *Etihad* pou annan dan *Air Seychelles* a sa pwen. Se lo kote son loperasyon vol enternasyonal ki nou merit pe fer en bon analiz. I annan ki pe demande akoz nou pa revwar nou Polisi lavyasyon pou donn *Air Seychelles* lavantaz, olye les bann lezot konpanyen vin isi.

Be si nou al dan sa direksyon, i pou vedir en lot problem pou en lendistri lavyasyon. Lemonn pe evolue i pe al dan en direksyon pli modern. Sesel koman en pti pei,

nou napa gran swa ki si nou anvi reste konekte avek larestan lemonn. Nou bezwen aziste nou Polisi nou osi.

Sa ki mon konnen Mr Speaker, nou pa ankor ariv lo staz *open sky*. Akoz *open sky* i vedir *airline* i deside li menm ki kantite vol i anvi fer, e koman i anvi fer li. Nou annan en Polisi kontrole, savedir menm si nou donn en pei permisyon pou son *airline* anvol Sesel, nou dir li ki kantite vol i kapab fer e ki bann lezot kondisyon ki atase avek.

Sa i ganny fer pou protez nou *airline*. Mr Speaker nou bezwen realize ki si nou refiz en pei pou son *airline* anvol kot nou, aa pei pou osi egzers menm drwa kot i osi anpes nou *airline* anvol kot li. Avek sa Sesel napa swa, nou pa pou kapab anpes lezot *airline* vin Sesel pour ki *Air Seychelles* i ganny lavantaz.

IATA, *WTO* e menm *fair trade* i promot konpetisyon, e sa i dan lavantaz kliyan kot nou vwar ozordi nou annan bokou swa pou vwayaze e menm a pri abordab.

Mr Speaker nou kapab vwar par egzanp nou laliny Moris ek *Sud Afrique* kot *Air Seychelles* i annan monopoli pou plizyer lannen en a en pri egzorbitan.

Kestyon se eski *Air Seychelles* i fer profi lo sa bann larout? Bokou Seselwa ti pe komans pran *Ethiopian* e *Emirates* pou sorti Sesel pou al *Sud Afrique* akoz i pli bon marse.

Menm senaryo avek *Air Ostral* pou al Moris, akoz i meyer marse. Rezon se ki model *Air Seychelles* pa ekonomik e varyab. E si sa pa sanze i pou toultan perdi larzan.

Mr Speaker sityasyon *Air Seychelles* i merit en analiz finansyel pli profon, sirtou lo diferan opsyon ki sa lakonpanyen i annan ozordi. Avek en rapor detaye lo sa analiz nou Lasanble i ava dan en pli bon pozisyon pou desid lo meyer alternativ pou sa lakonpanyen.

Mr Speaker apre tou sa leokri ki nou'n fer dan sa Lasanble lo size koripsyon, fodre *LDS* ti mont *State House* pou nou ganny en lendikasyon lo sityasyon koripsyon dan nou Gouvernman.

Mon soulaze avek parol Prezidan, akoz se pep Seselwa ki soufer ler koripsyon i ganny soutire. Mon osi salye sa langazman ki Prezidan in fer pou asire ki Komisyon Anti-Koripsyon i prodwi rezilta sa lannen. I ti'n plis ki ler pou

dimoun enplike dan koripsyon konn semen lazistis.

Moman laverite pe arive e Seselwa pe espere. Sa i anmenn mwan lo sa rapor enterim lo lakonpanyen *COSPROH* ki Komisyon lanket dirize par Oditer Zeneral ti prezant avek Ansyen Prezidan Faure an Me 2020.

La ki nou annan en nouvo Prezidan, mon swete ki i donn son reaksyon lo sa rapor, pour ki Oditer Zeneral i kapab kontinyen avek sa travay, afen ki Seselwa i ava konnen ki vreman pase avek byen Leta.

Tou dernyerman en O Zofisyè dan serten Minister ti pe fer disparet serten *file*. E ler Prezidan i dir nou ki i pa'n zwenn okenn *file* ler in antre *State House*, mon pa sirprann. Akoz sa i labitid serten dimoun dan sa ansyen Gouvernman. Alor mon lans en lapel pou bann travayer servis piblik ki annan lenformasyon lo sa size *file* dan sa Minister, pou fer nou konnen.

Mr Speaker mon distrik Takamaka;- nou'n komans lannen ser zabitan Takamaka nou'n komans nou lannen 2021 avek bokou lensertitid, e en lekonomi bouverse. Mon konnen ki zot deza pe santi lefe sa kriz finansyel dan zot lavi toulezour. Malgre sa mon osi

konnen ki nou pep i for e i determinen.

Nou pou kapab sirmonte, me i enportan pou nou fer serten lazisteman. Mon annan lespwar dan sa plan pou redinamiz nou lekonomi, e kree lanplwa pou Seselwa an premye.

Me parey zot konnen pou en plan marse fodre ki nou donn tou nou langazman, alor si nou napa en travay, ou pou bezwen sezi tou loportinite pou ganny en travay. En travay i primordyal dan sa moman kritik.

Mon osi konnen ki lamazorite zot i anvi travay, me zot pa pe vwar en debousman. Alor mon sezi sa loportinite pou demann Minister Lanplwa e lezot Lazans konsernen pou entrodwir en sistenm *fast track* pou bann dimoun ki pe rod lanplwa. I pou enportan pou dimoun ganny lenformasyon lo bann loportinite travay a tou moman.

Mr Speaker nou distrik pe osi fer fas avek en gro problem lozman. E sa i akoz nou distrik in ganny neglize anba ansyen Gouvernman.

Zis mazine an 2020 Takamaka ti ganny asiste avek selman 28 lakaz dan en proze 40 lakaz kot Ex-Desaubin. Dernyen proze lakaz avan Ex-

Desaubin ti Ex-Ste Ange an 2001.

Alor zabitan mon distrik in esper 19an pou ganny sa 28 *unit* lakaz an Oktob lannen pase. En dezapwentman total pou tou sa bann aplikan ki'n kontinyen pey zot kontribisyon mwan apre mwan, lannen apre lannen.

Sa ki osi dezapwentan, dimoun ki pe esper lakaz pou plis ki 20an, pa'n ganny asiste dan sa dernyen alokasyon lakaz. E sa ki mon pa kapab konpran akoz ki Takamaka i ganny zis 24 lakaz apre tou sa lannen! 19an.

Mr Speaker mon oule war solisyon imedya pou adres probleman lozman dan mon distrik. E la mon pou enplor Minister responsab pou Later ek Lozman, pou fer lespas pou Takamaka dan zot plan lakaz pou 2021.

Yer Onorab Georges in koz for lo sa size e in ganny en plas lo lalis priyorite, e alor mon pou demann Minister met Takamaka zis akote Les Mamelles lo son lalis.

Mr Speaker i annan plizyer morso later Leta dan mon distrik kot nou devret kapab konstrir en proze. Menm si fodre fer lakaz tanporer silvouple fer li, akoz nou zabitan i dan bezwen.

Zis pou ilistre en sityasyon dan mon distrik, zis mazine 13 dimoun parmi 9 adilt pe reste dan en lakaz 2 lasanm, ozordi kan mon pe koze.

Dan sikonstans aktyel Gouvernman i devret konsider konstri lakaz ki meyer marse pou soulaz bann fanmir ki dan bann sityasyon deplorab e difisil.

Mon zwenn avek lezot koleg ki'n fer resorti sa pwen, pou demande ki Gouvernman i revwar sa sistenm pwen o pli vit posibil, pou kapab. Akoz mon bann dimoun ki kontinyen ganny kit deryer. E osi bann dimoun ki pe ganny difikilte pe ganny lozman prive e an menm tan zot bezwen fer zot konstriksiyon pou zot prop lakaz.

La mazorite zot pa kapab *afford* sa de peyman ansanm. Pou konklir Mr Speaker, mon annan konfyans total ki Sesel pou sanze pli meyer anba direksyon nou nouvo Prezidan. Akoz mon konnen ki i pou kontinyen ganny gide par bann bon prensip ki'n permet li ariv *State House* ozordi.

I reste pou mwan swet li avek son lekip pou de bon dan sa travay enportan ki zot annan pou fer pou nou pep, e pour nou pei Sesel. Mersi Mr Speaker.

(APPLAUSE)

MR SPEAKER

Mersi Onorab. Nou'n ariv a lafen pou ozordi. Mon a dir zot tou pas en bonn sware. Nou a rezwenn demen bomaten 9er. Mersi.

(ADJOURNMENT)